

2 ሳሙዔኤል ማፃኣፖ ዓይያ ካር

ለማሳ ሳሙዔኤል ማፃኣፖ፡- ሳሙዔኤል ማፃኣፖ ቤርታሳዞ ሄሊ ፃኣፒንቴያ ማዓዛ፣ ዳውቴ ቤርታዲ ዶኦሎ ዛሎ ዓጮይዳ ዪሁዳኮ ካኣቲ ማዔሢ፤ (ዓይ. 1-4) ዬካፓ ኬዶ ዛሎ ዓጮ ማዔ፣ ዒሰራዔኤሌንታ ዬኖ ዓጮሎኮዋ ቢያ ካኣቲ ማዒ ዋይሢሢ ዛላ ኬኤዛያኬ (ዓይ. 5-24)። ማፃኣፒላ፡- ዳውቴ ፔኤኮ ካኣቲዋ ዓጮ ዳልጊሻኒ፣ ሃሣ ፔ ቢታንቶ ዶዲሺ ዳይሢኒ ዓጮሎኮ ጋርና ዙሎናፓ ሙካ ሞርኮና የልቴ ዳኤፒ ዳኤፒ የልዚያ ኬኤዛኔ። ዳውቴ የኦሲ ዒናፓ ጉሙርቃያ፣ ሃሣ ናሽካያ፤ ዬያጉዲ ዳራኣ ዒዛ ጉሙርቃያ ማዔሢ ሃኖ ማፃኣፖይዳ ኬኤዚንቴኔ፤ ሃሣ ጊንሣ ፔቴ ፔቴና ዒዚ ሚጨንቴዋ የርታ ማዶ ማዶያታሢና ፔ ማሊያ ኩንሣኒ የርታ የርታ ጎሜ ማዶሢያ ፓይዲ ኬኤዛኔ። ጋዓንቴ የኦሲ ማሊያ ኬኤዛሢ፣ ናኣታኣኔ ሙኪ ዒ ማዶ ጎሞ ኬኤዜ ዋዶና ፔኤኮ ጎሞ ቡኦዲ የኦሲ ዒዛይዳ ዓጌ ባኮዋ ዔኬሢ ኬኤዛኔ።

ዳውቴ ናንጌ ናንጎና ዒ ማዶ ማዶ ዒሰራዔኤል ዳርሞ ሚርጌና ኮሺ ማዔሢር ዒዛኮ ጊንፃፓ ዓጮይዳ ሜታ ሄላ ዋዶና ቢያ ሚሌ ካኣቲ ዔይታ ካኣታሳኒ ኮዓየ ዳውቴ ናይ ሃንጎ ዳውቴ ዜርፃፓ ማዔያ፣ ዓዳ ዳውቴጉዲ ዔይቶ ዋይሢንዳያ ዓሲ «ዓይጌ ኦሞ ዒንጋንዳይ?» ጌይ ኮዓኔ።

ማፃኣፒላ ዲማ ዲማ ዓርቄ ባኮ

- ዳውቴኮ ዪሁዳይዳ ካኣታዲያ (1:1-4:12)
- ዒሰራዔኤል ዓጮ ጉቤይዳ ዳውቴኮ ካኣታዲያ (5:1-24:25)
 1. ቤርታሳ ሌያ (5:1-10:19)
 2. ዳውቴና ቤርሳቤሆና (11:1-12:25)
 3. ሜቶና ዋኦና (12:26-20:26)
 4. ጋፒንያ ሌያ (21:1-24:25)

ዳውቴ ሳኣዎኦሌኮ ሃይቦ ዋይዜሢ

1 ሳኣዎኦሌ ሃይቄሰካፓ ዳውቴ ዓማሌቄ ዓሶ የሎና ባሺ ማዓየ ዪቅላጌይዳ ላሞየ ኬሊ ዳዔኔ፤ 2 ሃይሣሳ ኬሎና ፔቴ ዳጌ ሳኣዎኦሌንሢ ዓኣ ቤዛፓ ሙኬኔ፤ ዬይ ናማ ዒማና ፔኤኮ ዓፒሎ ዳርዚ፣ ቶኦኮይዳኣ ሲላሊ ዋሃ፣ ዳውቴ ኮይላ ሙካየ ሳዓ ላሂ ቦንቾ

ዔኤሊሢ ዔኤሌኔ፤ 3 ዳውቴ ዒዛ:- «ዓንካፓ ኔ ሙኩይ?» ጌይ ያኑጩኔ።

ዒዚ ማሃዮ:- «ዒሰራዔኤሌ ዓሳ ዓኣ ቤዛፓ ቶሊ ታ ሙኩኔ» ጌዔኔ።

4 ዳውቴ ዒዛ ኮይላ:- «ሂንዳ ማዲንቴ ባኮ ቢያ ታኣም ከኤዜ» ጌዔኔ።

ናማ:- «ኑኡኮ ፖኦሊሳ ያሎና ባሺንቴ ጸሸከኔ፤ ሚርጌ ዓሲ ኑኡኮ ሃይቄኔ፤ ሃሣ ሳኣዮኦሊንታ ዒዛኮ ናኣዚ ዮናታኣኔንታ ዎዶና» ጌዔኔ።

5 ዳውቴ ዬያ ሃይሶ ዔኪ ሙኩ ዴጌሢ ኮይላ:- «ሳኣዮኦሊንታ ዒዛኮ ናኣዚ ዮናታኣኔንታ ሃይቄሢ ዎዲ ኔ ዔሬይ?» ጌይ ያኑጩኔ።

6 ዴጌሢ ማሃዮ:- «ታኣኒ ገልቦዓ ዲካ ዓኣዮ ሳኣዮኦሌ ፔኤኮ ዎርዎ ኮኣላዲ ዓኣንቴ፤ ሃሣ ዒዛ ሞርኮኮ ሳርጌሎ ያይታ ዴዒ ያላ ዓሶንታ ፓራሢና ያላ ዓሶንታ ዒዛ ባንሢ ሙካንቴ ታ ዴንቄኔ፤ 7 ዒዚ ዒማና ገንሢም ሺሪ ታና ዴንቃዎ ዔኤላዛ፤ ታኣኒ:- <ዮ! ታ ጎዳ> ጌዔኔ፤ 8 ዒዚ ታና:- <ኔ ዓንኮ ዓሲዳይ?> ጌዒ ያኑጩም፤ ታኣኒ ዓማሌቄ ዓሲታሢ ከኤዜኔ፤ 9 ዬካፓ ዒዚ:- <ሂኒ ሙኪ ታና ዎዴ፤ ዲኡቴ ታ ማኣሳኒ ዓኣሢር ታ ሃይቄያዎይ!> ጌዔኔ፤ 10 ዒዚ ሎሎኦማዮ ሃይቃንዳሢ ታ ዔሬሢር ዒዛ ባንሢ ሙኪ ታ ዒዛ ዎዴኔ፤ ዬካፓ ታኣኒ ዒዚ ቶኦካ ዓጋ ቦንቾ ባኮንታ ጋዎንታ ዔከኔ፤ ታ ጎዳ! ሃይሾ፤ ታ ኔኤም ዔኪ ሙኩኔ» ጌዔኔ።

11 ዬያር ዳውቴ ያያዮ ፔኤኮ ማኣዓሢ ዳርዜም ዒዛና ዎላ ዓኣ ዓሳኣ ዒማይዴኔ፤ 12 ሳኣዮኦሊንታ ናኣዚ ዮናታኣኔንታ ያኦሲ ያሎ ያላ፤ ዒሰራዔኤሌ ዓሳ ሚርጌ ሃይቄሢር ዴንዲ ሳዓ ዓማንዳያ ሃላንዳኣና ሙኡዚ ሙዑዎዮ ያዪ ዬኤኮኔ።

13 ዳውቴ ዬያ ሃይሶ ዔኪ ሙኩ ዴጌሢ:- «ኔ ዓንኮ ዓሲዳይ?» ጌይ ያኑጩኔ።

ዒዚ ማሃዮ:- «ታ ኔ ዓጮይዳ ቤቲ ሙኪ ናንጋ፤ ዓማሌቄ ዓጪ ዓሲ ናይከ» ጌዔኔ። 14 ዳውቴ ዒማና:- «ሂዳዮ ናንገና ናንጋ ጎዳ ደኣሚ ካኣታሢ ካኣቲ ዎዲ ኔ ጫርቄ ዎዴይ?» ጌይ ያኑጩኔ። 15 ዬካፓ ዳውቴ ዒዛና ዎላ ዓኣ ዓሶይዳፓ ፔቴ ዓሲ ዔኤላዮ:- «ሃያ ዎዴ!» ጌይ ዓይሣዛ፤ ዬይ ዓሢ ዬያ፤ ዓማሌቄ ዓጮ ናማ ጳርቄ ዎዴኔ፤ 16 ዒማና ዳውቴ ዓማሌቄ ዓሳሢ ኮራ:- «ሃያ ባኮ ኔ ኔጊዳ ኔኤር ኔኤኒ ዔኪ ዬዔኔ፤ ናንገና ናንጋ ጎዳ ደኣሚ ካኣቲ ታ ዎዴ» ጌይ ከኤዚያና ኔጊዳ ኔ ኔኤር ዎጌኔ» ጌዔኔ።

ዳውቴ ሳኣዮኦሊና ዮናታኣኔና ዛሎ ቃዬ ቃዮ

1:10 1:10 1ሳሙ. 31:1-6፤ 1ዮኦሲ. ዓሃኬ 10:1-6።

17 ደውቴ ሳኦኦኤልና ዮናታኦኤልና ዛሎ ያዩ ቃዬኔ፤ 18 ዬያጉዲ ሃሃሃ ሃኢሺ ዛላ ቃዩንቴ ቃዮ ዩሁዳ ዴራ ጌይ ጌይ ዔራንዳጉዲ ዒዚ ዓይሄኔ፤ ዬይ ቃያ ያሻሬ ማፃኦፖይዳ ፃኦፕንቲ ዓኦኔ፤

19 «ኦኦኦ ሰኡጋ ዒሰራዔኤል ጌሚርይዳ ሃይቄኔ፤ ኦኦኦ ፖኦሊሶፓ ዔርቴ ዶዶ ዓሳ ኩዴኔ!

20 ዬያ ሃይሶ ጋኦቴይዳ ኬኤዚፖቴ፤ ዓሰቄሎና ጎይይዳኦ ጌሰቲፖቴ፤ ፒሊሰፃኤሚ ላኦላ ዋዛዳንዳጉዲ

ዓቲንቶ ቤርቶ ቲቂንቲባኦ ዓሶኦ ላኦሎ ዒላሺሲፖቴ።»

21 «ዔርቴ ያሎ ዓሶኦ ጊቲማ ዒኢካ ኬኤሪንቲ ዓቲሢር ሳኦኦኤል ከጊቲማ ዛይቶና ዑጩንቶ ዓቲሢር ጌልቦዓ ጌሚርይዳ ዒርዚ ዋርቆፓ

ሃሃሃ ያልኬያ ያልካዶፓ! ዔያቶኦ ጎኩይዳ ፔቴ ባኦዚታዎ ባቃሎፓ፤

22 ዮናታኦኤል ከ ዓኦዛ ሳኦ ኬዱዋያኬ፤ ሳኦኦኤል ጩንቶ ዓፓራ ሞርኦ ቲቂ ኩርሳያኬ፤ ዋልቆና ዓኦ ዴኤፖ ቆፂ ሜንሃያኬ፤ ሞርኦዋ ዋዳያኬ።»

23 «ዒሰራዔኤል ዴራ ቢያ ሳኦኦኤልና ዮናታኦኤልና ዒናፓ ናሽኪ ዔያቶ ሄርሻኔ፤ ሳኦኦኤልና ዮናታኦኤል ዴማዲዋዎ ዋላ ናንጊ፣ ዋላ ሃይቄኔ፤ ዔያታ ኮኦኬይዳፓ ባሽ ሩኡራያ፣ ዘቢዳፓኦ ባሽ ዋልቄ ዓኦያኬ።»

24 «ዒሰራዔኤል ላኦሊዮቴ! ሳኦኦኤል ዒንሢ ሚዛጰ ሻኦኩ ዓፒሎ ማይሴሢር ዋርቆና ሚዛጲሶና ማኦዓሢ ማይሴሢር ሳኦኦኤል ዩኤኩዋቴ!»

25 «ዔርቴ ፖኦሊሳ ቢያ ኩዴኔ፤ ቢያሢ ያሎና ሃይቄኔ፤ ዮናታኦኤል ጌሚርይዳ ሃይቄ ላሄኔ!»

26 «ታ ዒሻሃ፣ ዮናታኦኤል!

ታ ኔ ዛሎ ዒናፓ ያያኔ፤
 ኔኤና ኑ ዋሊ ኮሺ ናሽካያኮ፤
 ኔ ታና ናሽካ ናሹማ ሃይማኬ ጌይንቱዋያኮ፤
 ዬይ ናሹማ ላኣሊ ናሽኮያይዳፓ ዑሣኬ።»

27 «ዋልቆና ዓኣ ዴኤፖ ያሎ ዓሳ ሃይቄኔ!
 ዔያቶኮ ያሎ ዓንጋማኣ ጉሪ ዓቴኔ።»

2

ዳውቴ ዪሁዳይዳ ካኣታዴሢ

1 ዬካፓ ዳውቴ፡- «ዪሁዳ ካታሞይዳፓ ፔቴ ካታማ ታ ዴንዶንዶ?» ጌይ ናንጊና ናንጋ ጎዳ ያኦጩኔ።

ናንጊና ናንጋ ጎዳ ማሃያ፡- «ሂዮ፡ ዴንዴ» ጌዔኔ።

ዳውቴ ጊንሣ፡- «ዋኖ ካታሜሎ ዴንዶንዶይ?» ጌይ ያኦጩኔ።

ናንጊና ናንጋ ጎዳ ዒዛም፡- «ኬብሮኦኔ ካታሞ ዴንዴ» ጌዔኔ።

2 ዬያሮ ዳውቴ ፔኤኮ ላምዖ ላኣሎ ዒይዚራዔኤል ካታማ ሾይንቱ ዓሂኖዓሞንታ ቁርሜሎሴ ካታማ ሾይንቱ፡ ሃይቄሢ ናኣባሌ ማቐ ዓቢጋይሎንታ ዔኪ ኬብሮኦኔ ዴንዴ፤ 3 ዬያጉዲ ሃሣ ዳውቴ ዒዛና ዋላ ዓኣ ዓሶ ዔያቶኮ ማኣሮ ዓሶና ዋላ ዔኪ ዴንዴሢሮ ዔያታ ኬብሮኦኔ ካታሞ ኮይላ ዓኣ ዳኮ ዳኮ ካታሞይዳ ዴዔኔ። 4 ዬካፓ ዪሁዳ ዓሳ ኬብሮኦኔ ሙኪ፡ ዳውቴ ዶኦሚ ዪሁዳይዳ ካኣታሢኔ።

ዳውቴ ዒማና ጌሌዓዴ ዓሲ ማዔ ያቤሼ ዓሳ ሳኣዶኦሌ ዱኡከሢሢ ዋይዛያ፡ 5 ጌሌዓዴ ዓሲ ማዔ ያቤሼ ዓሶም፡- «ሳኣዶኦሌ ዱኡከሢያና ዒንሢከ ካኣቲም ኮሺ ማዶ ዒንሢ ማዶሢሮ ናንጊና ናንጋ ጎዳ ዒንሢ ዓንጀንጎ። 6 ሃሣ ዒዚ ፔኤኮ ኮሹሞና ጉሙርቁንቲያዋ ዒንሢሞ ፔጋሲ ዳዎንጎ፤ ዒንሢ ማዶ ኮዠ ማዶሮ ታኣኒያ ዒንሢሞ ኮሺ ማዶ ማሃንዳኔ። 7 ዓካሪ ዒንሢከ ካኣታሢ፡ ሳኣዶኦሌ ሃይቄሢሮ ዒጊጩፖቴ! ዶዶዋቴ! ዪሁዳ ዴራ ታና ዶኦሚ ካኣታሢኔ» ጌይ ኪኢታ ዓሲ ዳኬኔ።

ዔሽባዓኣሌ ዒሰራዔኤሌይዳ ካኣታዴሢ

8 ሳኦጎሎኮ ፖኦሊሶ ዓይሣ፡ ኔሪ ናኣዚ፡ ዓቤኔሬ ሳኦጎሎ ናኣዚ ዔሽባዓኣሌና * ዋላ ዮርዳኖሴ ዋሮና ፒንቂ ማሂናይሜ ካታሞ ፑኒ ዴንዴኔ፤ 9 ዒኢካ ዓቤኔሬ ጌሌዓዴ ዓጮይዳ፡ ዓሴኤሬይዳ፡ ዒይዚራዔኤሌይዳ፡ ዔፕሬኤሜንታ ቢኢኒያሜንታ ጌይፃ፡- ዒሰራዔኤሌ ዓጮ ቢያ ዋይሣንዳጉዲ ዔሽባዓኣሌ ካኣታሣኔ። 10 ዒዚ ካኣታዳኣና ሌዓ ዒዛኮ ያይዲታሚኬ፤ ላምፆ ሌዔ ዒ ካኣታዲ ዋይሣኔ።

ዪሁዳ ፃጳ ጋዓንቴ ዳውቴ ዓሲ ማዒ ዴዴዔኔ፤ 11 ዳውቴያ ዒማና ኬብርኤይዳ ዴዒ ዪሁዳ ዓጮ ቢያይዳ ላንካይ ሌዔና ዛላና ካኣታዳኔ።

ዒሰራዔኤሌ ዓሶና ዪሁዳ ዓሶና ዋላ ያልቴ ያሎ

12 ዓቤኔሬና ዔሽባዓኣሌ ዶንዘና ማሂናይሜፓ ዔቂ ጌባፆኦኔ ካታሞ ሙኬኔ፤ 13 ዒንዳ ጻሩያ ጌይንታ ዒዮዓቤና ዳውቴ ቢታንቶ ዒንጌ ዓሳኣ ሙኪ ጌባፆኦኔይዳ ቦቆሎ ዓጮ ዔያቶና ካኣሜኔ፤ ዔያታ ፔቴይዳ ፓቂንቴ ፓቂንቴ ቦቆሎ ዋኣፆ ኮይሎይዳ ሶሱኮና ሃኒ ሱኮናይዳ ዴዔኔ። 14 ዒማና ዓቤኔሬ ዒዮዓቤ ኮይላ፡- «ኑ ዓሶፓኣ ዒንሣ ዓሶፓኣ ዴጌ ዴጌ ኑ ዶኦራዛ ያ ባሻቴያ ዋሊ ዔያታ ሂንዳ ዛጎንጎ» ጌዔኔ።

ዒዮዓቤ፡- «ቃራኬ» ጌዔኔ። 15 ዬያሮ ቢኢኒያሜ ዓሶ ካኣቴ ዔሽባዓኣሌ ዛላፓ ዶኦጎንቴ ታጳ ላምፆ ዓሲና ዳውቴ ዓሶና ዋላ ያሎ ዓርቄኔ። 16 ዬካፓ ፔቴ ፔቴ ዓሳ ፔኤኮ ሞርኮኮ ቶኦኮ ጋፓኖ ማሪ ዓርቂ ጎኦቦይዳ ጎኦቦይዳ ጮንቾ ዓራፖና ዋሊ ጫርጌኔ፤ ዬያይዲ ላማታሚ ያይዳ ዓሲ ፔቴና ዒኢካ ሃይቄኔ፤ ዬያሮ ጌባፆኦኔይዳ ዓኣ፡ ዬና ቤዜላ፡- «ያልዚ ሳዓ» ጌይንቴኔ።

17 ዬኖ ኬሎ ዶዲ ያልዚ ያሊንታዛ ዳውቴ ዓሳ ዓቤኔሬንታ ዒሰራዔኤሌ ዓሶንታ ያሊ ባሼኔ። 18 ዒማና ዒዮዓቤ፡ ዓቢሻዬ፡ ዓሳሂሌ፡ ሃይሣ ጻሩያ ናኣታኣ ዒኢካ ዓኣኔ፤ ዬያሮ ጌንፆጉዲ ሩኦሪ ጳሽካ፡ ዓሳሂሌ፡ 19 ዓቤኔሬ ሌሊ ዋዳኒ ጊንፆ ዳውሲ ዴንዴኔ፤ 20 ዓቤኔሬ ዒማና ጊንሣሞ ሺሪ ዛጋፆ፡- «ዓሳሂሌ! ኔናዳ?» ጌዔኔ።

ዓሳሂሌ ማሃፆ፡- «ሂዮ፡ ታናኬ» ጌዔኔ። 21 ዓቤኔሬ ዒዛ ኮራ፡- «ታና ዳውሲያ ሃሼ! ዬያይዳፓ ሃንጎ ፖኦሊሶፓ ፔቴ ዳውሲ ዓርቂ

* 2:8 2:8 ዔሽባዓኣሌና ሃና ሱንፃ ዔብሬ ዓሶ ሙኤጮ ማፃአፖይዳ «ዒያቡሰቴ» ጌይንቴኔ፤ ዓሂኮ ሱንፃ ጋዓንቴ ዔሽባዓኣሌኬ (1ያኦሲ. ዓሃኬ 8:33፤ 9:39፤ ሆሲ. 2:16፤ ዔር. 11:13ይዳ ዛጌ።) ዔብሬ ዓሶ ሙኤጮ ማፃአፖይዳ ዓሳ ዬያ ሱንፃ ላኣማኒ ኮዔሂ ካኣና ናሶኮ ባዓኣሌ ጌይንታ ያኦዘ ሱንፃይዳ ጌሂንቴኔ ጌይከ፤ ካኣቴ ዳውቴ ዋዶና ባዓኣሌ ጌይፃ ናንጊና ናንጋ ጎዳ ማዔ ዒሰራዔኤሌ ያኦሲ ጌይሂኬ።

ዓላ ባኮ ቢያ ዔኬ» ጌዔኔ፤ ጋዓንቴ ዓሳሄሌ ዋይዞ ዒዲ ዒዛ ሌሊ ዳውሴኔ፤ 22 ዬያሮ ላሚ ዓቤኔሬ፡- «ታና ዳውሶ ሃሽ! ታ ኔና ዋዲንዳጉዲ ዒይጋ ኔ ሃያይዳይ? ታ ኔና ዋዲቴ ኔ ጌርሲ ዒዮዓቤኮ ዓኣፖ ካሮ ዋይቲ ታ ዛጋንዳይ?» ጌዔኔ። 23 ዓሳሄሌ ጋዓንቴ ዳውሲያ ሃሽ ዒፃዛ፣ ዓቤኔሬ ፔ ዋርያና ገንሢም ዓሳሄሌኮ ጎጳ ጫርጊ ዙሌና ሶፒሴኔ፤ ዬያሮ ዓሳሄሌ ሳዓ ሎኦሚ ሃይቄኔ፤ ዒዛኮ ሌዛ ዓኣ ቤዘና ዓኣዳ ዓሲ ቢያ ዔቂ ዒቂ ዒዛኮ ሌዘ ዛጋኔ።

24 ዬካፓ ዒዮዓቤና ዓቢሻዬና ዓቤኔሬ ዳውሴኔ፤ ዔያታ ዳውሴ ጎይሣ ዓኣንቴ ዓባ ጌላዘ ገያሄኮ ዓባ ኬሰካ ዛሎና፣ ጌባያኦኔ ባንሢ ዓሲ ናንጉዋ ዳውሎይዴና ዔኪ ዴንዳ ጎይያይዳ ዓኣ ዓማ ጌሚሮ ዔያታ ሄሌኔ። 25 ዬካፓ ቢኢኒያሚ ፃጳ ላሚ ቡከንቴ ዓቤኔሬ ያላኒ ጌኢጊንቴ ሙካያ ዬኖ ጌሚሮ ቶኦካ ኬሰኪ ዔቄኔ። 26 ዒማና ዓቤኔሬ ዒዮዓቤ ዔኤላያ፡- «ኑ ዋሊ ያሌ ጎይሣ ናናንጋንዳ? ጋፒንፃ ፑርታ ማዓንዳሢ ኔኤም ዔርቲዋዓዳ? ኔ ዓሳ ኦና፣ ፔ ጌርሲንሢ ዳውሲያ ሃሻንዳጉዲ ኔ ኬኤዙዋኣሢ ዓይጎሮዳይ?» ጌዔኔ።

27 ዒዮዓቤ ዒማና፡- «ያኦሲ ሃይቆ! ኔ ዋንዴ ዬያ ፑርቶ ጌኤዘና ዓሶ ዳጋሲባኣያታቴ ታ ዓሳ ሄኤዳ ጉቴ ፔ ጌርሲንሢ ዳውሲያ ሃሽ ዴንዴያናንዳንቴኬ» ጌዔኔ። 28 ዬካፓ ዒዮዓቤ ዛያሢ ፔኤኮ ዋርቃዛ፣ ዴራ ቢያ ዒሰራዔኤሌ ዓሶ ዳውሲያ ሃሽ ዔቄኔ፤ ዬማፓ ማይ ያለባኣሴ።

29 ዬያሮ ዓቤኔሬና ዒዛ ዓሶና ዲማ ሃንቴ ጎይሣ ዓራባ ዶኦጮና ጌይ ዮርዳናሴ ዋርና ፒንቄኔ፤ ቤትሮኔናኣ ዓኣዲ ማሃይሚ ሄሌኔ።

30 ዒዮዓቤ ዓቤኔሬ ዳውሲያ ሃሽ ማዓያ ፔኤኮ ዴሮ ቢያ ቡኩሴኔ፤ ዒማና ዳውቴ ዓሶ ባኣካፓ ዓሳሄሌ ሃሽዛ ታጳ ታዘጳ ዓሲ ዓንኮ ጌሌቴያ ዔርቲባኣሴ። 31 ዳውቴ ዓሳ ቢኢኒያሚ ፃጳ ማዔ፣ ዓቤኔሬ ዓሶፓ ሃይሣ ፃኤታና ላሂታሚ ዓሲ ዋዴኔ። 32 ዒዮዓቤና ዒዛና ዋላ ዓኣ ዓሳ ዓሳሄሌኮ ሌዘ ዔኪ ቤኤቴሌሃሚይዳ ዓኣ ማኣሮ ዓሶ ዴኤፖ ቤዛ ዴኤኬኔ፤ ዬያይዳያ ዬኖ ዋንቴሎ ሃንቴ ጎይሣ ዋርቂ ሳዓ ካራማና ኬብሮኦኔ ሄሌኔ።

3

1 ሳኣያኤል ማኣሮና ዳውቴ ማኣሮ ዓሶና ዋላ ዬያይዲ ያልቲ ሚርጌ ናንጌኔ፤ ያዲ ማዔቴያ ዳውቴ ዓሳ ዶዲ ዶዲ ዓኣዳካ ሳኣያኤል ማኣራ ላቢ ላቢ ሙኩኔ።

ዳውቴ ናኣቶ

2 ዳውቴ ኬብሮኦኔይዳ ዓኣያ ላሆ ዓቲንቄ ናይ ሾዔኔ፤ ዬያቶኮ ቶይዲ ዒይዚራዔኤሌ ካታማ ሾይንቴዘ ዓሃናዓም ናኣዚ።

ዓምኖኦኤኔ፤ 3 ላምዓሳሢ፡- ቁርሜሎሴ ካታማ ሾይንቴዞ፡ ናካባኣሌ ማቾ ዓቢጋይሎ ናኣዚ ኪልዓቤኬ፤ ሃይሣሳሢ፡- ታልማዬ ጌይንታ ጌሹሬ ካኣቲ ናኣ፡ ሾኤ ዓቤሴሎሜኬ፤ 4 ያይዳሳሢ፡- ሃጊቴ ሾኤ ዓዳኒያ፤ ዶንጋሳሢ፡- ዓቢፃላ ሾኤ ሹፓዲያ፤ 5 ላሃሳሢ፡- ዒዛኮ ማቻ ዔግላ ሾኤ ዩትሬዓሜኬ፤ ዩንሢ ሲያ ዒ ኬብርኦኔይዳ ዓኣፖ ሾዔያኬ።

ዓቤኔሬና ዳውቴና ዋላ ጌሰቲ ቡኬሢ

6 ሳኦኦኤኔ ማኣሮና ዳውቴ ማኣሮና ዋሊ ያላኣና ዓቤኔሬ ሳኦኦኤኔ ማኣሮ ያሊ ባሻያ ማዔኔ።

7 ሳኦኦኤኔ ጊንፃኣ ማቾ ሪዲፓ ጎደሰኬና ዓኣኔ፤ ዒዛ ዓያ ናይኬ፤ ፔቴ ኬሊ ሳኦኦኤኔ ናኣዚ፡ ዔሽባዓኣሌ ዓቤኔሬ ኮይላ፡- «ታ ዓዶኮ ጊንፃኣ ማቾ፡ ሪዲፓና ዋላ ኔኤኒ ዓይጋ ላሃይ?» ጌይ ያኦጩኔ። 8 ዩይ ሃይሳ ዓቤኔሬ ኮሺ ዳጋሴሢ፡- «ታኣኒ ዪሁዳ ፃጶይዳ ቃቃሲንቴያ፡ ፓሁቀ ካኒዳ? ታኣኒ ኔ ዓዶ ማኣሮም ዒዛኮ ጌርሲንሢና ዒጊኖናም ጉሙርቁንታያ ማዔኔ፤ ኔናኣ ታኣኒ ዳውቴም ዓኣሢ ዒንጊባኣሴ፤ ሃዳፖ ዩኖ ላኣሌሎ ዛሎና ዋዲ ኔ ታና ሶቂ ሺራይ? 9-10 ናንጊና ናንጋ ጎዳ ሳኦኦኤኔ ካኣቱም ዒዛና ዒዛ ዜርፆናይዳፓ ዔኪ ዳውቴ ካኣታዲ ዋይሣ ዓጮ ዒሰራዔኤሌና ዪሁዳናይዳ ኬዶ ዛሎ ዳኣኔ ዓጫፓ ዴንዲ ደኣሎ ዛሎና ቤርሳቤ ሄላንዳኣና ዳልጊሻኒ ጫኣቂ ጎይፖ ታ ማዲሺባኣቲ ያኦሲ ታና ባይዞም!» ጌዔኔ። 11 ዔሽባዓኣሌ ዒማና ሚርጌና ዒጊጩሢሮ ዓቤኔሬ ኮይላ ፔቴታፖ ዔኤቢ ጌይባኣሴ።

12 ዩካፓ ዓቤኔሬ ኬብርኦኔይዳ ዓኣ፡ ዳውቴም፡- «ሃኖ ዓጮ ዋይሣንዳሢ ያናዳይ? ዩያር ሃሢ ኔ ታኣና ዋላ ጫኣቁም ጫኣቂ ጊኣጌ፤ ጉቤ ዒሰራዔኤሌ ዓጫ ኔ ዴማ ዋርቃንዳጉዲ ማሃኒ ታ ኔና ማኣዳንዳኔ» ጌዒ ኪኣታ ዓሲ ዳኬኔ።

13 ዳውቴ ማሃፖ፡- «ቃራኬ! ታ ኔኤና ዋላ ጫኣቃንዳኔ፤ ጋዓንቴ ዩያኮ ቤርታ ኔ ታኣም ማዳንዳ ባኣዚ ዓኣኔ፤ ዩና ዓይጎዳይ ጌዔቴ ኔ ታ ኮይላ ሙካ ዋዶና ሳኦኦኤኔ ናዋ ሜልኮኦሎ ዔኪ ሙኬ፤ ዩያይዲባኣቲ ኦ ዋላ ካኣማዓኬ» ጌዔኔ። 14 ዩካፓ ሃሢ ዳውቴ ዔሽባዓኣሌ ኮይላ፡- «ታኣኮ ማቾ ሜልኮኦሎ ማሃ ዒንጌ፤ ታ ዒዛ ዔኪር ጌይ ፔቴ ጌኤታ ፒሊሰጌኤሜ ዓሶኮ ዓቲንቴ ቤርቲ ቲቂሢ ጩጌያኬ» ጌዔኔ። 15 ዩያር ዔሽባዓኣሌ ኪኣታ ዓሲ ዳኪ ላሞሼ ናኣዚ፡ ዒዛኮ ዓኒ፡ ፓልዲዔኤሌ ዑፃፓ ሜልኮኦሎ ዔኬኔ፤ 16 ዒዛኮ

3:9-10 3:9-10 1ሳሙ. 15:28። 3:14 3:14 1ሳሙ. 18:27።

ዓረ፣ ፓለዳዔኤሌ ዩኤኪ ዩኤኪ ባሁሪሜ ካታሞ ሄላንዳኣና ገንዖ ደንዳኔ፤ ጋዓንቴ ዓቤኔሬ ዒማና፡- «ኔ ማኣሪ ማዒ ደንዳኔ» ጋዓዛ፣ ዒዚ ደንዳኔ።

17 ዩካፓ ዓቤኔሬ ዒሰራዔኤሌ ሱኡጎ ኮይላ ዓኣዳዖ፡- «ዒንሢ ማርጌ ዎዴ ላውቴ ኦኡኮ ካኣቲ ማዓቲ ዓይጎ!» ጌይ ጌይ ዓኣኔ፤

18 ሃይሾ ዓካሪ ካኣታሱዋቲ፤ ናንጊና ናንጋ ጎዳ፡- ታ ዓይላሢ፣ ዳውቴ ዛሎና ታ ዴሮ ዒሰራዔኤሌ ዓሶ ፒሊሰጄኤሚና ሃንጎ ሞርኮ ኩጫፓኣ ዓውሳንዳኔ፤ ጌዒሢ ጳቂሡዋቲ» ጌዒኔ። 19 ዒማና ዓቤኔሬ ቢኢኒያሜ ፃጳ ዴሮሞ ዩያ ኬኤዜኔ፤ ዩካፓ ቢኢኒያሜና ዒሰራዔኤሌ ዴሮና ማዳኒ ጌሰቲ ባኮ ዳውቴም ኬኤዛኒ ኬብሮኦኔ ደንዳኔ።

20 ዓቤኔሬ ላማታሚ ዓሲና ዎላ ዳውቴ ዓኣ ቤዞ፣ ኬብሮኦኔ ሙካዛ ዳውቴ ዔያቶም ሙኡዚ ገኢጊሼኔ፤ 21 ዓቤኔሬ ዳውቴ ኮይላ፡- «ዒሰራዔኤሌ ዓሳ ኔኤና ዎላ ጫኣቁሞ ጫኣቃንዳጉዲ ኔ ሼና ጌዔ ጎይዖጉዴያ ቢያሢ ዑፃ ኔ ካኣታዳንዳጉዲ ማሃኒ ዒሰራዔኤሌ ዓሶ ባንሢ ታ ደንዳኔም» ጌዔሢሮ ዳውቴ ዓቤኔሬ ዳካዛ ኮሺና ዒ ደንዳኔ።

ዓቤኔሬኮ ሃይቦ

22 ዒማና ዒዮዓቤና ዳውቴኮ ሃንጎ ፖኦሊሶና ማርጌ ባኣዚ ዲዒ ዔኪ ያላፓ ማዒ ሙኡኔ፤ ዓቤኔሬ ጋዓንቴ ዳውቴ ዒዛ ሳራሢ ዳኬሢሮ ኬብሮኦኔይዳ ባኣሴ። 23 ዒዮዓቤና ዒዛ ዓሶና ያላፓ ሙካኣና ኔሪ ናኣዚ ዓቤኔሬ ካኣቲ፣ ዳውቴ ኮይላ ሙኡም ካኣቲ ሳራሢ ዓቤኔሬ ዳኬሢ ዓሲ ዒዮዓቤም ኬኤዜኔ። 24 ዩያሮ ዒዮዓቤ ካኣቲ ኮይላ ሙካዖ፡- «ኔ ዓይጎ ማዶ ማዴይ? ዓቤኔሬ ኔ ኮራ ሙካዛ ዎዲ ዒዛ ኔ ሳራሢ ሃሺ ዳኬይ? 25 ዒዚ ሃይካ ሙኡሢ ኔና ጌሻኒ፤ ሃሃ ኔ ዓይጎ ማዳቲያ ዎኒ ኔ ደንዳቲያ ሙራኒታሢ ኔኤኒ ዔሩዎዓዳ!» ጌዔኔ።

26 ዒዮዓቤ ዳውቴ ኮይላፓ ኬሰኪ ደንዳዖ ዓቤኔሬ ዔኪ ሙካንዳጉዲ ዓሲ ዳኬኔ፤ ዩንሢ ዓሳ ዒዛ ዚራ ጌይንታ ዔቶ ዎኣፃ ካራፓ ማሃ ዔኪ ሙኡኔ፤ ዳውቴ ጋዓንቴ ዩያ ባኮ ፔቲታዖ ዔሩዎሴ። 27 ዓቤኔሬ ማዒ ኬብሮኦኔ ሙካዛ ዒዮዓቤ ዒዛ ዲማሲ ዔኤሌ ጌሰታንዳያ ማሊሲ ካታሞ ጌሎ ካሮ ባንሢ ዔኪ ዓኣዲ፣ ጎጳ ዒዛኮ ጫርጊ ዎዴኔ፤ ዒዮዓቤ ዩያይዳሢ ዓቤኔሬ ቤርታ ዒዛኮ ጌርሲ፣ ዓሳሄሌ ዎዳሢሮ ኮሞ ማሃኒኬ። 28 ዳውቴ ዒማና ዓቤኔሬ ዎዶናሢ ዎይዛዖ፡- «ታናንታ ታ ዓጮይዳ ዓኣ ዴራ ዓቤኔሬ ዎዶና ሱጉይዳፓ ኦ ጌኤሽታሢ ናንጊና ናንጋ ጎዳ ዔራኔ። 29 ዩያሮ ናንጊና ናንጋ ጎዳ ዳካንዳ ፑርቶ ሜታ ዒዮዓቤና ዒዛ ማኣሮ ዓሶ

ሄሎም! ዔያታ ናገጋ ዎዶ ቢያይዳ ዔያቶኮ ማእሮ ዓሶ ባአካፓ ዛርሶ ዶርዎና ዑያይዳ ኬሰካ ዶርዓሢና ባይቆፓ! ሃሃ ገንሃ ጉንዖ ማዓ ዓሶ፣ ያልዚና ሃይቃ ዓሰንታ ናይዚና ሜታዳ ዓሰያ ባይቆፓ!» ጌዔኔ። 30 ዔያይዲ ዒዮዓቤና ዓቢሻዬና ዔያቶኮ ጌርሲ ዓሳሄሌ ጌባዖኦይዳ ዒ ዎዳሢሮ ዓቤኔሬ ዎዲ ኮሞ ማሄኔ።

ዓቤኔሬ ዲኡከንቲሢ

31 ዔካፓ ዒዮዓቤንታ ዒዛ ዓሶንታ ፔኤኮ ማአዓሢ ዳርዚ፣ ፓቲሌያ ማይንቲ ዓቤኔሬ ዩኤካንዳጉዲ ዳውቲ ዓይሣኔ፤ ሃሃ ዓቤኔሬ ዲኡከንታአና ዲኡፖ ቤዘ ሌዘ ዔኪ ዓሶና ዎላ ካአቲ ዳውቲ ዴንዳኔ፤ 32 ዓቤኔሬ ዒማና ኬብሮኦይዳ ዲኡቲኔ፤ ካአቲ ዒኢካ ዲኡፖ ቤዛ ዒላቲ ዩኤከኔ፤ ዩያሮ ዴራአ ጉቤ ዒዛ ዛጊ ዒማዲ ዩኤከኔ፤ 33 ዳውቲ ዓቤኔሬ ዛሎ ያዪያ ዔርዛኒ ሂዚ ጌይ ቃዩኔ፡- «ዓቤኔሬ ላአፓ ዓሰጉዲ ሃይቂያ?

34 ኩጫ ኔኤኮ ቱኡቲባአሴ
ቶካአ ኔኤኮ ዲፃና ቱከንቲባአሴ፤
ኔኤኒ ያዲ ማዒ ዓአያታዖ

ፑርታ ዓሰ ኩሽካ ሃይቃ ዓሰጉዲ ዎዲ ሃይቂያ!»

ዒማና ዴራ ቢያ ዓቤኔሬ ዛሎ ገንሃ ዩኤከኔ።

35 ዒዛ ዓሶ ዳውቲ ሙኡዚ ሙዓንዳጉዲ ዓሳ ዒዛ ሸኢቄኔ፤ ዒዚ ጋዓንቲ፡- «ሃሮ ዓቢ ጌሉዋንቲ ሙኡዚ ታ ሙዔቲ ያኦሲ ታና ባይዘም!» ጌይ ጫአቄኔ። 36 ዴራ ቢያ ዒ ማዳ ባኮ ዛጋዖ ዎዛዳኔ፤ ካአቲ ማዳ ባካ ቢያ ዴሮ ጎኔ ዎዛሴኔ። 37 ዳውቲ ዓሶንታ ዒሰራዔኤሌ ዴሮ ጉቤሢንታ ዓቤኔሬ ዎዲያይዳ ካአቲ፣ ዳውቲ ባአያ ማዔሢ ዔሬኔ። 38 ካአቲ ፔኤኮ ዶንዘም፡- «ሃሮ ዒሰራዔኤሌይዳ ዴኤፒ ሱኡጌ ሃይቂሢ ዒንሢሞ ዔርቱዎዳ? 39 ጎኔና ታና ያኦሲ ዶአሚ ጌሢ ካአቲ ታኦኒ ማዔቲያ ሃሮ ታኦኒ ላቢንቲ ዓሰ ማዔሢ ታአም ዔርቲኔ፤ ዩያታ ፃሩያ ናአታ ታጊዳ ሚርጌና ዎልቃዳኔ፤ ዔያታ ማዳ ፑርቶ ማዶሮ ዔያታ ማዳማጉዲ ያኦሲ ዔያቶም ማሂ ዒንጎም» ጌዔኔ።

4

ዔሽባዓአሌ ዎዶናሢ

1 ኬብሮኦይዳ ዓቤኔሬ ዎዶናሢ ሳአዖኦሌ ናአዚ፣ ዔሽባዓአሌ ዎይዛዖ ሚርጌና ዒጊጨኔ፤ ሃሃ ዒሰራዔኤሌ ዓሳአ ቢያ ዲቃቲ ካራ ባይዜኔ፤ 2 ዔሽባዓአሌኮ ዲማ ዲማ ፓቂንቲ ፖኦሊሶ ሱኡጌ ማዔያ ላምዖ ዓሰሰኬንሢ ዓኦኔ፤ ዔያታ፡- ቢኢኒያሜ ያጳፓ ቤዔርቲይዳ ሾይንቲያ፣ ሪሞኔ ጎዖሰኬያኮ ናይ ማዔያ

ቤዓናና ሬካቤናኬ፤ ቤዔሮቴ ጌይንታዛ ቢኢኒያሜ ዓጮይዳ ማዒ ፓይዲንታያኬ፤³ ቤዔሮቴይዳ ቤርታዲ ናንጋ ዓሳ ጌታይሜ ጌይንታ ቤሲ ፑኒንቲ ዴንዲ ዩማፓ ዓርቃያ ዒኢካ ናንጋ።

4 ባጋሢ ሳኦፖኦሌ ዜርሢ ማዔ ዮናታኦኔ ናኦዚ፣ ሜሪባዓኦሌ * ማዓዛ ዒዚ ሳኦፖኦሌና ዮናታኦኔና ዋዲንቲ ዋዶና ሃጊ ዶንጎ ሌዔ ናይኬ፤ ዔያቶኮ ሃይባ ዒይዚራዔኤሌ ካታማ ኬኤዚንታዛ ዒዛ ዲቻ ዓሴላ ዔኪ ዒዛ ጳሽኬ፤ ጋዓንቲ ዒዛ ሩኡሪ ጳሽካሢሮ ሜሪባዓኦሌ ዒዛኮ ኩጫፓ ኬዲ ሎኦሜ፤ ዩያሮ ዒ ዋቦ ማዔ።

5 ዒማና ሪዋኔ ናኦታ ሬካቤና ቤዓናና ዔሽባዓኦሌ ማኦሪ ዴንዲ ዓባ ሳዛ ማዓማና ሄሌ፤ ዒዚ ሮኦሮና ፔኤኮ ሃውሻኒ ጋራ ላሂ ጊንዒ ዓኦ፤⁶ ካሮ ካፒ ዓኦ ላኦሊሰኬና ዛርጌ ፒዲሲቤቃ ፔኤኮ ጊጊንዓ፤ ዩያሮ ሬካቤና ቤዓናና ቃኦ፤ ኮይሊና ጋሮ ጌሌ፤⁷ ዔያታ ጌላዎ ዔሽባዓኦሌ ላሂ ዓኦ ቆልዎ ጌሊ፣ ዒዚ ሻኦላይዳ ላሂ ዓኦንቲ ጫርጊ ዋዶ፤ ቶኦኮዋ ቲቂ ዔኬ፤ ዩካፓ ዔያታ ዩኖ ኬሎ ዋንቶዋ ፑቤ ሃንቲ ጎይሃ ዮርዳኖሴ ዋሮ ዶኦጮና ጌይ ዴንዴ፤⁸ ዒማና ዔያታ ዔሽባዓኦሌኮ ቶኦኮ ኬብሮኦይዳ ዓኦ፣ ካኦቲ ዳውቴም ዔኪ ሙካዎ፡- «ኔና ዋዶኒ ኮዓ፣ ኔ ሞርካሢ ሳኦፖኦሌኮ ናኦዚ ዔሽባዓኦሌ ቶኦኮ ሃኦዛጌ፤ ካኦቲዮ! ሃኖ ሳኦፖኦሌና ማኦሮ ዓሶናኮ ኮሞ ኔ ማሃንዲፕዲ ናንጊና ናንጋ ጎዳ ዓይሢ።» ጌዔ።

9 ዳውቴ ዔያቶ ኮይላ፡- «ሜቶ ቢያፓ ታና ዓውሴ፣ ናንጊና ናንጋ ጎዳ ሃይቆ! 10 ሳኦፖኦሌ ሃይቁሢ ኬኤዛኒ ፃቅላጌ ታ ኮይላ ሙኬ ከኢቶ ዓሢ ኮሺ ሃይሴ ታኦም ዒ ዔኪ ዩዔያ ዒዛም ማሌ፤ ጋዓንቲ ታኦኒ ዒዛ ዓርቂ ዋዲሺ፤ ኮሺ ሃይሴ» ጌይ ታኦም ዔኪ ሙኬ ዓሢም ታ ማሂ ዒንጌ ባካ ዩማኬ። 11 ዓካሪ ሃሢ ፔ ማኦሮይዳ ላሂ ዓኦ ጌኤኮ ዓሢ ዋዶ ዓሶም ታ ማሂ ዒንጋንዳ ባካ ዋዚ ባሺ ፑርታንዳይ? ዒዛ ዒንሢ ዋዶሢሮ ታ ዒንሢ ዋዶ ኮሞ ዔካኒ ዓጮይዳፓ ጋፒሲ ታ ዒንሢ ባይዛንዳ፤!» ጌዔ። 12 ዩማ ጋጋዓዎ ዔያቶ ዋዶንዲ ዒዚ ፔኤኮ ፖኦሊሶ ዓይሢ፤ ፖኦሊሳ ዒማና ሬካቤና ቤዓናና ዋዶ፣ ዩያቶኮ ኩጫንታ ቶኦንታ ቲቂ ኬብሮኦይዳ ዓኦ ቦቆሎ ኮይላ ሚሢዳ ሱጼ፤ ዩካፓ ዔሽባዓኦሌኮ ቶኦኮ ዔኪ ዴንዲ ዒኢካ ኬብሮኦይዳ ዓኦ ዓቤኔሪ ዴኡፖ ቤዛ ዴኡኬ።

* 4:4 4:4 ሜሪባዓኦሌ ዩና ሱንፃ ዔብሪ ዓሶ ሙኡጮ ማፃአፖይዳ «ሚፒባሽቴ» ጌይንቲ፤ጋዓንቲ ሂንዳ (1ፆኦሲ. ዓሃኬ 9:34፤ 40ይዳ ዛጌ።) ዩያ ዓሢኮ ፒዜ ሱንፃ ሜሪባዓኦሌኬ፤ ዩና ጌይፉ- «ናንጊና ናንጋ ጎዳ ኦ ዛሎ ፆልታ።» ጌይሢኬ፤ ዔብሪ ዓሶ ዩያ ሱንፃ ሺርሺሴ ሜቶ 1ፆኦሲ. ዓሃኬ 2:8 ዛጌ። 4:4 4:4 2ሳሙ. 9:3። 4:10 4:10 2ሳሙ. 1:1-16።

5

ዳውቴ ዒሰራዔኤሌንታ ዪሁዳንታይዳ ካአታዳህ
(1ፆኦሲ. ዓሃኬ 11:1-9፤ 14:1-7)

1 ዩካፓ ዒሰራዔኤሌ ዜርፃ ቢያ ኩብሮኦኔይዳ ዓአ፣ ዳውቴ ኮይላ ዳንዲ፡- «ዋይዜ፤ ኦኦኒ ኔ ዜርህ ማዔ ኔ ዒጊኖኬ።
2 ሃያኮ ቤርታ ሳአፆኦሌ ኦኦኮ ካአቲ ማዒ ዓአ ዋዶናታፃ ዒሰራዔኤሌ ዓሶ ፆሎ ፆሊሳኒ ዔኪ ዳንዲህ ኔናኬ፤ ዩያጉዲ ሃህ ዒዛ ዳር፣ ዒሰራዔኤሌ ዓሶኮ ኔ ዔኪ ዓአዳፃ ማዓንዳጉዲና ዒሰራዔኤሌይዳ ኔ ካአታዳንዳጉዲ ናንጊና ናንጋ ጎዳ ኔኦም ጫአቄኔ» ጌዔኔ። 3 ዒሰራዔኤሌ ዓሶኮ ሱኡጋ ቢያ ኩብሮኦኔይዳ ዓአ፣ ዳውቴ ኮይላ ሙኬህ ሃዲዲኬ፤ ዒዚያ ዔያቶና ዋላ ናንጊና ናንጋ ጎዳ ቤርታ ጌሰቲ ጊኢጊ ጫአቄኔ፤ ዔያታ ዒዛ ዒማና ቲሽኪ ዶአሚ ዒሰራዔኤሌይዳ ካአታህኔ። 4 ዳውቴ ካአታዳአና ለዓ ዒዛኮ ሃይህታሚኬ፤ ዋሊ ዑፃ ዒ ካአታዲ ደዔ ለዓ ፆይዲታሚኬ። 5 ጌይፃ፡- ኩብሮኦኔይዳ ዓአፃ ዪሁዳይዳ ላንካይ ለዔና ዛላና፤ ዩሩሳላሚይዳ ዳዒ ዪሁዳና ጉቤ ዒሰራዔኤሌ ዓጮናይዳ ሃይህታሚ ሃይህ ለዔ ካአታዳኔ።

ዳውቴ ዩሩሳላሚ ያሊ ባሽህ

6 ካአቲ፣ ዳውቴና ዒዛ ዓሶና ዒያቡሳ ዓሶ ፆላኒ ዩሩሳላሚ ዳንዳኔ፤ ዳውቴ ዩና ዓጮ ጌሊንዲዋያ ዔያቶም ማሌህሮ ዒኢካ ናንጋ ዓሳ፡- «ፔቲታፆ ሃይካ ጌላኒ ዳንዳዑዋሴ፤ ማሌ ዓታዛ ዓአፓ ባይቄ ዓሶና ዋሶ ዓሶና ካታሞ ኔና ጌልዛዓኬ» ጌዔኔ። 7 ዳውቴ ጋዓንቲ ዲዮኔይዳ ዔያታ ማክፍ ዋርዲዮ ጌሊ ዓርቄኔ፤ ዩና ካታሚላ፡- «ዳውቴ ካታሚ» ጌይንቲኔ። 8 ዩና ኬሎ ዳውቴ ፔኦኮ ዓሶም፡- «ዒያቡሳ ዓሶ ፆላንዳ ዓሲ ዳውቴኮ ሞርኮ ማዔ፣ ዓአፖ ባይቄ ዓሶና ዋሶ ዓሶ ፆላኒ ዋአፃ ዓአዳ ዳዋህ ካሮ ዳንዳንጎ» ጌዔኔ፤ ዩያይዳፓ ዔቄያና ዓአፖ ባይቄ ዓሶና ዋሶና ካአቶ ማአሪ ጌሎዋጉዲ ላኢጊንቲኔ።

9 ዳውቴ ዋርዲዮ ቤዛ ጌሊ ዓርቄሰካፓ ዩና ዳጌ ቤዜሎይዳ ማአሪ ማክፍ ዳዔኔ፤ ዒዚ ዩና ካታሚሎኮ ሱንፆ፡- «ዳውቴ ካታሚ» ጌይ ጌህኔ፤ ዒዚ ሚሎ ጌይንታ ዔንደይዳፓ ዓርቃፃ ጌሚሮኮ ኮይሎ ቢያይዳ ካታሞ ማክፍ። 10 ናንጊና ናንጋ ጎዳ ማዔ ቢያ ባኮ ዋይህ ፆአዛህ ዒዛና ዋላ ዓአህሮ ዳውቴ ዶዲ ዶዲ ዓአዳኔ።

11 ዪርሴ ካአቲ፣ ኪራሚ ኪኢታ ዓሲ ዳውቴ ኮይላ ዳኬኔ፤ ዔያቶና ዋላ ሚህና ማአሪ ማክ ዓሲ፣ ሹቸና ማክ ዓሲ፡

5:5 5:5 2ሳሙ. 1:1-16። 5:6 5:6 2ሳሙ. 1:1-16።

ዚቢቂያ ዒንጊጋፓ ዒዚ ዳኬኔ። 12 ዳውቴ ናንጊና ናንጋ ጎዳ ዒዛ ዒሰራዔኤሌኮ ካኣቲ ማሄሢና ፔ ዳሮም ጌዒ ዒዛኮ ካኣቲሞ ዓጮ ዳልጊሼሢ ዔሬኔ።

13 ዳውቴ ኩብሮኦኔፓ ዩሩሳላሜ ሙካፖ ቤርታ ዒዛኮ ዓኣ ላኣሎና ጊንፃ ማቸንሢናይዳ ቃሲ ሚርጌ ላኣሊንታ ጊንፃሳ ማቸንሢያኣ ዔኬኔ። ዒማና ዒዚ ሚርጌ ዓቲንቁ ናይና ዉዳሮ ናይና ሾዔኔ፤ 14 ዩሩሳላሜይዳ ዒ ሾዔ ናኣታ፡- ሻሙዓ፡ ሾባቤ፡ ናኣታኣኔ፡ ሴሎሞኔ፡ 15 ዪብሃሬ፡ ዔሊሹዓ፡ ኔፔጌ፡ ያፒዓ፡ 16 ዔሊሻማዔ፡ ዔልያዳዔና ዔሊፔሌፃናኬ።

ዳውቴ ፒሊሰፃኤሜ ዓሶ ያሎና ባሼሢ
(1ያኦሲ. ዓሃኬ 14:8-17)

17 ዳውቴ ዒሰራዔኤሌይዳ ካኣታጳሢ ፒሊሰፃኤሜ ዓሳ ዋይዜኔ፤ ዩያሮ ፒሊሰፃኤሜ ዓሶኮ ፖኦሊሳ ዳውቴ ዓርቃኒ ጎዒ ዴንዳኔ፤ ዳውቴ ዩያ ዋይዛፖ ዋርዲዮ ጌሊ ዴዔኔ፤ 18 ዒማና ፒሊሰፃኤሜ ዓሳ ሙካፖ ራፓይሜ ዶኤጮይዳ ያሎሮ ፓቂንቲ ፓቂንቲ ቤሲ ዓርቁኔ። 19 ዩካፓ ዳውቴ፡- «ፒሊሰፃኤሜ ዓሶ ታ ያሎንዶ? ታና ኔ ዔያቶ ባሺሲሳንዳ?» ጌይ ናንጊና ናንጋ ጎዳ ያኦጮኔ።

ናንጊና ናንጋ ጎዳ ማሃፖ፡- «ሂዮ፡ ዔያቶ ያሌ! ጎኔና ኔ ዔያቶ ባሻንዳጉዲ ታ ማኣዳንዳኔ» ጌዔኔ።

20 ዩያሮ ዳውቴ ባዓልፔራዲሜ ኬዳፖ ፒሊሰፃኤሜ ዓሶ ያሊ ባሺ፡- «ናንጊና ናንጋ ጎዳ ታ ሞርካ ሳዘ ዲጲጉዲ ዳርዚ ጌሌኔ» ጌዔኔ፤ ዩዮ ቤዜሎኮ ሱንፃ፡- «ባዓልፔራዲሜ» (ሞርኮ ዳውሲ ዳርዚ ጌሎና ካሮ) ጌይንቲኔ። 21 ዒማና ፒሊሰፃኤሜ ዓሳ ባሺንቲ ጳሽካፖ ፔኤኮ ካኣሽኮ ያኦዞ ኬኤሪ ዴንዳኔ፤ ዳውቴና ዒዛ ዓሶና ዩያ ዲዒ ዔኬኔ።

22 ዩካፓ ሃሣ ፒሊሰፃኤሜ ዓሳ ራፓይሜ ማዒ ሙኪ ያሎሮ ፓቂንቲ ፓቂንቲ ቤሲ ዓርቁኔ። 23 ዩያሮ ሃሣ ዳውቴ ናንጊና ናንጋ ጎዳ ያኦጮዛ፡ ናንጊና ናንጋ ጎዳ ማሃፖ፡- «ሃሢ ኔ ዓኣ ዛሎና ኬሰኪ ዔያቶ ያሊፖ፤ ጋዓንቲ ሶንጌ ዔያቶኮ ጊንፃ ዓኣ ሻኣቦኮ ሆቶና ሙኪ ዔያቶ ያሊጌ ጊኣጌ። 24 ዩያ ሻኣቦ ዑፃ ያልዚ ዓሲ ካኣኒ ኔ ዋይዜ ዋዶና ታኣኒ ፒሊሰፃኤሜ ዓሶኮ ያሎ ዓሶ ያሊጌ ሙኬያ ማዓሢ ዔሪ ዑከና ዔያቶ ያሌ» ጌዔኔ። 25 ዳውቴ ዒማና ናንጊና ናንጋ ጎዳ ዒዛ ዓይሢ ጎይፖ ማዳኔ፤ ፒሊሰፃኤሜ ዓሶዋ ጌባፖኦኔፓ ዴንዲ ጌዜሬ ሄላንዳኣና ዳውሲ ዳውሲ ዋዳኔ።

6

ዳውቴ ጫአቁሞ ሳአፂኖ ዩሩሳሌም ማሂ ዔኪ ሙከህሂ
(1ፆኦሲ. ዓሃኬ 13:1-14፤ 15:25—16:6፤43)

1 ዳውቴ ላሚ ሃሃ ዒሰራዔኤሌ ዓጮ ቢያይዳፓ ሃይሂታሚ ሺያ ፖኦሊሴ ዶኦሪ ቡኩሴኔ፤ 2 ዳውቴንታ ዒዛና ዎላ ዓአ ዓሶንታ ካክቱሞ ያይቶ ማሂ ከሩቤኤሎይዳ ዴዔ፥ ቢያ ባኮ ዎይሃ ጎዳ ሱንፆና ዔኤሊንታ፥ ያኦሲኮ ጫአቁሞ ሳአፂኖ ዔኪ ሙከኒ ዪሁዳይዳ ዓአ ቤዓላ ዴንዴኔ። 3 ዔያታ ጫአቁሞ ሳአፂኖ ጌሜሮይዳ ዓአ፥ ዓቢናዳኦ ማኦሪፓ ኬሲ ዔኪ ዓከ ሳርጌላ ያይታይዳ ጌሃያ ዑዛና ዓሂዮ ጌይንታ ዓቢናዳኦ ናይሰከንሂና ዩያ ሳርጌሎኮ ቤርታ ቤርታ ዴንዳንዳፓዲ ዓይሂኔ፤ 4 ዓሂዮ ዒማና ጫአቁሞ ሳአፂኖኮ ቤርታ ቤርታ ዴንዳኔ። 5 ዳውቴና ዒሰራዔኤሌ ዓሶና ጋዓንቴ ጎኦላንታ ፔቴ ሻሺ ጎኦላአ ዎርቁ ዎርቁ፥ ካራቤያ ባዒ ባዒ፥ ዑኡቱቡሎንታ ሂቸንታ ያልሲ ያልሲ ናንገና ናንጋ ጎዳ ቦንቺ ዓይናዲሂና ጉቤ ዒኔፓ ዓገዒ ዓገዒ ኮርጋኔ።

6 ዔያታ ናኮኔ ጌይንታ ሃአኮ ሺርኮ ቆይዳሰኬና ሄላዛ ሳርጌሎ ጎቻ ጌማታ ዲቁንቲ ዲቃቴሞ ጫአቁሞ ሳአፂኖ ዶዓኒ ዎኦቴሂሮ ዑዛ ኩቻ ዓርቁኔ፤ 7 ናንገና ናንጋ ጎዳ ማዔ ያኦዛሂ ኔገያ ኔጉዎያ ዳጋዲ ዑዛ ዎዳኔ፤ ዑዛ ዒጊጩዎያ ጫርቁ ዓርቁሂሮ ዒኢካ ጫአቁሞ ሳአፂኖ ኮይላ ሃይቁኔ። 8 ዩማፓ ዓርቃያ ዩና ቤዜላ «ፔሬፀ ዑዛ» (ዑዛሞ ዓሳና ሜቶ) ጌይንቲ ናንጋኔ፤ ናንገና ናንጋ ጎዳ ዳጋዲ ዑዛ ዎዳሂሮ ዳውቴ ሚርጌና ያዩኔ።

9 ዳውቴ ናንገና ናንጋ ጎዳ ዒጊጩሂሮ፡- «ያዲ ማዓቴ ጫአቁሞ ሳአፂኖ ዎዲ ታ ዔኪ ዴንዳንዳይ?» ጌዔኔ። 10 ዩያሮ ዒዚ ጫአቁሞ ሳአፂኖ ዩሩሳሌም ዔኪ ዓአዲያ ሃሺ ገንሃ ዔኪ ማሃያ ጋአቴ ካታሞይዳ ናንጋ፥ ያቤድዔዶኦሚ ጌይንታ ዓሲሰኬያ ማኦሪ ጌልዜኔ፤ 11 ዩካፓ ጫአቁሞ ሳአፂኖ ዒኢካ ሃይሃ ዓገኒ ዴዔኔ፤ ናንገና ናንጋ ጎዳ ዒማና ያቤድዔዶኦሚንታ ማኦሮ ዓሶዎ ዓንጅኔ።

12 ያኦሲኮ ጫአቁሞ ሳአፂኖ ዛሎና ያቤድዔዶኦሚ ማኦሮንታ ዓአ ባኮዎ ቢያ ናንገና ናንጋ ጎዳ ዓንጅሂ ካክቲ፥ ዳውቴ ዎይዜኔ፤ ዩያሮ ጫአቁሞ ሳአፂኖ ዴኤፒ ዎዛና ዩሩሳሌም ዔኪ ሙከኒ ያቤድዔዶኦሚ ማኦራፓ ዴንዲ ዔኬኔ። 13 ዒማና ጫአቁሞ ሳአፂኖ ኬዴ ዓሳ ላሆ ታኦከሂ ታኦካማና ታኦካማና ዔቂሲ ፔቴ ዎፓናና ፔቴ ማሊ ሶሶሪና ናንገና ናንጋ ጎዳሞ ዒንጎ ዒንገሂ ማሂ ሹኪ

6:2 6:2 ኬሲ. ማፃ 25:22። 6:3 6:3 1ሳሙ. 7:1-2። 6:11 6:11 1ፆኦሲ. ዓሃኬ 26:4-5።

ዒዚ ሸኢሻኔ። 14 ዳውቴ ሻኣዣ ፓቲሌና ዲያና ዓፒላ ኬርና ማራያ ናንገና ናንጋ ጎዳ ቦንቺ ጉቤ ዒናፓ ዓገፂ ዓገፂ ኮርጋኔ፤ 15 ዩያይዲ ዳውቴንታ ዒሰራዔኤል ዓሶንታ ዒላሺ ዒላሺ ዛዬያ ዋርቁ ዋርቁ ጫኣቁሞ ሳኣዲኖ ዩሩሳላሜ ዔኪ ዴንዴ።

16 ዔያታ ጫኣቁሞ ሳኣዲኖ ዔኪ ካታሞ ጌላኣና ሳኣዶኦሌኮ ናኣ ሜልኮኣላ ካኣቲ፣ ዳውቴ ባይዲ ባይዲ ኮርጋህ ኬኤዎኮ ፑልቶና ዴንቃያ ፔ ዒኖና ዒዛ ቦሃኔ፤ 17 ዔያታ ጫኣቁሞ ሳኣዲኖ ዔኪ ሙኪ ዳውቴ ገኢሺሽ ዓፒሎና ማዦና ማኣሮ ጋራ ጌህነ ማለንቴ ቤዛ ጌህነ፤ ዩካፓ ዳውቴ ሚቺ ዒንጎ ዒንገይያ ፔቱሞና ዒንጎ ዒንገይ ናንገና ናንጋ ጎዳሞ ሸኢሻኔ። 18 ዳውቴ ዩያ ዒንጎ ባኮ ሸኢሻሰካፓ ቢያ ባኮ ዋይህ ጎዳህ ሱንዖና ዴሮ ዓንጃ፤ 19 ዩያይዴሰካፓ ቢያህሞ ሙኡዚ ዒንጌኔ፤ ዒሰራዔኤሌይዳ ዓኣ ፔቴ ፔቴ ዓቲንቆና ላኣሎናሞ ካህንታ ፔቴ ፔቴ ዓሸኪ ተቁህሚ ሚቾናያንታ ፔቴ ፔቴ ዋይኔ ቃንጫልቁ ሜልዘና ዒንጌኔ፤ ዩካፓ ቢያህሚ ፔ ማኣሪ ማኣሪ ዴንዴ።

20 ዳውቴ ዒማና ማኣሮ ዓሶ፡- «ዒንህሂ ዋዚ ዓኣይ?» ጌይ ዶኦጫኒ ጋሮ ጌላዛ ሳኣዶኦሌ ናኣ፣ ሜልኮኣላ ዒዛ ጎይህ ዔካኒ ኬሰካዎ፡- «ዒሰራዔኤል ካኣቲ ሃኖ ቦቦንቺንቴባኣዓ! ኔ ደንዘኮ ማዲ ማዲ ላኣሎ ቤርታ ዣኣዦ ዓሰጉዲ ዑህ ካሎ ኮኣሚያ ዋዎይቲዶዳ?» ጌዔ።

21 ዳውቴ ማሃዎ፡- «ታኣኒ ዓገፂ ኮርጌህሂ ዒዛ ዴሮ ዒሰራዔኤሌኮ ሰኡጌ ታና ማሃኒ ኔ ዓደንታ ዒዛኮ ማኣሮ ዓሶንታ ዛሎ ታና ደኦሬ ናንገና ናንጋ ጎዳ ቦንቾሞኬ፤ ሃህሂ ማዔቴያ ዒዛ ቦንቾሞ ባይዲ ኮርጌያ ታ ሃሻዓኬ፤ 22 ዩያይዲፓ ዑህ ዓኣዴ ታና ታ ሂርኪዲ ላኣፒሳንዳኔ፤ ኔኤሞ ማላ ጎይያ ታ ቦሃንቴ ዓሲ ማዔቴያ «ዩያቶ ቤርታ ኔና ኔ ላኣፒሴኔ» ኔ ጋዓ ላኣሎ ቤርታ ሚርጌና ታ ቦንቺንቴያ ማዓንዳኔ!» ጌዔ።

23 ዩያ ዒዛ ጌዔህሂሮ ሳኣዶኦሌኮ ናኣ፣ ሜልኮኣላ ሃይቃንዳያ ሄላንዳኣና ናይ ሸውዋዎ ዞኦኮ ማይ ዓቴ።

7

ናኣታኔ ዳውቴሞ ኬኤዜ ባኮ (1ዎኦሲ. ዓሃኬ 17:1-15)

1 ናንገና ናንጋ ጎዳ ሞርኮ ቢያይዲፓ ካፔህሂሮ ካኣቲ፣ ዳውቴ ፔኤኮ ካኣቱሞ ማኣሮይዳ ገኢሺ ናንጋኔ። 2 ዩካፓ ዒዚ ናኣታኔ

6:20 6:20 1ዎኦሲ. ዓሃኬ 16:43።

ከይለ:- «ዋይዘ፡ ታኣኒ ዚቢቆና ማዠና ማኣርይዳ ናንጋኔ፤ ጾኦሲኮ ጫኣቁሞ ሳኣፂና ጋዓንቴ ባፒሎና ማዠንቴ ማኣርይዳ ናንጋንቴሞ!» ጌዔኔ።

3 ዬያሮ ናኣታኔ:- «ናንገና ናንጋ ጎዳ ኔኤና ዋላ ዓኣሢሮ ኔ ማሌ ባኮ ቢያ ማማዳ» ጌዔኔ። 4 ጋዓንቴ ዬኖ ዋንቴሎ ናንገና ናንጋ ጎዳ ናኣታኔሞ ሂዚ ጌይ ከኤዘኔ:- 5 «ታ ዓይላሢ፡ ዳውቴ ከይለ ዴንዲ ታ ዒዛሞ ጋዓ ባኮ ከኤዘ፤ ታ ናንጋንዳ ጌኤዠ ማኣሮ ማዠንዳሢ ኔናቴሞ፤ 6 ዒሰራዔኤሌ ዳሮ ጊብፂ ዓጮ ዓይላታፓ ከሲ ታኣኒ ዓውሴሰካፓ ሃኖ ሃላንዳኣና ባፒላና ማዠና ማኣርይዳ ማዓ ዳማ ዳማ ቤዘ ዴንዲ ዴንዲ ታ ናንጌኔ፡ ማኣሪዳ ታ ናንገባኣሴ፤ 7 ዒሰራዔኤሌ ዳሮና ታ ሃንቴ ዋዶና ቢያ ታኣኒ ዶኦሪ ጌሢ ሱኡጎይዳፓ ጾኦኒያ ዚቢቆና ማኣሪ ታኣሞ ማዠንዳጉዲ ታ ዓይሢባኣሴ»

8 «ዬያሮ ታ ዓይላሢ፡ ዳውቴሞ ቢያ ባኮ ዋይሢ ጎዳሢ ሂዚ ጋዓኔ ጌይ ከኤዘ፤ ታ ኔና ማራይ ሄንቃንቴ ዔኪ ታ ዴሮ፡ ዒሰራዔኤሌኮ ሱኡጌ ማሄኔ፤ 9 ኔ ዴንዴ ቤዘ ቢያይዳ ኔኤና ዋላ ታ ማዔኔ፤ ኔ ቤርታፓ ኔኤኮ ሞርኮ ታ ጾሊ ኔና ባሺሴኔ፤ ሃሣ ሃጊያ ሳይይዳ ዔርቴ ዴኤፖ ዴኤፖ ሱኡጎጉዲ ዔርቴ ዓሲ ታ ኔና ማሃንዳኔ። 10 ታኣኮ ዴሮ፡ ዒሰራዔኤሌሞ ፔቴ ቤሲ ታ ዶኦሪ ዒኣካ ዔያታ ናንጋንዳጉዲ ታ ጌሢኔ፤ ዒኣካ ዔያታ ናንጋኣና ዔያቶ ሄርቂ ዋይሃንዳ ዓሲ ባኣሴ፤ 11 ታ ዴሮ ዒሰራዔኤሌሞ ሱኡጌ ታ ዶኦሪሰካፓ ዓርቃያ ማዳ ጎይያ ሃይፓ ሴካ ጾኦኒያ ዬያይዳዓኬ፤ ኔናኣ ኔ ሞርኮፓ ቢያ ታ ካፓንዳኔ። ዬያጉዲ ሃሣ ኔ ማኣራፓ ኔ ካኣቴሞ ዳካላንዳ ናይ ታ ዒንጋንዳኔ ጌይ ከኤዘ፤ 12 ኔ ናንገ ሃይቃያ ኔ ዓዶንሢ ዴኤፖ ቤዘ ዴኤታኣና ኔ ሸዔ ናይ ኔ ቤዘ ታ ከሳንዳኔ፤ ዒዛኮ ካኣቴሞ ታ ዶዲሻንዳኔ። 13 ታኣኮ ጌኤዠ ማኣሮ ማዠንዳሢ ዒዛከ፤ ዒዛኮ ካኣቴሞ ናንገና ናንጋያ ታ ማሃንዳኔ። 14 ታ ዒዛኮ ዓዶ ማዓንዳኔ፤ ዒ ታኣኮ ናኣዚ ማዓንዳኔ፤ ዒ ዔኤቢ ዳቢንቴ ማዳቴያ ዓዴ ናይ ጳርቃሢ ጎይያ ታ ጳርቃንዳኔ፤ 15 ዒዛ ቤዘ ኔ ካኣታዳንዳጉዲ ታኣኒ ሺኢሺ፡ ሳኣጾኦሌ ታ ማዳ ጎይያ ናንገና ናንጋ ናሹሞ ታ ዒዛይዳፓ ሺኢሻዓከ። 16 ኔ ማኣሮና ኔኤኮ ካኣቴሞና ታ ቤርታ ዶዲ ዴዓንዳኔ፤ ኔ ካኣቴማ ናንገና ናንጋያ ማዓንዳኔ።»

17 ዬያ፡ ናንገና ናንጋ ጎዳ ዒዛሞ ፔጋሲ ዳዌ ባኮ ቢያ ናኣታኔ ዳውቴሞ ከኤዘኔ።

7:12 7:12 ዓይኑ. 89:3-4፤ 132:11፤ ዮሃ. 7:42፤ ዳኪ. ማዳ 2:30። 7:14 7:14 ዓይኑ. 89:26-27፤ 2ቆሮ. 6:18፤ ዓ.ብ. 1:5። 7:16 7:16 ዓይኑ. 89:36-37።

ዳውቲ ያኦሲ ጋላቲ ሺኢቄ ሺኢጲያ
(1ያኦሲ. ዓሃኬ 17:16-27)

18 ዬካፓ ካአቲ፥ ዳውቲ ዓፒሎና ማዢንጉቲ ያኦሲ ዳርና ካአማ ማአር ዳንዲ ጌላፖ ዳዒ ሂዚ ጌይ ሺኢቄ፡- «ናንገና ናንጋ ጎዳ ማዔ ያኦዛሂዮ! ሃይማ ሃላኒ ኔ ታና ካፓንዳጉዲ ታ ዓይጎ ዓሲ ታንጉቲዳይ? ማአር ዓሳኣ ታኦኮ ዓይጎ ዓሲዳይ? 19 ናንገና ናንጋ ጎዳ ማዔ ያኦዛሂዮ! ኔ ቤርቶይዳ ያዲ ላኦፓ ማዒ ዓኣንጉቲ ሃሃ ኔኤኒ ባሽ ባኣዚ ማዲ ማዲ ዓኣኔ፤ ኔ ዓይላሂ ናኣቶም ሃጊ ሙካንዳ ዎዶይዳ ሃጊ ማዓንዳ ዎዛ ባኣዚ ኔ ኬኤዜኔ፤ ናንገና ናንጋ ጎዳ ማዔ ያኦዛሂዮ! ዓሲ ቢያም ኔ ማዲ ጎይፃ ያዲዳ? 20 ማይ ታ ማሌ ዓይጎ ጋዓንዳይ? ናንገና ናንጋ ጎዳ ማዔ ያኦዛሂዮ! ኔኤኒ ታና ኔኤኮ ዓይላሂ ዔራኔ። 21 ዬያ ዳኤፖ ባኮ ኔ ጌዔ ጎይፃ፥ ሃሃ ኔ ሽና ጌዔ ጎይፃ ኔ ማዳሂ ኔ ዓይላሂ ዔራንዳጉዲኬ። 22 ናንገና ናንጋ ጎዳ ማዔ ያኦዛሂዮ! ኔኤኒ ዳኤፒኬ፤ ኔጉዳያ ያኦኒያ ባኣሲ፤ ኑ ዎይዜ ጎይፃና ኔ ጊዳፓዓቲም ማሌ ያኦሲ ባኣሲ። 23 ዒዚ ፔ ዳሬ ማዓንዳጉዲ ዓውሳኒ፥ ዒዛ ሱንፃ ዔያታ ዔርቲያ ማሃንዳጉዲ፥ ዒዛ ዎልቆና ማዲንታ ባኣዚና ዓከ ባኣዚያ ማዳኒ፥ ዔያቶኮ ቤርታፓ ሃንጎ ዳርንታ ዬያቶኮ ያኦዛንታ ባይዚ ካኦሲ ጊብፃ ዓጮ ዓይላታፓ ዓውሴ ዒሰራዔኤሌ ዳርጉዲ ዓይጎ ዳሬ ሳይዳ ዓኣይ? 24 ዒሰራዔኤሌ ዓሶ ናንገና ኔ ዳሬ ኔ ማሄኔ፤ ናንገና ናንጋ ጎዳሂዮ! ኔኤኒ ዔያቶኮ ያኦዛሂ ማዔኔ።

25 «ዓካሪ ሃሂ ናንገና ናንጋ ጎዳ ማዔ ያኦዛሂዮ! ታኣና ታ ዜርፃናም ኔ ኬኤዜ ሃጊ ማዓንዳ ዎዛ ቢያ ናንገና ማዲ ኩንሂ፤ ናንገና ኔኤኮ ሱንፃ ዳኤፒ ማዓንዳጉዲ ኔ ጌዔ ባኮ ኩንሂ፤ 26 ሱንፃ ኔኤኮ ዳኤፒ ማዓንዳኔ፤ ዓሲ ቢያ፡- «ቢያ ባኮ ዎይሃ ጎዳሂ ዒሰራዔኤሌ ዓሶ ያኦሲኬ!» ጋዓንዳኔ። ዳውቲኮ ካኣቲሞዎ ኔኤኒ ደዲሺ ዳይሃንዳኔ። 27 ዒሰራዔኤሌ ያኦዛሂዮ! ቢያ ባኮ ዎይሃ ጎዳሂዮ! ታና ኔ ዓይላሂም ኔኤኒ ዬያ ቢያ ፔጋሲ ዳዎሂር፤ ሃሃ ታኦኮ ዜርፃዎ ኔ ካኣታሳኒ ኬኤዜሂር ሃያ ሺኢጲያ ጫርቄ ታ ኔና ሺኢቄ።

28 «ናንገና ናንጋ ጎዳ ማዔ ያኦዛሂዮ! ኔኤኒ ያኦሲኬ፤ ኔ ጋዓ ባካ ጉሙርሳያኬ፤ ሃሂያ ኔኤኒ ሃያ ኮዦ ባኮ ማዳኒ ኔ ዓይላሂም ሃጊ ማዓንዳ ዎዛ ዒንጌ። 29 ኔ ቤርቶይዳ ቢያ ዎዳ ናንጋያ ማዓንዳጉዲ ኔ ዓይላሂ ማአር ሃዳራ ዓንጃ፤ ናንገና ናንጋ ጎዳ ማዔ ያኦዛሂዮ! ኔ ዓንጃ ዓንጃያና ኔ ዓይላሂ ማአራ ናንገና ዓንጃንጉያ ማዖም።»

7:23 7:23 ላሚ. ዎማ 4:34።

8

ዳውቴ ያሎና ባሺ ባሺያ
(1ያኦሲ. ዓሃኬ 18:1-17)

1 ይካፓ ዳውቴ ፒሊሰጻኤሜ ዓሶ ያሊ ባሻዖ ዓሶ ፔ ዴማ ማሄኔ፤ ዲማና ዲዚ ሳዖ ዔያቶኮ ጌሊ ዓርቂ ዔኬኔ።

2 ሄሊሳዖ ሃሃ ሞዓኣቤ ዓሶ ያሊ ባሺኔ፤ ዲዚ ዓርቂ ዔኬ ቱኬ ዓሶ ሳዓ ላይሃዖ ሃይሃ ዓሲዳፓ ላምዖ ዓሲ ዔኬ ዔኬ ሃይቃንዳጉዲ ዋጊ ዋዲሻኔ፤ ዩያሮ ሞዓኣቤ ዓሳ ዲዛም ዋርቃያ ማዒ ጊኢራኔ።

3 ጊንሣ ሃሃ ዲዚ ሶኦሪያ ዓጮ ዴማ ዓኣ፣ ያኦባ ዓጮኮ ካኣቲ ሬሆቤ ናኣዚ ሃዳድዔዜሬ ያሊ ባሺኔ፤ ሃዳድዔዜሬ ያሎና ባሺንቴሣ ኬደ ዛሎ ዔፕራጂሴ ዋሮኮ ዓኣ ዲዛ ዓጮ ማሂ ዔካኒ ዓኣዲቤቃኬ።

4 ዳውቴ ሃዳድዔዜሬኮ ፔቴ ሺያና ላንካይ ጻኤታ ፓራሣና ያላ ዓሲ፤ ላማታሚ ሺያ ቶኪና ሃንቲ ያላ ዓሲ ዲዒ ዔኬኔ። ሳርጌሎ ያይቶ ጎቻንዳ ፔቴ ጻኤታ ፓሮ ዓይሳዖ ሃንጎዋቶኮ ጉቤ ቃዎ ቲቂ ቲቂ ማኣሳንሣኔ።

5 ዲማና ዴማሰቆይዳ ናንጋ፣ ሶኦሪያ ዓሳ ካኣቲ ሃዳድዔዜሬ ማኣዲኒ ፖኦሊሴ ዳካዛ ዳውቴ ዩያቶ ያሊ ላማታሚ ላምዖ ሺያ ዓሲ ዋዳኔ። 6 ይካፓ ዔያቶ ዓጮ ጋሮይዳ ፖኦሊሳ ዲንኪ ዲንኪ ዴዓንዳ ቤሲ ኮሺኔ፤ ዩያሮ ሶኦሪያ ዓሳ ዲዛ ዴማ ዋርቂ ዲዛም ጊኢራኔ፤ ናንጊና ናንጋ ጎዳ ዳውቴ ዴንዳ ቤዞ ቢያይዳ ያሎና ባሻንዳጉዲ ማሄኔ። 7 ዳውቴ ሃዳድዔዜሬኮ ያሎ ዓሶ ዓይሣ ዓሳ ዓርቂ ዓኣ ዋርቆና ኮሾና ጊቲሞ ዲዒ ዔኬ ዩሩሳላሚ ዴንዳኔ፤ 8 ዩያጉዲ ሃሃ ሃዳድዔዜሬ ዋይሣ፣ ቤፃሄና ቤሮታዬ ጌይንታ ካታሞንሣፓ ዲቢ ሞኦና ዓንገ ዔኬኔ።

9 ሃዳድዔዜሬኮ ፖኦሊሶ ጉቤ ያሎና ዳውቴ ባሺሣ ሃማቲ ካኣቲ፣ ቶዒ ዋይዜኔ። 10 ሃዳድዔዜሬ ያሎና ባሺንቴሣፒር ዒ ዋዛዴያታሣ ዔርዛንዳጉዲ፤ ሃሃ «ዋዚ ዓኣይ?» ጌይ ያኦጫንዳጉዲ ዲዛኮ ናኣዚ ዮራሜ ዳውቴ ኮይሳ ዒ ዳኬኔ፤ ዩያኮ ቤርታ ቶዒ ጎዖሣ ሃዳድዔዜሬና ዋሊ ያላያኬ፤ ዮራሜ ዲማና ዋርቁንታ ቢራ ዓንገንታ ሃሃ ሞኦና ዓንገና ኮሾና ዴማ ዴማ ባኣዚ ዲንጋኒ ዳውቴም ዔኬ ሙኬኔ። 11-12 ካኣቲ ዳውቴ ያሎና ባሺ ዔዶኦሜፓ፣ ሞዓኣቤፓ፣ ዓሞኦኔፓ፤ ዩያጉዲ ፒሊሰጻኤሜንታ ዓማሌቁንታፓ ዲዒ ዔኬ ቢሮ ዓንጎና ዋርቆና ሃዳድዔዜሬፓኣ ዒ ዔኬ፣ ዲዒንቴ ባኮ ናንጊና ናንጋ ጎዳም ዴማሲ ዒንጌኔ።

13 ሶኦጌ ደኣቲ ጌይንታ ቤዛ ታጳ ሳሊ ሺያ ዔዶኦሜ ዓሲ ዳውቴ ዋዲ ማዓዖ ቤርታኣሰካፓ ባሺ ዔርቲ ዴኤፒ ዓሲ ማዔኔ፤ 14 ይካፓ

ደውቴ ፖኦሊሳ ዲንኪ ዳዓንዳ ደቢ ቤሲ ዔደአማይዳ ኮሺኔ፤
ዒኢካ ናንጋ ዴራ ዒዛ ዳማ ማዒ ዒዛም ገኢሬኔ፤ ደውቴ ዳንዴ
ቤዘይዳ ቢያ ያሎና ባሻንዳጉዲ ናንገና ናንጋ ጎዳ ዒዛ ማኣዴ።

15 ዬያይዲ ደውቴ ዒሰራዔኤል ዓጮ ቢያይዳ ካኣቲ ማዓዖ
ፒዜ ዋጌ ዋጊንታንዳጉዲ ቢያ ኬሊ ካራ ኮዓኔ፤ 16 ዒማና ፃረያ
ናኣዚ፣ ዒዮዓቤ ፖኦሊሶ ሱኡጋሢ ማዓዛ ዓሂሉዴ ናኣዚ ዒዮሳፒፃ
ካኣቲ ሄሊሲ ቢታንቶ ዓኣ ዓሲኬ፤ 17 ዓሂፀቤ ናኣዚ፣ ሳዴቄና
ዓቢያታሬ ናኣዚ፣ ዓቢሜሌኬና ቄኤሶኬ፤ ሴራያ ጎዖሢ ካኣቲሞ
ማኣራ ፃኣፖ ባኣዚ ፃኣፓያኬ፤ 18 ዮዳሂ ናኣዚ፣ ቤናያ ደውቴ ካፓ
ፖኦሊሶ ዓይሣያኬ፤ ደውቴኮ ናኣታ ዒማና ቄኤሴ ማዒ ማዳኔ።

9

ደውቴና ሜሪባዓኣሌ ጎዖሢና

1 ፔቴ ኬሊ ደውቴ፡- «ሳኣዖኦሌ ማኣሮ ዓሶፓ ሃይቁሞዖ ዓቲ ዓሲ
ዓኣቲ ዮናታኣኔሮ ጌይ ታኣኒ ኮሺ ባኣዚ ማዳንዳኔ» ጌይ ያኦጮኔ።

2 ዒማና ሳኣዖኦሌ ማኣሮ ዓሶፓ ደባ ጌይንታ ፔቴ ማዳ ማዳሰኬይ
ዒኢካ ዓኣንጉቴ ዒዚ ደውቴ ኮይሳ ዳንዳንዳጉዲ ዓሳ ዒዛም
ኬኤኬኔ፤ ዒ ደውቴ ኮራ ሙካዛ ደውቴ፡- «ኔኤኒ ፃባዳ?» ጌይ
ያኦጮኔ።

ደባ ማሃዖ፡- «ሂዮ፣ ጎዳሂዮ! ታና ኔ ዓይላሂሞይ!» ጌዔኔ።

3 ካኣቲ ዒዛ ኮራ፡- «ናንገና ናንጋ ጎዳ ናሽካ፣ ኮሺ ባኣዚ ታኣኒ
ማዳንዳጉዲ ሳኣዖኦሌ ማኣራፓ ሃይቁሞዖ ዓቲ ዓሲ ዓኣ?» ጌይ
ያኦጮኔ።

ደባ ማሃዖ፡- «ዮናታኣኔኮ ዓቲንቆ ናኣቶፓ ፔቴ ዓቲንቄ ሃሢ ሄላኒ
ሺምፔና ዓኣኔ፤ ዒዚ ቶኪ ሞሶኬ» ጌዔኔ።

4 ካኣቲ፡- «ሃሢ ዒ ዓንካዳይ?» ጌይ ያኦጮኔ።

ደባ ዒማና፡- «ሎዴባሬይዳ ዓሚዔኤል ናኣዚ ማኪሬ ማኣራ
ዓኣኔ» ጌዔኔ። 5 ዬያሮ ካኣቲ ደውቴ ሎዴባሬይዳ ዓኣ ዓሚዔኤል
ናኣዚ፣ ማኪሬ ማኣራፓ ሜሪባዓኣሌ ዔኪ ዬይሴኔ።

6 ሳኣዖኦሌኮ ናኣዚ ናዖ ማዔሢ፣ ዮናታኣኔ ናኣዚ ሜሪባዓኣሌ
ሙካዖ ደውቴኮ ቤርታ ሳዓ ላሂ ቦንቾ ዔኤላሂ ዔኤሊ ቦንቻያ
ማዔሢ ዔርዘኔ።

ደውቴ ዒዛ፡- «ሜሪባዓኣሌ!» ጌይ ዔኤሌኔ።

ሜሪባዓኣሌ፡- «ዮ፣ ጎዳሂዮ! ታኣኒ ኔ ዓይላሂሞይ!» ጌዔኔ።

9:1 9:1 1ሳሙ. 20:15-17። 9:3 9:3 2ሳሙ. 4:4።

7 ደውቱ ዒዛም፡- «ዒጊጨፈፈ! ኔ ዓደ፡ ዮናታኣኔር ጌይ ታኣኒ ኮሺ ባኣዚ ኔኤም ማዳንዳኔ፤ ኔ ማዎ ሳኣዎኦሌር ማዔ ጎዡ ቢያ ታ ኔኤም ማሂ ዒንጋንዳኔ፤ ቢያ ዎዴ ኔ ታኣና ዎላ ዴዒ ሙዓንዳኔ» ጌዔኔ።

8 ዩካፓ ሜሪባዓኣሌ ቦንቾ ዔኤለሂ ዔኤለዎ፡- «ጎዳሂዮ፡ ታኣኒ ሃይቄ ካኒፓ ባሻያቱዋሴ፤ ዓካሪ ኔ ታኣም ሃያ ኮይሱዋ ኮዡ ማዶ ዒይጋ ማዳዎ?» ጌዔኔ።

9 ደውቱ ሳኣዎኦሌኮ ዓይላሂ፡ ዪባ ዔኤለዎ፡- «ሳኣዎኦሌና ዒዛኮ ማኣር ዓሶር ማዔ ዓይጎ ባኣዚያ ኔ ጎዳኮ ናኣዚ ናይ ማዔ፡ ሜሪባዓኣሌም ታ ዒንጋኔ፤ 10 ዬያር ኔናንታ ኔኤኮ ዓቲንቆ ናኣቶንታ ኔኤኮ ዓይሎንታ ኔ ጎዳሂ፡ ሳኣዎኦሌ ማኣር ዓሶም ጎዡ ጎሽኪ ዔያታ ሙዓንዳጉዲ ሃኣኮ ኮናይዳ ዓርሁዋቱ፤ ኔ ጎዳኮ ናኣዚ ናዎ ማዔ፡ ሜሪባዓኣሌ ጋዓንቲ ቢያ ዎዴ ታኣም ዒንጎ ካሃ ታኣና ዎላ ሙዓንዳኔ» ጌዔኔ፤ ዪባኮ ዒማና ታጳ ዶንጎ ዓቲንቆ ናይና ላማታሚ ዓይሌና ዓኣኔ።

11 ዪባ፡- «ካኣቲዮ! ታ ኔ ዓይላሂ ኔ ዓይሂ ባኮ ቢያ ማዳንዳኔ» ጌዔኔ።

ዬያይዲ ሜሪባዓኣሌ ካኣቲ ናኣቶፓ ፔቲያጉዲ ማዒ ካኣቲና ዎላ ዒንጊንቲ ሙዎ ሙዓኔ። 12 ሜሪባዓኣሌኮ ሚካ ጌይንታ ዴጌ ናይ ዓኣኔ፤ ዬማፓ ዓርቃዎ ዪባኮ ማኣር ዓሳ ጉቤ ሜፐሶሾቲም ዓይሌ ማዔኔ፤ 13 ዬያር ላምዎ ቶካ ዎቦ ማዔ፡ ሜሪባዓኣሌ ካኣቲና ዎላ ሙይ ሙይ ዬጉሳላሚይዳ ናንጌኔ።

10

ደውቱ ዓሞኣኔ ዓሶንታ ሶኦሪያ ዓሶዋ ያሊ ባሼሂ (1ያኦሲ. ዓሃኬ 19:1-19)

1 ዩካፓ ዓሞኣኔ ካኣቲ፡ ናዎሴ ሃይቄም ዒዛኮ ናኣዚ ሃኦኔ ዒዛ ቤዛ ካኣታዴኔ፤ 2 ዒማና ካኣቲ ደውቱ፡- «ዒዛኮ ዓደ፡ ናዎሴ ታኣም ማዶ ጎይዎ ታኣኒ ዒዛም ጉሙርቁንታ ላጌ ማዒ ኮሺ ባኣዚ ማዲ ማሃንዳኔ» ጌዔኔ። ዬያር ዒዛኮ ዓዴ ሃይቄሂር ያያያ ማዔሂ ኬኤዛንዳጉዲ ኪኢታ ዓሲ ደውቱ ዳኬኔ።

ኪኢቶ ዓሶንሂ ዓሞኣኔ ዓጮ ሙካዛ፡ 3 ዓሞኣኔ ዓሶኮ ሱኡጋ ካኣቲ ኮይላ፡- «ደውቱ ሃያ ዓሶ ኔ ኮይላ ዳኬሂ ጎኔ ኔ ዓዴ ሃይቄሂር ቦንቾ ያያያ ማዔሂ ዔርዛኒኬ ጌይ ኔኤኒ ማላ? ያዲቱዋሴ! ዒዚ ሃንሂ ኪኢቶ ዓሶንሂ ዳኬሂ ካታሞ ያላኒ ቤርታዲ ሙርም ጌይኬ!» ጌዔኔ።

4 ዬያር ሃኦኔ ደውቱኮ ኪኢቶ ዓሶንሂ ዓርቁ ቡኡጮኮ ፔቲ ዛሎ ሜኤዴኔ፤ ሃሃ ዔያታ ማኣዔ ማኣዓሂያ ኬርና ሄሊሲ ቲቂ

ደውሲ ዳኬኔ፤ 5 ያዲ ማዕሢር ዩንሢ ሳሶንሢ ማኣሪ ማዒ ሙካኒ
ባጊጩኔ፤ ጋባንቴ ደውቴ ዬያ ባኮ ዋይዛያ ኪኢታ ባሲ ዳኪ
ዔያቶኮ ቡኡጫ ከሰካንዲያ ሄላንዳኣና ማዒ ሙኩዋያ ዒያርኮይዳ
ዴባንዳጉዲ ከኤዜኔ።

6 ዒማና ዓሞኦኔ ባሳ ፔ ኩቻ ደውቴና ዋላ ሞርኬ ዔያታ
ማዕሢ ዔሬኔ፤ ዬያር ቶኪና ሃንቴ ያላንዳ ፖኦሊሴ ቤትሆቤና ያባናፓ
ላማታሚ ሺያ ሶኦሪያ ባሲ፤ ሃሣ ጊንሣ ያቤፓ ታጶ ላምያ ሺያ ባሲ፤
ዬያጉዲ ሃሣ ካኣቲ፤ ማዕካ ኮይላፓ ፔቴ ሺያ ባሲ ሚኢሹ ጨጊ
ያሊሳኒ ዔኪ ሙኩኔ፤ 7 ደውቴ ዬያ ዋይዛያ ዒዛኮ ጉቤ ፖኦሊሶና
ዋላ ዴንዲ ዒዮባቤ ዔያቶ ያላንዳጉዲ ዓይሣኔ፤ 8 ዒማና ዓሞኦኔ
ባሳ ያሎር ጊኢጊ ሙኪ ፔኤኮ ዴኤፖ ካታሞ፤ ራኣባ ጌሎ ካራ ቤሲ
ዓርቃዛ ሃንጎ ሱኡባ ባሳ፤ ሬዓኣባ ባሳ፤ ሶኦሪያ ባሳ፤ ያቤንታ ማዕካ
ዓሶንታ ሙኪ ፔቴ ቦኣሊዳ ቤሲ ቤሲ ዓርቄ።

9 ዒዮባቤ ሞርኮኮ ፖኦሊሶ ቤርቲና ሃሣ ጊንሢናኣ ያላኒ ጊኢጊሢ
ዛጋያ ዒሰራዔኤሌኮ ፖኦሊሶይዳፓ ያሎና ዔርቲ ባሲ ዶኦሪ ሶኦሪያ
ዓሶኮ ሆታ ጊኢጋ ቤሲዳ ዔቂሴኔ፤ 10 ሃንጎ ፖኦሊሶ ጋባንቴ ዒዛኮ
ጌርሲ ዓቢሻዬ ዓይሢ ያሊሳንዳጉዲ ማሄኔ፤ ዓቢሻዬ ዬያቶ ዓሞኦኔ
ዓሶኮ ሆታ ማሄ ዔቂሴኔ፤ 11 ዒማና ዒዮባቤ ዓቢሻዬሞ፡- «ሶኦሪያ
ባሳ ያሊ ታና ባሻኒ ዑኬያ ማዔም ኔ ዴንቄቴ ሙኪ ታና ማኣዴ፤
ታኣኒ ሃሣ ኔና ዓሞኦኔ ባሳ ባሻኒ ዑኬያ ማዔም ዴንቄቴ ሙኪ
ማኣዳንዳኔ። 12 ዬያር ባጊጩፖ፤ ደዴ! ኑ ዴርና ኑ ያኦዛሢ
ካታሞናር ደዲ ኑ ያልቶም! ቢያ ባካ ናንጊና ናንጋ ጎዳ ጌዔሢጉዴያ
ማፖንጎ!» ጌዔኔ።

13 ዬካፓ ዒዮባቤንታ ፖኦሊሶንታ ያላኒ ሶኦሪያ ባሶ ባንሢ
ሙካዛ፤ ሶኦሪያ ባሳ ቤርታፓ ዔያቶኮ ጳሽኬኔ፤ 14 ዓሞኦኔ ባሳኣ
ሶኦሪያ ባሳ ጳሽኬሢ ዴንቃያ ዓቢሻዬ ቤርታፓ ጳሽኬ ካታሞ ባንሢ
ጊንሢም ዴንዴኔ። ዬያይዴሰካፓ ዒዮባቤ ዓሞኦኔ ባሶ ያሎ ሃሺ
ዬሩሳላሚ ማዒ ዴንዴኔ።

15 ዒሰራዔኤሌ ባሳ ዔያቶ ያሎና ባሺሢ ዛጋያ ሶኦሪያ ባሳ ፔኤኮ
ፖኦሊሶ ቢያ ፔቴይዳ ቡኩሴኔ፤ 16 ያባይዳ ዓኣ ካኣቲ፤ ሃዳድዔዜሬ
ዔፕራዒሴ ዋርኮ ባባ ከሰካ ዛሎይዳ ዓኣ ሶኦሪያ ባሶም ኪኢታ
ዳኬኔ፤ ዬያር ሃዳድዔዜሬ ፖኦሊሶኮ ሱኡጋሢ፤ ሾባኬ ዔኪ ዔያቶ
ሄላሚ ሙኩኔ። 17 ደውቴ ዬያ ዋይዛያ ዒሰራዔኤሌ ባሶኮ ፖኦሊሶ
ቢያ ቡኩሴ ዮርዳኖሴ ዋርኮ ሶ ሱኮ ፒንሣኔ፤ ዬካፓ ሶኦሪያ ባሳ
ዴንኪ ዓኣ ሄላሚ ዔያታ ዴንዳዛ፤ ሶኦሪያ ባሳ ከሰኪ ደውቴ ያሌኔ፤
18 ጋባንቴ ዒሰራዔኤሌ ባሳ ሶኦሪያ ባሶ ደውሴኔ፤ ዒማና ደውቴንታ
ዒዛኮ ፖኦሊሶንታ ሶኦሪያ ባሶፓ ላንካይ ያኤታ ሳርጌላ ያይታና
ያላ ባሲንታ ያይዲታሚ ሺያ ፓርና ያላ ባሲያ ዋዴኔ፤ ዬያጉዲ

ሃሣ ሞርኮ ፖኦሊሶኮ ሱኡጋሢ፣ ሾባኬያ ዔያታ ዲኬሢሮ ዒኢካ ስሎ ቤዛ ዒ ሃይቄኔ። 19 ሃዲድዔዜሬ ቢታገቶ ዴማ ዓኣ ካኣታ ዒሰራዔኤሌ ዓሳ ስሊ ዔያቶ ባሼሢ ዔራፖ ዒሰራዔኤሌ ዓሰና ዋላ ጊኢጊ ዒሰራዔኤሌ ዓሰ ዴማ ዋርቃያ ማዔኔ፤ ዩካፓ ሰኦሪያ ዓሳ ዒጊጠፎሢሮ ዓሞኦኔ ዓሰ ማኣዲኒ ኮዒባኣሱ።

11

ዳውቴና ቤርሳቤሆና

1 ዓኮ ሌዓ ዓርቃንዳሢኮ ቤርታ ሲላ ዓጊኒዳ፣ ካኣታ ስልዚሮ ኬሰካ ዋዶና ዳውቴ ፖኦሊሶኮ ሱኡገና ዒሰራዔኤሌ ፖኦሊሶ ፑቤሢና ዋላ ዴንዲ ስላንዳጉዲ ዒዮዓቤ ዳኬኔ፤ ዔያታ ዴንዲ ዓሞኦኔ ዓሰ ስሊ ባሺ ራኣባ ካታሞ ማገገኔ፤ ዳውቴ ጋዓንቴ ዒማና ዩሩሳላሜይዳ ዓቴኔ።

2 ፔቴ ኬሊ ዓባ ሳዛፓ ሺሬንቴ ዳውቴ ሮኦራኣ ጊንፖ ዳካ ጊንዔፖ ዔቄ፣ ዒዛኮ ካኣቱሞ ማኣሮኮ ዑፃ ዓኣ ዴጌ ቤዛ ኬሰከ፣ ዒኢካ ሃንቲቤቃ ፔቴ ላኣሊሰኬና ዑሢ ማሰታንቴ ዴንቄኔ፤ ዩና ላኣሌላ ሚርጌና ሚዛጲ ላኣሊኬ፤ 3 ዩያሮ ዒዛ ስናታቴያ ዔራኒ ዓሲ ዳኪ ቤርሳቤሆ ጌይንታያ ዔለሚናኣዚ፣ ሂኢታዓሢ ስሪዮ ማቸታሢ ዒዚ ዔሬኔ፤ 4 ዒማና ዒዛሞ ዒዛ ዴንዲ ዔኪ ዩዓንዳጉዲ ዒዚ ዓሲ ዳኬኔ፤ ዩንሢ ዓሰንሢ ዴንዲ ዒዛ ዔኪ ሙካዛ ዒዛ ቫቲንቄ ዓኣንቴ ዒዚ ዒዛና ዋላ ላሃኔ፤ ዩካፓ ዒዛ ፔ ማኣሪ ማዒ ዴንዴ። 5 ዳካ ጋዓፖ ዒዛ ጎጳዴሢ ዔሪ ኪኢታ ዓሲ ዒዛሞ ዳኬኔ።

6 ዳውቴ ዩያ ዋይዛ፡- «ሂኢታ ዓሢ፣ ስሪዮ ታኣሞ ዳኬ» ጌይ ዒዮዓቤሞ ኪኢታ ዳካዛ፣ ዒዮዓቤ ስሪዮ ዳውቴ ኮይላ ዳኬኔ፤ 7 ስሪዮ ሙካዛ ዳውቴ፡- «ዒዮዓቤንታ ፖኦሊሶንታ ቢያ ዋዚዳይ? ስላ ዋዋይታይ?» ጌይ ስኦጠፎኔ። 8 ዩካፓ ዳውቴ ስሪዮሞ፡- «ዓካሪ ዴንዲ ቶኮ ኔኤኮ ማሰቲ ሃውሹ» ጋዓዛ፣ ስሪዮ ዳውቴ ኮራፓ ኬሰኪ ዴንዴ፤ ዒማና ዳውቴ ኔጉዋፖ ዒዚ ፔ ማቸና ዋላ ሙዓንዳጉዲ ሙኡዚ ጊንፖ ዳኬኔ፤ 9 ስሪዮ ጋዓንቴ ፔ ማኣሪ ዓኣዲሞ ካኣቲ ካፓ ፖኦሊሶና ዋላ ካኣቱሞ ማኣሮኮ ዲሮ ካራ ላሂ ዋርቄኔ፤ 10 ዒማና ስሪዮ ማኣሪ ዓኣዲባኣሢ ዳውቴ ዋይዛ፡- «ሚርጌ ዋዴ ማኣሮ ዓሰፓ ዲማዲ ናንጌፖ ኔ ሙኬኔ፤ ሂዳፖ ሃሢ ኔኤኒ ማኣሪ ዴንዲባኣሢ ዓይጎሮዳይ?» ጌይ ዒዛ ኮይላ ስኦጠፎኔ።

11 ስሪዮ ማሃ፡- «ዒሰራዔኤሌ ዓሰንታ ዩሁዳ ዓሰንታ ዓፒሎና ማኡና ማኣሮይዳ ዴንኪ ስሎ ቤዛ ዓኣኔ፤ ሃሢ ጩኣቄሞ ሳኣፂናኣ ዔያቶና ዋላ ዓኣኔ፤ ታኣኮ ሱኡጋሢ ዒዮዓቤንታ ዒዛኮ ዴማ ዓኣ

11:1 11:1 1፻ኦሲ. ዓሃኬ 20:1።

ሱኡጎንታ ጾሎ ቤዛ ዱንኪ ዓኣኔ፤ ሂዳጾ ታኣኒ ታ ማኣሪ ዳንዲ ሙይ፡-
ዑሽኪ ሃሃ ታ ማቸናኣ ዋላ ዋይቲ ላሃንዳይ? ኔ ሃይቆ! ዬያጉዬ
ባኣዚ ፔቲታጾ ታ ማዳዓኩ!» ጌዔኔ።

12 ዬካፓ ዳውቲ፡- «ሂዳቶ ሃኖ ሃይካ ፔኤቄ፤ ዚሮ ታ ኔና ማሂ
ዳካንዳኔ» ጌዔሢሮ ጾሪዮ ዬኖ ከሎንታ ሄሌ ከሎዋ ዬሩሳላሜይዳ
ዳዔኔ፤ 13 ዬኖ ዋንቶ ዳውቲ ጾሪዮ ሙኡዚ ዒዛና ዋላ ሙዓንዳጉዲ
ዔኤሊ ሙኡዚ፡ ዋይኖ ዑዠዋ ዑሽ ማሂሴኔ፤ ጋዓንቲ ጾሪዮ
ካኣቲዋ ማኣሮ ካፓ ዓሶና ዋላ ፔኤኮ ዓፒሎ ሂኢሂ ዒኢካ ላሃኔ፤
ማኣሪ ዳንዲባኣሱ።

14 ዚሮ ጉቲሎ ገንሃ ዳውቲ ዒዮዓቤም ዋርቃታ ፃኣፒ ኪኢታ
ጾሪዮ ዑፃ ዳኤኔ፤ 15 ዒ ፃኣፔሂ፡- «ጾላ ደዴ ዛላ ጾሪዮ ዔቁሴ፤
ዬካፓ ዒንሂ ገንሂም ደጪ ዒዛ ዋዲሹዋቲ» ጌይከ። 16 ዬያሮ
ዒዮዓቤ ካታሜሎ ማንጊ ዓርቄ ዓኣጾ ዒ ዔራ፡ ጾላ ደዳ ካሮይዳ
ጾሪዮ ዔቁሴኔ። 17 ሞርኮኮ ፖኦሊሳ ዒማና ካታማፓ ከሰከ ዒዮዓቤ
ዓሶ ጾሊም፡ ዳውቲ ፖኦሊሶ ሱኡጎይዳፓ ዳካ ዓሲ ሃይቄኔ፤ ጾሪዮ
ዬያቶና ዋላ ሃይቄኔ።

18 ዒዮዓቤ ዬካፓ ጾሎ ዛሎ ከኤዛንዳ ዓሲ ዳውቲ ኮራ ዳኤኔ፤
19 ኪኢቶ ዳንዴ ዓሂም ዒዚ ሂዚ ጌይ ከኤዚ ዳኤኔ፤ «ጾሎ ዛሎ
ቢያ ባኮ ካኣቲም ኔ ከኤዛዛ፡ 20 ጎጾንቲ ካኣቲ ዳጋዲ ሂዚ ጋዓንዳያ
ናንዳኔ፡- ሩያቶ ጾላኒ ካታሜሎ ባንሂ ፔቶ ዒንሂ ዓይጋ ዑኩይ?
ካታሞኮ ዓጮ ከልቂ ዲርቆና ዲያ ዑፃ ዔቁ ዔያታ ዒንሂ ሂኢዠና
ዲካንዳሂ ዒንሂ ዔራዋዓዳ? 21 ጌዲዎኔ ናኣዚ፡ ዓቤሜሌኬ ሃይቄ
ጎይፃ ዒንሂ ኮራ ባይቄያ? ቲቤፃ ጌይንታ ቤዛይዳ ፔቲ ላኣሊሰኬና
ካታሞ ከልቂ ዲርቆና ከኤሎ ዑፃፓ ዋንሂ ዒዛይዳ ቡምባልሲ
ዒዛ ዋዳኔ፤ ዬያ ዒንሂ ዔራያታጾ ዓይጎሮ ከልቂ ዲርቆና ዲያ ዳም
ጌሌይ?» ያዲ ጌዒ ካኣቲ ጾኦጮቲ፡ <ፖኦሊሶ ሱኡጎሂ ጾሪዮ
ሃይቄኔ ጌይ ከኤዙዋቲ።>

22 ዬያሮ ኪኢቶ ዓሂ ዳውቲ ኮይላ ዳንዲ ዒዮዓቤ ጌዔ ባኮ
ቢያ ከኤዜኔ፤ 23 ዒዚ ዒማና፡- «ኦኡኮ ሞርካ ኩዲ ደዲ ኦና ጾላኒ
ካታማፓ ከሰከ ቦኦሎ ሙኡኤኔ፤ ኦኡኒ ጋዓንቲ ዔያቶ ዳውሲ ካታሞ
ጌላ ካሮና ማሂ ገንሂ ዳኤኔ። 24 ዬካፓ ዔያታ ከኤሎ ዲያ ዑፃ ዔቁ
ሂኢዠና ኦና ዳኤኔ፤ ካኣቲዮ! ኔኤኮ ፖኦሊሶፓ ዳካ ዳካ ዓሲ ዒኢካ
ሃይቄኔ፤ ኔ ዓይላሂ ጾሪዮ ሃይቄኔ» ጌዔኔ።

25 ዳውቲ ዒማና ኪኢቶ ዓሂም፡- «ጾልዚዳ ጾኣኒ ሃይቃንዳቲያ
ቤርታዲ ዔርቲዋኣሂሮ <ዒጊጪፖ፡ ደዴ!» ጌይ ዒዮዓቤም ከኤዜኔ፤
ዒዚ ጾዩዋጉዲ፤ ጋዓንቲ ደዲ ዒዚ ጾሊ ካታሜሎ ዓርቃንዳጉዲ
ላቲ ዒዛም ከኤዜ» ጌይ ዓይሂ ዳኤኔ።

26 ጾሪዎች ማቻ፡ ቤርሳቤሃ ዲዛኮ ዓኒ ወደናሢ ወይዘሮ ዬኤኪ ያዩኔ፤ 27 ሲያጋጥሟት ዳውቴ ዓሲ ዳኪ ፔኤኮ ካኦቱሞ ማኣሪ ዲዛ ኤኪ ሙከኔ፤ ዲዛ ዲዛኮ ማቻ ማዒ፡ ዓቲንቁ ናይያ ዲዛሞ ሾዔኔ፤ ጋዓንቱ ዳውቴ ማዕ ባካ ናገሊና ናገጋ ጎዳ ያዩሴኔ።

12

ናኣታኔ ዳውቴ ጎሪሢ

1 ናገሊና ናገጋ ጎዳ ፔ ማሊያ ከኤዛሢ፡ ናኣታኔ ዳውቴ ኮይላ ዳኤኔ፤ ናኣታኔ ዲማና ዳውቴ ኮይላ ሙካዮ፡- «ፔቱ ካታማይዳ ናገጋ ለምዖ ዓሲሰከንሢሢ ዓኣኔ፤ ዔያቶይዳገ ፔቱሢ ያርጎቹ፡ ባጋሢ ማንቆኬ፤ 2 ያርጎጮ ዓሢኮ ሚርጌ ባይና ማራይና ዓኣኔ፤ 3 ማንቆ ዓሢኮ ጋዓንቱ ዲዛ ሻንቁ ዔኬ፡ ፔቱ ዑዞ ማራይሰከማ ዓኣኔ፤ ዬያር ዲዛ ዲማ ኮሺ ዛገ ጋራ ፔኤኮ ናኣቶና ዎላ ዲቻኔ፤ ዲዛ ሙዓ ሙዖ ሙኤዚ፡ ዑሸካ ባኮዎ ዑሻኔ፤ ዲዛ ለሃዖዎ ፔ ዳማ ዓርቂ ለሃኔ፤ ዬማ ማራዖማ ዲዛኮ ዓዳ ናዖጉዲ ከ፤ 4 ፔቱ ከሊ ያርጎጮሢ ማኣሪ ሾኦቹ ሙካዛ፡ ዬይ ዓሢ ዬያ ሾኦጮሢ ፔኤኮ ቆልሞይዳገ ፔቱ ሹካኒ ኮይባኣሴ፤ ጋዓንቱ ዲዛ ዬያ ማንቆ ዓሢኮ ማራዖማ ዔኪ ሾኦጮሢ ሾኦቹንሢ» ጌዒ ኮኣከንሢ ሃይሴ ከኤዘኔ።

5 ዳውቴ ዲማና ዬይ ያርጎጮሢ ማዕኔ ጋዓ ሃይሶና ሚርጌና ዳጋዲ፡- «ናገሊና ናገጋ ጎዳ ሃይቆ! ዬያይዴ ዓሢ ዎዎዲንታንዳያ ኮይሳኔ! 6 ዬያይዲ ሚጪንቱዎ? ማዕ ዓሢሢ ዬማ ፔቱ ማራዖማ ዛሎ ያይዶ ማራይ ጪጋንዳያ ኮይሳኔ!» ጌዔኔ።

7 ናኣታኔ ዳውቴም፡- «ዬይ ዓሢ ኔናኬ! ናገሊና ናገጋ ጎዳ ማዔ ዲሰራዔኤሌኮ ያኣዛሢ ሂዚ ጋዔኔ፤ ታ ኔና ካኣታሢኔ፤ ሳኣዖኦ ከጮጋኣ ታ ኔና ዓውሴኔ፤ 8 ዲዛኮ ካኣቱሞ፡ ሃሃ ላኣሎዎ ዲዛኮ ታ ኔኤም ዲንጌኔ፤ ዲሰራዔኤሌና ዪሁዳ ዓጮናይዳ ታ ኔና ካኣታሢኔ፤ ዬይ ቢያ ኔኤም ዎንዳ ገዲዎያ ማዔያታቱ ቃሲ ጳንጮ ማሂ ታ ኔኤም ዲንጋንዳንቱከ፤ 9 ጋዓንቱ ኔኤኒ ታ ዓይሢያ ቦሃሢ ዓይጎርዳይ? ሃያጉዳ ፑርታ ባኣዚ ኔ ዓይጋ ማዕይ? ያሎይዳ ዳኪ ያሪዮ ኔ ዎዲሼኔ፤ ዬያ ዓሢ ዓሞኦኔ ዓሶና ኔ ዎዲሺ፡ ማቻ ዲዛኮ ኔ ዔኬኔ! 10 ኔኤኒ ታኣም ዓይሢንቲባኣሢሮ፡ ሃሃ ያሪዮ ማቻዎ ኔ ዔኬሢሮ ኔ ማኣርይዳ ፑርታ ጎይሢና ዎዲንታ ዓሲ ባይቃዓከ፤ 11 ኔ ማኣራ ሜታ ማዢንታንዳጉዲ ታኣኒ ማሃንዳሢ ታ ኔኤም ጎናሲ ከኤዛኔ፤ ኔኤኮ ላኣሎ ታ ዔኪ ሜሌ ዓሲም ዲንጋ ዎዶና ዬይ ባካ ማዲንቲ ከሞ ከማሢ ኔ ዔራንዳኔ፤ ዬይ ዓሢ ኔኤኮ ላኣሎና ዎላ

12:1 12:1 ዓይኑ. 51::

ሮኦራ ፔጋ ላሃንዳኔ። 12 ኔኤኒ ሃሢ ሃያ ጎሞ ዓኣቲ ማዳኔ፤ ታኣኒ ጋዓንቲ ዒሰራዔኤል ዓሳ ቢያ ዛጋንዳጉዲ ዬያ ባኮ ሮኦራ ፔጋ ማዲሻንዳኔ» ጌዔኔ።

13 ዳውቲ ዒማና፡- «ጎሜ ማዲ ናንጊና ናንጋ ጎዳ ታኣኒ የዩሴኔ» ጌዔኔ።

ናኣታኔ ጊንሣ ዳውቲም፡- «ናንጊና ናንጋ ጎዳ ኔኤኮ ጎሞ ዓቶም ጌዔሢረ ኔ ሃይቃዓኬ፤ 14 ጋዓንቲ ዬያ ጎሞ ኔ ማዲ፣ ናንጊና ናንጋ ጎዳ ቦሃሢረ * ናዓሢ ኔኤኮ ሃይቃንዳኔ» ጌዔኔ። 15 ዩካፓ ናኣታኔ ፔ ማኦሪ ማዒ ዳንዳኔ።

ዳውቲ ናዓሢኮ ሃይቦ

የሪዮ ማቻ ዳውቲም ሸዔ ናዓሢዳ ናንጊና ናንጋ ጎዳ ፑርታ ደርዖ ዓጌኔ፤ 16 ዬያር ዳውቲ ዒዛኮ ናዖ የኦሲ ፖዒሳንዳጉዲ ሙኡዚ ሃሺ፣ ሃሣ ሺኢዲሢ ሺኢቄኔ፤ ቢያ ኬሊ ዋንቶ ዋንቶ ዒ ላሃ ቆልዖ ጌሌሰካፓ ሻኦሎ ሃሺ ሳዓ ላሃኔ፤ 17 ዒዛኮ ደንዛ ዒዛ ኮይላ ሙኪ ሳዓፓ ዒዛ ዔቁሳኒ ጌዔንቲ ዒዚ ሳዓፓ ዔቁ ዔያቶና ዋላ ሙዋ ባኣዚያ ሙዖ ዒፃኔ፤ 18 ዬያይዲ ናዓሢ ሃርጊንቲ ዳዓዖ ለንካሳ ኩሌይዳ ሃይቄኔ፤ ዬያር ዒዛኮ ዓይላ ናዓሢ ሃይቄሢ ዒዛም ኬኤዛኒ ዒጊጫዖ፡- «ናዓሢ ሸምፔና ዓኣንቲታዖ ኑ ዘሪም ዒ ዋይዘባኣሴ፤ ሃሢ ናዓሢ ሃይቄሢ ኑ ዒዛም ዋይቲ ኬኤዛንዳይ? ጎዖንቲ ዒ ፔና ዔኤቢ ዋኦታንዳም?» ዋሊ ኮይላ ጋዓኔ።

19 ዳውቲ ዒማና ዓሳ ካሽካሻሢ ዋይዘዖ ናዓሢ ሃይቄያታሢ ዔሬኔ፤ ዬያር ዒዚ፡- «ናዓሢ ሃይቄያ?» ጌይ ዔያቶ የኦጩኔ። ዔያታ፡- «ሂዮ፣ ሃይቄኔ» ጌዔኔ።

20 ዩካፓ ዳውቲ ላሄ ቤዛፓ ዔቁ፣ ዑዖ ፔኤኮ ማሰቲ፣ ቲሺያ ቲሽቲኔ፤ ማኣዓሢያ ላኣሚ ማይንቲ፣ ናንጊና ናንጋ ጎዳኮ ጌኤዢ ማኦሪ ዳንዲ ዘጊ የኦሲ ካኣሽኬኔ፤ ያዲዲ ማዒ ካኣቲም ማኦር ሙካዖ ሙኡዚ ዒንጋንዳጉዲ የኦጩ፣ ሙኡዚ ዔኪ ሺኢሸዛ ሙዔኔ፤ 21 ዒዛም ማዲ ማዲ ዓሳ፡- «ሃይ ኔኤኒ ኑም ዔርቲዋ ባኣዚ ዓይጎ ማዲሺራይ? ናዓሢ ሸምፔና ዓኣንቲ ኔኤኒ ሙኡዚ ሃሺ ዒዛ ዛሎ ዩኤኮኔ፤ ጋዓንቲ ሃሢ ዒዚ ሃይቃዛ ኔጉዋዖ ኔ ዔኪ ሙዔንቲም!» ጌዔኔ።

22 ዳውቲ ማሃዖ፡- «ናዓሢ ሸምፔና ዓኣንቲ ሙዖ ሃሺ ታ ዩኬሢ ጎኔከ፤ ዬያ ታ ማዳሢ ናንጊና ናንጋ ጎዳ ታና ሚጨንቲ ናዓሢ ታኣኮ ዓውሳንዳያናንዳኔ ጌይኬ፤ 23 ሃሢ ማይ ዒዚ ሃይቄሰካፓ ዓይጋ ታ

12:12 12:12 2ሳሙ. 16:22። * 12:14 12:14 ናንጊና ናንጋ ጎዳ ቦሃሢረ ጋዓዛ፡- ፔቲ ፔቲ ማፃአፓ «ናንጊና ናንጋ ጎዳኮ ሞርካ ዒዛ ሚኢጫንዳጉዲ ኔ ማሄሢሮ» ጋዓኔ።

ሙያ ሃሻንዳይ? ናዓሢ ገንሣ ታ ዳቁሻኒ ማይ ዳንዳዒንታንዳ? ፔቴ ኬሊ ታ ዒዛ ባንሢ ዳንዳንዳይ፤ ዒዚ ታ ባንሢ ማዒ ሙካዓኬ» ገዒኔ።

ሴሎሞንኮ ሾይንቶ

24 ዩካፓ ዳውቴ ዒዛኮ ማቾ፣ ቤርሳቤሆ ደዲሾኔ፤ ሃሣ ዒዛና ዋላ ዒ ላሃም ዒዛ ዒማና ዓቲንቁ ናይ ዒዛም ሾዓዛ ዳውቴ ናዓሢኮ ሱንዖ፡- «ሴሎሞን» ገይ ገሢኔ፤ ናንገና ናንጋ ጎዳ ናዓሢ ናሽኬሢ፡፡ 25 «ዪዲድያ» ገይ ሱንዖ ገሣንዳጉዲ ዒዛ ማሊያ ከኤዛ ናኣታኔ ዓይሢኔ፤ ዬኖ ገይፃ ዔብሬ ዓሶ ሙኤጮና «ናንገና ናንጋ ጎዳ ናሽኬያ» ገይሢኬ።

**ዳውቴ ዖሎና ባሺ ራኣባ ካታሞ ዓርቁሢ
(1ዖኦሲ. ዓሃኬ 20:1-3)**

26 ዒማና ዒያዓቤ ራኣባ ገይንታ፣ ዓሞኦኔ ካኣቲ ናንጋ ካታሞ ዖሊ ዓርቁኔ፤ 27 ዩካፓ ከኢታ ዓሲ ዳውቴም፡- «ራኣባ ታኣኒ ዖሊ ዔያቶኮ ዋኣፃ ደዎ ካራ ዓኣ ዋርዲዮ ዓርቁኔ፤ 28 ሃሢ ዓቲ ፖኦሊሶ ቡኩሲጋፓ ካታሜሎ ዖሊ ኔ ኔኤሮ ዓርቁ፤ ሃንጎ ታኣኒ ካታሜሎ ዖሊ ዓርቁ ታ ሱንሢና ዔኤሊንታንዳጉዲ ማሃንዳኔ» ገዒኔ። 29 ዬያሮ ዳውቴ ፖኦሊሶ ቢያ ቡኩሲ ዔኪ ራኣባ ዳንዳዖ ዖሊ ዓርቁኔ፤ 30 ዳውቴ ዒማና ዓሞኦኔ ዓሶኮ ፆኦዘ ሚልኮሜ ማሊሲ ማዦና ባኮኮ ዋርቁና ኮሺ ቶኦካ ዓጎና፣ ሃይሢታሚ ዖይዶ ከሎ ማዓንዳ ሚዛጰ ባኮ ፔ ቶኦካ ዔኪ ዓጎኔ፤ ዬያጉዲ ሃሣ ዒዚ ሚርጌ ባኣዚ ካታሜሎፓ ዲዒ ዔኬኔ፤ 31 ዬኖ ካታሞ ዳራ ማጋኣዜንታ ኩርኩሮንታ ሄርጋንታ ዔኪ ዲማ ዲማ ማዶ ማዳንዳጉዲ ዒ ዓይሢኔ፤ ዋልቁና ዔያቶ ፀኡቤያ ዲንቁሲ ማዦሲሲኔ፤ ዬያጉዲ ሃሣ ሃንጎ ዓሞኦኔ ካታሞይዳ ዓኣ ዓሶ ቢያ ዒማይዲ ማዲሾኔ፤ ዩካፓ ዒዛንታ ዒዛኮ ፖኦሊሶንታ ዬራሳላሚ ማዒ ዳንዳኔ።

13

ዓምኖኦኔና ቲማኦሮ ጎኦዘና

1 ዳውቴ ናኣዚ፣ ዓቤሴሎሜኮ ሚዛጰ ቲማኦሮ ገይንታፃ ሎይባኣ ገርሰኬና ዓኣኔ፤ ዓምኖኦኔ ገይንታ ዳውቴኮ ናይሰኬይ ቲማኦሮ ናሽኬኔ፤ 2 ሚርጌና ዒዛ ሚዛጰ ማዔሢሮ ዒዛና ላሃኒ ኮዒ ማሊያና ዒዚ ሃርጌኔ፤ ጋዓንቲ ዒዛ ኩሙሢ ዉዲሮ ናይታሢሮ ፔና ካፓያ ገዔም ዒዚ ዒዛና ላሃኒ ዳንዳዒባኣኦ። 3 ዒማና ፔቴ ኮሺ ጨንጮ፣ ዮናዳኣቤ ገይንታያ ዒዛኮ ላገሰኬይ ዓኣኔ፤ ዒዚ ዳውቴኮ ገርሲ ሻማ ናይኬ፤ 4 ዒ ዬይ ዮናዳኣቤ ዓምኖኦኔ ኮራ፡-

«ኔኔኒ ካአቲ ናይታዎ ቢያ ኬሊ ዑፃ ኔኤኮ ዓይጋ ያኑፒንታይ? ሂንዳ ታኦም ኬኤዜ» ጌይ ያኑፒ።

ዓምኖኦኔ ማሃዎ፡- «ታ ጌርሲ ዓቤሴሎሜ ጌር፣ ቲማኦር ታ ናሽኬሢርኬ» ጌዔኔ።

5 ዮናዳኦቤ ዒዛም፡- «ያዲታቱ ሃርጌያ ማሊጋፓ ሻኦሎይዳ ላሂ ናኬ፤ ዓዴ ኔና ያኑፒ፤ ሙካዛ ታ ጌራ፣ ቲማኦር ሙኪ ታና ማይሠንዳጉዲ ሃዳራ ዒዛም ኬኤዜ፤ ዒዛ ሃይካ ታ ኮይላ ሙኪ ታ ዛጋንጉቱ ካሣ ካሢ ታና ኩልሳንዳጉዲ ታ ኮዓኔ» ጌዔ» ጌይ ዘሬኔ።

6 ዬያር ዓምኖኦኔ ሃርጌያ ማሊ ሻኦሎይዳ ፔኤኮ ላሂኔ።

ካአቲ፣ ዳውቴ ዒዛ ያኑፒ፤ ዒዛ ኮይላ ሙካዛ ዒዚ፡- «ታ ጌራ፣ ቲማኦር ሃይካ ታ ኮይላ ሙኪ ታ ዛጋንጉቱ ላምዎ ላኦዳ ላኦዲ ታኦም ዒንጋንዳጉዲ ዒዛ ዓይሣቴራ» ጌዔኔ።

7 ዬያር ዳውቴ ዒዛኮ ካአቲም ማኦርይዳ ዓኣ፣ ቲማኦርም፡- «ኔ ጌርሲ ዓምኖኦኔ ማኦር ዴንዲ ካሣ ዒዛም ካሢ ዒንጌ» ጋዓ ከኢታ ዳኬ። 8 ዒዛ ዒማና ዒዛኮ ጌርሲ ዓምኖኦኔ ማኦር ዴንዳዎ ዒዚ ሻኦሎይዳ ላሂ ዓኣንጉቱ ዴንቄ፤ ዒዛ ዲኢሊ ዲርኪ ባዒ ጌሃናያይዳፓ ዳካ ዔኪ ላኦዴ፤ 9 ዒዛ ላኦዳ ላኦዳ ቦኦቃፓ ኬሲ ዒዚ ሙዓንዳጉዲ ዒንጋዛ፣ ዒዚ ሙዎ ዒዲ፡- «ዓሶ ቢያ ታ ኮራፓ ኬሶቀቴ» ጌዔም፣ ዓሶ ቢያ ኬሶኬ፤ 10 ዬካፓ ዓምኖኦኔ ቲማኦር፡- «ታና ኩልሳኒ ካሣ ሃይካ ሻኦሎ ዔኪ ዬዔ» ጌይ ዓይሣዛ፣ ቲማኦር ካሣ ዔኪ ዒዛኮ ጌርሲ ዓምኖኦኔ ኮይላ ሙኬ። 11 ዒዛ ዔኪ ሙካዛ ጨርፒዲ ዒዛ ዒ ዓርቁ፡- «ታ ጌሮ! ኑቀላ ላሃም!» ጌዔኔ።

12 ዒዛ ማሃዎ፡- «ታ ዒሼ፣ ዔይዔ! ሃዳራ ታና ቦርሲሲፓ! ሃያጉዴ ዳውሲንጉ ማዶ ዒሰራዔኤሌይዳ ማዲንጉ ቤቁባኦሴ! ዬያር ሃያጉዴ ፑርታ ማዶ ማዲፓ፤ 13 ኔ ታና ሂዲ ቦርሲሴቴ ዓሶ ፔጋ ዎይቲ ታ ሃንታንዳይ? ኔኤኒያ ሃሣ ዒሰራዔኤሌይዳ ሚርጌና ዳውሲንጉ ዓሲ ማዓንዳኔ፤ ዬያይዳፓ ካአቲም ኔ ኬኤዜቴ ዒዚ ታና ኔኤም ዒንጋንዳሢ ታ ዔራኔ» ጌዔኔ። 14 ጋዓንጉ ዒዚ ዒዛ ጋዓሢ ዎይዛኒ ከይባኦሴ፤ ዒዚ ዒዛይዳፓ ዎልቁናታሢር ዎልቁና ዓርቁ ዒዛና ላሂኔ።

15 ዬማፓ ዓምኖኦኔ ዒዛ ዒናፓ ዒዔ፤ ቤርታ ዒዚ ናሽኬሰካፓ ባሽ ዒዛ ዒ ዒዔ፤ ዬያር ዒ፡- «ሃይካፓ ኬሰኬ!» ዒዛ ጌዔኔ።

16 ዒዛ ዒማና፡- «ዔይዔ! ታና ኔ ሃያይዲ ፑርቲሲ ዳካያ ማዔቴ ሃሢ ኔ ማዶሰካፓ ዑሣ ዓኣዴ ሳሜ ኔኤኮ ማዓንዳኔ!» ጌዔኔ።

ዓምኖኦኔ ጋዓንጉ ዒዛሲ ዎይዚባኦሴ፤ 17 ዬያር ዒዚ ዒዛም ማዶ ማዶሰኬያ ዔኤሊ፡- «ሃኖ ላኦሎ ታ ኮራፓ ሺኢሼ! ዙሎ

ዒዛ ኬሲጋፓ ካሮ ዋደ!» ጌይ ዓይህኔ። 18-19 ዓምኖኦኦኦ ማደ ማደህ ተማኦሮ ዙሎ ኬሳፖ ካሮ ዋደ።

ዒዛ ዓማና ዬኖ ዋደና ሎይባኦ ዉዲሮ ናኦታ ማኦ፣ ዖደዞ ሚዛጳ ማኦ፣ ማይገቲ ዓኦ፣ ዳርዜኔ፤ ሃሃ ፔኤኮ ቶኦካ ዲቢንህሂ ዋሂ ኩጭዋ ፔኤኮ ቶኦካ ዋሂ ዒላቲ ዬኤኪ ዬኤኪ ዴንዴኔ። 20 ዒዛኮ ዒሺ ዓቤሴሎሜ ዒዛ ዴንቃ፡- «ታ ጌሮ! ኔ ጌርሲ ዓምኖኦኦ ኔና ዓዓርቁያ? ጫክ ኔኤሮ ዘቲኖ ጌዔ፤ ዒዚ ኔኤኮ ጌርሲ ማዔህሂሮ ዬያ ዖኦማኦ ኬዚፖ» ጌዔኔ። ዬያሮ ተማኦሮ ዒዛኮ ጌርሲ ዓቤሴሎሜ ማኦሮ ዓሲና ካኦሙዋፖ ፔኤሮ ዴዔኔ።

21 ካኦቲ፣ ዳውቴ ዬያ ዋይዛፖ ሚርጌና ዳጋዴኔ፤ [ጋዓንቴ ዓምኖኦኦ ዒዛኮ ቶይዶ ናፖታህሂሮ፣ ሃሃ ዒዛ ዒ ኮሺ ናሽካህሂሮ ዔኤቢ ጋዓኒ ኮዒባኦሴ።] 22 ዒዛኮ ጌሮ፣ ተማኦሮ ዒዚ ዓርቁህሂሮ ዓቤሴሎሜ ዓምኖኦኦ ዒናፓ ዒዔኔ፤ ዬማፓ ዓርቃፖ ፑርታኦ ማፖም ኮሺ ባኦዚ ዒዛና ጌሰታኒ ኮይባኦሴ።

ዓቤሴሎሜኮ ኮሞ ዔኪፖ

23 ላምፖ ለዔኮ ጊንፃ ዓቤሴሎሜ ዔፕሬኤሜ ካታሞ ኮይላ ዓኦ በዓላ ሃፖሬ ጌይንታ በዛ ማራቶኮ ጋፓኖ ታይዚሳኔ፤ ዒማና ዓቤሴሎሜ ካኦቲኮ ዓቲንቆ ናኦታ ቢያ ዬያ ሙፖ ሙኪ ሙዓንዳፕዲ ዔኤላኔ። 24 ዒዚ ካኦቲ፣ ዳውቴ ኮራ ዴንዲ፡- «ካኦቲኖ! ታኦኒ ማራቶኮ ጋፓኖ ታይዚሳኔ፤ ዬያሮ ኔናንታ ኔ ዴማ ማደ ሱኦጎንታ ዬያ ሙፖ በዞ ሙኬቶሽ?» ጌዔኔ።

25 ካኦቲ፡- «ታ ናዓሃ! ኦ ሙካንዳያ ኮይሱዋሴ፤ ኦ ቢያህሂ ሙኬቴ ኔ ሙኡዛንዳ ባካ ኔኤም ማጋንዳኔ» ጌዔኔ። ጋዓንቴ ዓቤሴሎሜ ዓዶ ዶዲሺ ሺኢቁኔ፤ ካኦቲ ዒማና ማሊፖ ሺርሻኒ ኮይባኦህሂሮ ዓቤሴሎሜ ዓንጂ ዳኬኔ።

26 ዓቤሴሎሜ ጋዓንቴ፡- «ቃራኬ! ኔ ሙካኒ ኮይባኦቲ ታ ጌርሲ፣ ዓምኖኦኦ ሙኬቴሽ?» ጌይ ዖኦጭኔ።

ካኦቲ ማሃ፡- «ዒዛኦ ዬካ ዴንዳኒ ዓይጌ ኮይሳይ?» ጌዔኔ።

27 ዒማና ዓቤሴሎሜ ዶዲሺ ሺኢቁህሂሮ ዳውቴ ዓምኖኦኦንታ ሃንጎ ዓቲንቆ ናኦቶሞ ቢያ ዳኬኔ።

ዓቤሴሎሜ ካኦቲም ኮይሳ ሙኡዚ ጊኦጊሺ ዓኦኔ፤ 28 ዒዚ ዒማና ዒዛኮ ዓይሎም፡- «ዓምኖኦኦ ማህንታማ ኮሺ ዛጉዋቴ፤ ታ ዒንህሂ ዓይህማና ዒዛ ዋዋደዋቴ፤ ዬያ ዓይህህሂ ታናታህሂሮ ፔቴታፖ ዒጊጩፖቴ! ጫርቃፖ ማዐ፡ዋቴ፣ ፔቴታፖ ዓልቲፖቴ!» ጌዔኔ። 29 ዬያሮ ዒዛኮ ዓይላ ዒ ዓይህህ ጎይፖ ዓምኖኦኦ ዋደኔ፤ ዒማና ዓቲ ዳውቴኮ ዓቲንቆ ናኦታ ፔኤኮ ባቁሎ ባቁሎ ቶጊ ጳሽኪ ዴንዲ ቶሌኔ።

30 ዔያታ ሃጊ ማአሪ ሄሉዋ። ጎይ፣ ዓኣንቲ፡- «ዓቤሴሎሜ ኔኤኮ ናኣቶ ቢያ ዋዕኔ፤ ፔቲታ፣ ዓቲይ ባኣሴ!» ጋዓ ሃይሴ ዳውቲም ሱቲኔ። 31 ዩያሮ ካኣቲ ዳዔ ቤዛፓ ዔቂ ያያ፣ ፔኤኮ ማአዓሢ ዳርዚ ሳዓ ሎኦሜኔ፤ ዒማና ዒኢካ ዒዛና ዋላ ዓኣ፣ ዒዛኮ ዓይላኣ ያዩ ፔኤኮ ማአዓሢ ዳርዚ። 32 ዳውቲኮ ጌርሲ ሻማ ናኣዚ፣ ዮናዳኣቤ ጋዓንቲ፡- «ካኣቲዮ! ናኣቶ ኔኤኮ ቢያ ዋዕኔ፣ ዓዕሶኦ፤ ዋዕኔሃ ዓምኖኦኔ ሌሊኩ፤ ዓቤሴሎሜ ዩያ ማዳኒ ማሌሢ ዓምኖኦኔ ዒዛኮ ጌር ቲማኣሮ ዓርቁማፓታሢ ኔ ዔራኒ ዳንዳዓኔ። 33 ዩያሮ ናኣታ ኔኤኮ ጉቤ ሃይቂያ ማሂ ከኤዛና ሃይሶ ጎኔኬ ጌይፖ፤ ዋዕኔሃ ዓምኖኦኔ ሌሊኩ» ጌዔኔ።

34 ዩማና ዓቤሴሎሜ ዓኣሽንቲ ቶሊ ዳንዳናኣኮኬ፤ ዩሩሳላሚ ካታዋ ካፓ ፖኦሊሳሢ፣ ሆርናይሜና ጌሜሮ ጎይ፣ ያና ሃንጋ ሚርጌ ዓሲ ከዲ ሙካንቲ ዳንቁኔ፤ ዩያሮ ዒዚ ካኣቲ ኮይላ ዳንዲ ዛጌ ባኮ ቢያ ከኤዚኔ፤ 35 ዮናዳኣቤ ዳውቲም፡- «ታ ጌዔ ጎይ፣ ሃይሾ ናኣታ ኔኤኮ ሙከኔ» ጌዔኔ። 36 ዒዚ ዩያ ጌዒ ከኤዚ ጋጋፓማና ዳውቲኮ ናኣታ ጌሊ ዒላቲ ዩኤከሢ ዓርቁም፣ ዳውቲንታ ዒዛኮ ዳንዘንታ ዒናፓ ጎጋይቂ ዩኤከኔ።

37-38 ዒማና ዓቤሴሎሜ ዓኣሽንቲ ጌሹሬ ካኣቲ፣ ዓሚሁዳ ናኣዚ፣ ታልማዬ ኮራ ዳንዳኔ፤ ዒኢካ ዒዚ ሃይሆ ለዔ ዳዔኔ፤ ዳውቲ ፔኤኮ ናኣዚ፣ ዓምኖኦኔ ሃይቁሢሮ ሚርጌ ዋዩ ያዩ ዩኤከኔ፤

39 ጋዓንቲ ዳውቲ ዓምኖኦኔ ሃይሶ ሲዮ ዋሌሰካፓ ዒዛኮ ናኣዚ ዓቤሴሎሜ ጳቂሥሢ ዓርቁኔ።

14

ዓቤሴሎሜኮ ዩሩሳላሚ ማዒ ሙኮ

1 ካኣቲ፣ ዳውቲ ዓቤሴሎሜ ጳቂሥሢ ጳሩና ናኣዚ፣ ዒዮዓቤ ዔሬኔ፤ 2 ዩያሮ ዒዚ ቲቆዓ ካታሞይዳ ናንጋ፣ ፔቲ ጨንጫ ላኣሊሰኬና ዔኤሊሴኔ፤ ዒዛ ሙካዛ፡- «ኔና ሲዬ ዓሲ ማሊሴ፤ ሲዬ ማአዖ ማይንቲ፣ ያይሲያ ቲሽቲ፣ ሚርጌ ዋዩ ሲዩ ዳዔ ላኣሊ ማላኒ ጌኢጊንቲ፤ 3 ዩካፓ ካኣቲ ኮይላ ዳንዲ ታኣኒ ኔኤም ጋዓ ባኮ ከኤዚ» ጌይ ዒ ዞሬኔ፤ ያዲ ጌዔሰካፓ ዒዛ ጋዓንዳ ባኮ ቢያ ዒዛም ዒ ከኤዚ።

4 ዩያሮ ላኣሌላ ካኣቲ ኮራ ዳንዲ ሳዓ ላሂ ቦንቾ ዔኤሊሢ ዔኤላዖ፡- «ካኣቲዮ! ሃዳራ ታና ማኣዳ!» ጌዔኔ።

5 ካኣቲ ዒዚ ኮራ፡- «ዓይጎዳይ?» ጌዔኔ፤ ዒዛ ዒማና፡- «ታኣኒ ከኤሪጎዳኬ፤ 6 ካኣቲዮ! ታኣኮ ላም፣ ዓቲንቁ ናይ ዓኣዖ ፔቲ

13:37-38 13:37 2ሳሙ. 3:3።

ከሌ ዔያቶ ላኣጋ ዓሲባኣ ቤሰካ ዎላ ዑራዲ ፔቴይ ባጋሢ ዎዴኔ፤
7 ካኣተዮ! ሃሢ ታኣኮ ዒጊና ቢያ ታና፥ ኔ ዓይሌሎ፦ <ፔ ጌርሲ
ዎዴሢሮ ኑ ዒዛ ዎዳንዳጉዲ ኔኤኮ ናዓሢ ኑሞ ዓኣሢ ዒንጌ፤ ኔና
ዳካላ ዓሲ ባኣያ ኔ ማዓንዳኔ» ጌይ ሜታሴኔ። ዔያታ ዬያይዴያ
ማዔቴ ታኣኒ ናይ ባኣያ ማዒ ዓቴኔ ጌይሢከ፤ ሃሢ ታኣኮ ፔቴ
ዓኣፖማ ዔያታ ዎዲ ታ ዓኒኮ ሱንሢ ባይዛንዳኔ» ጌዔኔ።

8 ካኣተዒ ሲማና፦ «ማኣሪ ዴንዴ፤ ታኣኒ ዬያ ኔ ጌዔ ባኮ ጌሰታንዳኔ»
ጌዔኔ።

9 ዒዛ ጊንሣ፦ «ካኣተዮ! ኔ ጌሰቲ ዎጋንዳ ዎጋ ኔኤሞ ሜቶ
ማዢንዲዎኣሢ ታ ጉሙርቃኔ፤ ማዢያ ማዔቴያ ዬይ ዳቢንታ ታኣና
ታ ማኣሮ ዓሰናይዳ ማሞ» ጌዔኔ።

10 ካኣተዒ ዒዞሞ፦ «ዓይጎ ዓሲያ ኔና ሜታሴያ ማዔቴ ታ ኮይላ
ዒዛ ሺኢሺ፤ ላሞዓንሃ ዒ ኔና ሜታሳዓከ» ጌዔኔ።

11 ዒዛ ሲማና፦ «ካኣተዮ! ታ ናዓሢ ሃይቄሢ ዛሎ ኮሞ ዔካኒ
ኮዓ ታ ዒጊናሢ ታኣኮ ዓቴ ናሞ ዎዲ ዑሣ ዓኣዴ ዳቢንቲዳ
ጌሉዎጉዲ ማሃኒ ናንጊና ናንጋ ጎዳ ማዔ ኔኤኮ ያኦዛሢ ሱንፆና
ታኣሞ ጫኣቄ» ጌዔኔ።

ካኣተ፥ ዳውቴ፦ «ናንጊና ናንጋ ጎዳ ሃይቆ! ኔኤኮ ናሞ ሄላንዳ
ባኣዚ ዓታዛ ቶኣኮ ጋፓናፓ ፔቴታሞ ዒዛኮ ሳዓ ጉሪ ከዲንዲዎሴ»
ጌዔኔ።

12 ላኣሌላ፦ «ካኣተዮ! ሃሢ ታ ፔቴ ባኣዚ ከኤዞሞ» ጌዔኔ።
ዒዚ፦ «ሂንዳ ከኤዞ» ጌዔኔ።

13 ዬያሮ ዒዛ፦ «ያኦሲ ዴሮይዳ ሃያጉዴ ፑርታ ባኣዚ ኔ ዓይጋ
ማዴይ? ኔኤኮ ናዓሢ ፑኒ ዴንዴ ዓጫፓ ማዒ ሙካንዳጉዲ
ኔ ኮዒባኣሴ፤ ሃሢ ኔ ጌዔ ባኮና ኔ ዑፃ ኔ ዎጌኔ፤ 14 ኑ ቢያሢ
ሃይቢ ዓታዓከ፤ ኦኦኒ ሳዓይዳ ላኣሊንታሞ ጊንሣ ዔውታኒ ዳንዳዑዎ
ዎኣሢጉዲከ። ያኦሲ ጋዓንቴ ፑኒ ዴንዴ ዓሲ ዒዛይዳፓ ሃኪ
ዴንዴማና ዓቴዎጉዲ ዒዚ ማዒ ሙካንዳ ካራ ጊኣጊሻኔ፤ ሸምፓሢ
ጉሪ ያዲ ባይቃንዳጉዲ ኮዑዎሴ። 15 ሃሢ ካኣተዮ! ታኣኒ ኔ ኮይላ
ሙከሢ ዬኖ ባኮና ዓሳ ታና ዒጊቻያ ማዔሢ ኔኤሞ ከኤዛኒከ፤
ታ ያኦጮ ባኣዚ ቢያ ዒ ታኣሞ ማዳንዳኔ» ጌዒ ጉሙርቄሢና ታ
ኔ ኮይላ ሙከኔ፤ 16 ታ ናዓሢና ታኣና ዎዲ ባይዚ፥ ያኦሲ ፔኤሞ
ማሄ ሳዓፓ ዳካኒ ኮዓ ዓሢዳፓ ታ ኔኤሞ ከኤዛ ባኮ ዎይዚ ታና
ኔ ዓውሳንዳጉዲ ጌይከ። 17 ዬያጉዲ ሃሢ ካኣተዮ! ካኣተ ያኦሲ
ከኢታንቻሢ ማዔሢሮ ጊንሣ ኮዢና ፑርቶና ዲማሲ ዔራሢሮ

ኔ ጌዔ ባካ ታና ደዲሻንዳኔ ጌይኬ፤ ናንገና ናንጋ ጎዳ ማዔ ያኦዛሢ ኔኤና ዋላ ማዖንጎ!» ጌዔኔ።

18 ካኣቲ ዒማና ዒዞ ኮራ፡- «ፔቲ ባኣዚ ታ ኔና ያኦጮም፤ ኔኤኒ ጋፒሲ ጎኑሞማ ኬኤዜ» ጌዔኔ።

ዒዞ፡- «ካኣቲዮ! ኔ ኮዔ ባኣዚ ያኦጮ» ጌዔኔ። 19 ዒዞ፡- «ኔ ሃያይዳንዳፑዲ ኔና ዘሬሢ ዒዮዓቤዳ?» ጌይ ያኦጮኔ።

ዒዞ ማሃዮ፡- «ካኣቲዮ! ኔ ሃይቆ! ኔ ጌዔሢፓ ኬሰካንዳ ዓሲ ፔቲታዖ ባኣሴ፤ ጎኔኬ፤ ታ ዓይጎ ዋዳንዳቲያ ዋዚ ታ ጋዓንዳቲያ ታና ዘሬሢ ኔኤኮ ፖኦሊሶ ሱኡጋሢ፤ ዒዮዓቤኬ። 20 ዒዞ ዬያይዳሢ ዔቦ ቢያ ገኢገሻኒ ማሊኬ፤ ካኣቲዮ! ኔኤኒ ጋዓንቲ ያኦሲ ከኢታንቻሢፕዲ ዔራኬ፤ ማዓንዳ ባኮ ቢያ ኔ ዔዔራራ» ጌዔኔ።

21 ዬካፓ ካኣቲ ዳካ ኔጌዖ ዒዮዓቤም፡- «ቃራኬ፤ ዳንዲ ዳጌሢ፤ ዓቤሴሎሜ ኮይ ዔኪ ሙኬ» ጌዔኔ።

22 ዒማና ዒዮዓቤ ዳውቲ ቤርታ ሳዓ ላሂ ቦንቾ ዔኤሊሢ ዔኤላዖ ካኣቲ ጋላቲኔ፤ ሃሃ ዒዞ፡- «ታ ኮዔ ባኣዚ ማዳንዳፑዲ ኔ ዓይሢሢሮ ኔ ታና ቦንቻሢ ታ ዔሬኔ» ጌዔኔ። 23 ዬካፓ ዒ ጌሹሬ ዳንዲ፤ ዔቤሴሎሜ ማሂ ዔኪ ዬሩሳላሜ ሙኬኔ፤ 24 ጋዓንቲ ዓቤሴሎሜ ካኣቲሞ ማኦሮ ጌሊ ናንጉዋፑዲ ካኣቲ ላኣኔኔ፤ ዬያፑዲ ሃሃ ካኣቲ፡- «ዓቤሴሎሜ ዘጋኒ ፔቲታዖ ታ ኮዑዋሴ» ጌዔኔ። ዬያሮ ዓቤሴሎሜ ካኣቲ ቤርቶ ኬሰኩሞፖ ፔ ማኦሮ ናንጌኔ።

ዓቤሴሎሜ ዳውቲና ዋላ ቡኬሢ

25 ዓቤሴሎሜጉዳያ ሚዛጲ ዓሲ ዒሰራዔኤሌይዳ ፔቲታዖ ባኣሴ፤ ዒዞኮ ቶኦኮ ጋፓናፓ ዳንዲ ቶኮ ፀንጎ ሄላንዳኣና «ሃይማ ፓጮኔ» ጌይሳ ባኣዚ ባኣያኬ፤ 26 ዒዞኮ ቶኦኮ ጋፓና ያደቃሢሮ ሃሃ ዒዞ ዳኤፃሢሮ ለዔይዳ ፔቲና ዒ ታይዛኔ፤ ዬያ ታይዘና ጋፓኖኮ ዳኤሠማ ካኣቶ ማኦሮይዳ ዳኤሠሞ ዔር ባኮና ዛጎዛ ላምዖ ከሎፓ ባሻያኬ። 27 ዓቤሴሎሜኮ ዒማና ሃይሃ ዓቲንቄ ናይና ፔቲ ዉዳሮ ናይ ዓኣኔ፤ ዉዳሮ ናዔሎኮ ሱንፃ ቲማኦሮ ጌይንታያ፤ ሚርጌና ሚዛጲያኬ።

28 ዓቤሴሎሜ ካኣቲና ካኣሙሞዖ ዬሩሳላሜይዳ ላምዖ ለዔ ዳዔኔ፤ 29 ዬካፓ ካኣቲ ኮራ ዳንዲ ዒዞ ዛሎ ያኦጮንዳፑዲ ዒዮዓቤ ዒዞ ዔኤሊሴኔ፤ ዒዮዓቤ ጋዓንቲ ሙካኒ ኮይባኣሴ፤ ሃሃ ገንሣ ዒዞ ዒዮዓቤም ከኢታ ዳካዛ፤ ዒዮዓቤ ሙኩሞ ዓቲኔ፤ 30 ዬያሮ ዓቤሴሎሜ ዒዞኮ ዓይሎ፡- «ዛፑዋቲ፤ ታ ጎዡ ሄሊ ዔልዓሢ ካዲ ዓኣ ጎዡ ዒዮዓቤሲኬ፤ ሃሢ ዳንዲ ዒኢካ

ታሚ ዓገዋቱ» ጌሊ ዓይሣዛ፣ ዔያታ ዴንዲ ሃአኮይዳ ታሞ ዓገ ሙኡዜኔ።

31 ዩካፓ ዒዮዓቤ ዓቤሴሎሚ ማአሪ ሙካዖ፡- «ኔኤኮ ዓይላ ታ ጎዠ፣ ሃአኮይዳ ዓይጎር ታሞ ዓገይ?» ጌይ ያኦጩኔ።

32 ዓቤሴሎሚ ማሃዖ፡- «ታ ኔና ዔኤላዛ ኔ ሙኪባአሢርከ፤ ሃሢ ካአቲ ኮይላ ዴንዲፓፓ ጌሹሬይዳፓ ሃይካ ታ ዓይጋ ሙከይ ዒኢካ ታ ናገጌቲ ታአሞ ኮሺታዖ ዓቴኔ። ጋዓኔ ጌይ ታ ዛሎ ያኦጩ፤ ዩያጉዲ ሃሢ ታአኒ ካአቲና ካአማንዳ ጎይሢ ገኢጊሹ፤ ታ ዳቢንቲያ ማዒ ጴዳቲ ዒ ታና ዎዎድንጎ» ጌዔኔ።

33 ዩያር ዒዮዓቤ ካአቲ፣ ዳውቲ ኮራ ዴንዲ ዓቤሴሎሚ ጌዔ ባኮ ቢያ ከኤዜሢሢር ዳውቲ ዓቤሴሎሚ ዔኤሊሴኔ፤ ዩካፓ ዓቤሴሎሚ ካአቲ ቤርቶ ሙካዖ ሳዓ ላሂ ቦንቾ ዔኤሊሢ ዔኤላዛ ካአቲ ዒዛ ዔኪ ሄርቄኔ።

15

ዓቤሴሎሚ ማሌ ፑርቶ ማሊዖ

1 ዩካፓ ዓቤሴሎሚ ፔቲ ሳርጌላ ያይታና ዲቢ ፓሮና ፔኤም ገኢጊሹኔ፤ ዩያጉዲ ሃሢ ዒዛኮ ቤርታ ቤርታ ጳሽካንዳ ደንጊታሚ ዓሲያ ገኢጊሹኔ፤ 2 ዒማና ዒዚ ቢያ ከሊ ጉቶ ጉቶ ሚኢሪ ካታሞ ጌሎ ካር ባንሢ ሙካ ጎይዖ ዓጫ ከሰኪ ዔቃኔ፤ ፔቲ ዓሲ ካአቲ ዩያ ዓሢሞ ጌኤሲ ጌሰታንዳጉዲ ሞኦቶር ሙካአና ዓቤሴሎሚ ዔኤሊ ዔኤሊ ዓንካፓ ዩይ ዓሢ ሙከቲያ ያኦጩኔ፤ ዓሢ ያ ፃጳፓ ማዔቲያ ከኤዛዛ፤ 3 ዒዚ፡- «ዎይዜ፤ ኔኤኮ ጌኤዛ ፐዜከ፤ ጋዓንቲ ኔኤኮ ጌኤዛ ጌሰታንዳጉዲ ካአቲ ደኦሪ ጌሢ ዓሲ ባአሴ» ጋዓኔ፤ 4 ሃሢ ዒዚ ከኤዛዖ፡- «ታአኒ ዎንዴ ሱኡጌታቲ ዓይጎ ጎያንደይ! ሞኦቶታቲያ ማሌ ዳማ ዳማ ጌኤሲ ዓአ ዓሲ ታ ኮይላ ሙከቲ ፐዜ ዎጌ ታ ዎጋንዳንቲከ» ጋዓኔ። 5 ዓሳ ዒማና ዒዛኮ ቤርታ ሳዓ ላሂ ቦንቾ ዔኤሊሢ ዔኤላዛ ዒዚ ዓሢኮ ኩጮ ዓርቂ ዔቂሲ ዔቂሲ ሄርቃኔ። 6 ዓቤሴሎሚ ጌኤሲ ዓአ ዒሰሪዔኤሌ ዓሲ ካአቲ ኮይላ ሙካማና ቢያ ዩያይዳሢር ዔያቶኮ ዒኖ ፔ ባንሢ ማሃኒ ዳንዳዔኔ።

7 ያይዶ ለዔኮ ገንፃፓ ዓቤሴሎሚ ካአቲ፣ ዳውቲ ኮይላ፡- «ካአቲዮ! ናንጊና ናንጋ ጎዳሞ ታአኒ ናኦቤ ናኦቤ ኩንሣኒ ኩብርኦኔ ታ ዴንደሞ! 8 ዓይጎር ጌዔቲ ታአኒ ኔ ዓይላሢ ሶኦሪያ ዓጫ፣ ጌሹሬይዳ ናንጌ ዎደና ኔ ታና ዩሩሳላሚ ዔኪ ማሄቲ ዒንጎ ባአዚ ዒንገ ናንገና ናንጋ ጎዳ ካአሽካንዳኔ ጌይ ታ ናኦቤ» ጌዔኔ።

9 ዩያር ካአቲ፡- «ኮሺ ዴንዴ!» ጌዔም፣ ዒዚ ኩብርኦኔ ዴንዴኔ፤

10 ዩካፓ ዒዚ፡- «ዛዩ ዑኡሲ ዒንሢ ዎይዜ ዎደና ሳቤሴሎሚ

ከብርክትይዳ ካኦታዳ፤ ጌይ ዒላቱዋቴ» ጌይ ከኤዛንዳ ዔርቲባኣ ከኢታ ዓሲ ዩሩሳላሚ ዓጮ ቢያ ዳኬኔ። 11 ዓቤሴሎሚ ዒዛና ዓኣዳንዳጉዲ ዔኤሌም ዒዛና ዋላ ዩሩሳላሚ ዴንዴ ላምዖ ዪኤታ ዓሲ ዓኣኔ፤ ዔያታ ዒዛ ጊንዖ ዓኣዳሚ ዒ ማሌ ፑርቶ ማሊዖ ዔረቆዎዎኬ። 12 ዓቤሴሎሚ ዒንጎ ባኮ ናንጊና ናንጋ ጎዳም ዒንጋኣና ካኦታ፤ ዳውቴኮ ዘራ ዓሶይዳፓ ፔቴ ዓከዖፔሌ ጎዖሢም ከኢታ ዓሲ ዒ ዳከ ጊሎ ካታማፓ ዔኤሊሴኔ፤ ዒማና ካኦታም ማሊንቴ ፑርቶ ማሊዖ ደዲ ደዲ፤ ዓቤሴሎሚ ጊንዖ ማዔ ዓሶኮዋ ፓይዳ ሚርጊ ሚርጊ ዴንዴ።

ዳውቴ ዩሩሳላሚፓ ፑኒ ዴንዴሢ

13 ፔቴ ዓሲ ዳውቴም፡- «ዒሰራዔኤሌ ዓሳ ዓቤሴሎሚ ባንሢ ማዔኔ» ጌይ ከኤዘኔ።

14 ዩያር ዳውቴ ዒዛና ዋላ ዩሩሳላሚይዳ ዓኣ ሱኡጎም ቢያ፡- «ዓቤሴሎሚ ኩጫፓ ቶላኒ ኑ ኮዔቴ ዑኩና ሃይፓ ኑ ፑኒ ዴንደም! ዑካዲዋቴ! ሃንጎ ኔጉዋዖ ዒ ሙኪ ኑና ባይዘንዳኔ፤ ካታምይዳ ዓኣ ዓሲ ቢያ ዒ ዋዎዳንዳኔ!» ጌዔኔ።

15 ዔያታ ዒማና፡- «ካኦታዮ! ቃራኬ፤ ኔ ጌዔ ባኮ ቢያ ኑ ኩንሣንዳኔ» ጌዔኔ። 16 ዩያር ካኦታ ፔኤኮ ካኦታም ማኣር ካፓንዳጉዲ ዒዛኮ ጊንዖኣ ማቸንሢ ማዔ ታጳ ላኣሊሰኬንሢ ሃሻዖ ሃንጎ ፔ ማኣር ዓሶንታ ዓይሎንታ ዋላ ፑኒ ዴንዴ።

17 ካኦታና ዒዛ ጊንዖ ዓኣዳ ዓሶና ቢያ ካታማፓ ከሰኪ ዴንዲቤቃ ካታምኮ ጋፒንዖይዳ ዓኣ ፔቴ ማኣሪሰኬና ኮይላ ዔቄኔ፤ 18 ዒማና ሜሌ ዓሳ ቢያ ዒዛ ኮይሌና ዓኣዳኔ፤ ሃሣ ዒዛ ካፓ ፖኦሊሶ ማዔ ከሪታ ዓሶንታ ፔሊታ ዓሶንታ፤ ዩያጉዲ ጋኦቲፓ ሙኬ ላሆ ዪኤታ ጌታ ዓሳኣ ካኦታ ኮይሌና ዓኣዳኔ፤ 19 ዒታዬ ጌይንታ ጌታ ዓሣሢ ኮይላ ካኦታ፡- «ኔ ኑኩና ዋላ ዓይጋ ዴንደይ? ማዒ ዴንዲ ሃሢ ካኦታቴ ዓኮ ካኦታሢና ዋላ ናንጌ፤ ኔኤኒ ኔ ዓጫፓ ሙኪ ሃይካ ናንጋ ሜሌ ዓጪ ዓሲኬ፤ 20 ሃይካ ኔ ዴዔሢ ዳካኬ፤ ሂዳዖ ሃሢ ኔ ታኣና ዋላ ዓይጋ ሜታዲ ዴንዲ ጋዓይ? ታኣኒ ዋካ ዴንዳቴያ ዔረቆሴ፤ ዩያር ኔ ዓጮ ዓሶ ዔኪ ማዒ ዴንዴ፤ ናንጊና ናንጋ ጎዳ ጉሙርቁንታያ ማዒ ኮሺ ባኣዚ ኔኤም ማዳንጎ» ጌዔኔ።

21 ዒታዬ ጋዓንቴ፡- «ናንጊና ናንጋ ጎዳ ሃይቆ! ኔ ሃይቆ! ካኦታዮ! ታ ሃይቄቴያ ሺምፔና ናንጌቴያ ኔ ናንጋ ቤዘይዳ ታ ኔኤኮ ዓይላሢ ዒኢካ ኔኤና ዋላ ናንጋንዳኔ» ጌዔኔ።

22 ዳውቴ ዒማና፡- «ቃራኬ! ቢሬ!» ጋዓዛ፡ ዒታዬ ፔኤኮ ፖኦሊሶንታ ማኣር ዓሶንታ ዋላ ዔኪ ዓኣዳኔ፤ 23 ዩያይዲ ዳውቴኮ ዓሳ ካታማፓ ከሰኪ ዴንዳኣና ዴራ ዒላቲ ዩኤኬኔ፤ ካኦታ፤ ፔ ዓሶና

ዎላ ቁድሮኦኔ ደኑጮና ፒንቃዎ ፔቱሞና ዓሲ ናንጉዎ ዳውሎ ባንሢ ዴንዴኔ።

24 ዒማና ቁኔሳሢ፡ ሳደቁ ዒኢካ ዓኣኔ፤ ጫክቁሞ ሳኣዲኖ ኬዴ፡ ሌዊ ዓሳ ዒዛና ዎላ ዓኣኔ፤ ዴራ ቢያ ካታሞ ሃሺ ኬስካንዳያ ሄላንዳኣና ጫክቁሞ ሳኣዲኖ ዔያታ ዓቢያታሬ ኮይላ ጌሢኔ። 25 ዬካፓ ካኣቲ ሳደቁሞ፡- «ጫክቁሞ ሳኣዲኖ ማሂ ዔኪ ካታሞ ዴንዴ፤ ናንጊና ናንጋ ጎዳ ታና ቦንቺ ታ ናንጎና ዎዛዴያ ማዔቴ ፔቲ ኬሊ ጫክቁሞ ሳኣዲኖንታ ያኦሲ ዴርና ካኣማ ማኣሮንታ ታና ዒ ዛጊሳንዳያ ናንዳኔ፤ 26 ናንጊና ናንጋ ጎዳ ታና ቦንቺ ታ ናንጎና ዎዛዴባኣቲ ጋዓንቴ ታጊዳ ዒ ናሽኬ ባኣዚ ማደንጎ» ጌዔኔ። 27 ሃሃ ዒ ሳደቁሞ ኬኤዛዎ፡- «ዎይዜ፤ ኔ ናኣዚ ዓሂማፃና ዓቢያታሬ ናኣዚ ዮናታኣኔና ዔኪ ኮሺና ካታሞ ማዒ ዴንዴ፤ 28 ታ ኔጊዳፓ ሃይሴ ዎይዛንዳያ ሄላንዳኣና ዓሲ ናንጉዎ ዳውሎይዳ ዓኣ ዎሮ ፒንቆ ካሮይዳ ካፓንዳኔ» ጌዔኔ። 29 ዬያሮ ሳደቁና ዓቢያታሬና ጫክቁሞ ሳኣዲኖ ዬሩሳላሜ ዔኪ ዴንዲ፡ ዒኢካ ዴዔኔ።

30 ዳውቴ ዒማና ያዬያ ዔርዛኒ ዴርሲ ቶካ ዓኣሡዎዎ ዓፒላ ቶኦኪና ዔኪ ዛይቶ ሪሚቶ ዴኮ ዬኤኪ ዬኤኪ ኬስከኔ፤ ዒዛ ጊንዎ ዓኣዳ ዓሳኣ ቢያ ቶኦኪና ዓፒሎ ዔኪ ዬኤካኔ። 31 ዓኪዎፔሌ ዓቤሴሎሜና ዎላ ፑርቱሞ ዞሮይዳ ጌሌሢ ዳውቴ ዎይዛዎ፡- «ናንጊና ናንጋ ጎዳሢዮ! ዓኪዎፔሌኮ ዞሮ ጉሪ ቦኣዙሞ ባኣዚ ማሄ!» ጌይ ያኦሲ ሺኢቁኔ።

32 ዴራ ናንጊና ናንጋ ጎዳ ካኣሽካ ቤዞ፡ ዴኮ ቶኦኮ ዳውቴ ሄላዛ ዒዛኮ ጉሙርቁንታ ላጌ ዓርካ ዓሲ ማዔ ሁሻዬ ፔኤኮ ማኣዓሢ ዳርዚ ሃሃ ሲላሊያ ቶኦካ ዎሂ ዒዛና ካኣማኒ ሙኩኔ። 33 ዒዚ ዒዛሞ፡- «ኔኤኒ ታኣና ዎላ ዴንዴቴ ኔ ታኣኮ ሜቶ ማዓንዳኔ፤ 34 ጋዓንቴ ኔ ታና ማኣዳኒ ዳንዳዓሢ ካታሞ ማዒ ዴንዲ ዓቤሴሎሜ ኮይላ ኔ ዓዶም ታ ማዴ ጎይያ ኔኤማኣ ታ ጉሙርቁንታያ ማዒ ማዳንዳኔ» ጌይ ኔ ዒዛሞ ኬኤዜቴ ሃሃ ዓኪዎፔሌ ዓቤሴሎሜ ዞራ ዞሮ ማኪ ዓይሳያ ማዔቴኬ፤ 35 ቁኤሳ፡ ሳደቁንታ ዓቢያታሬንታ ዒኢካ ዓኣኔ፤ ካኣቱሞ ማኣሮይዳ ኔ ዎይዛ ባኮ ቢያ ዔያቶም ኬኤኬ፤ 36 ዔያቶና ዎላ ዔያቶኮ ናኣቶ ዓሂማዓፃንታ ዮናታኣኔንታ ዓኣኔ፤ ኔ ዎይዜ ሃይሶ ቢያ ዔያቶ ዑፃ ኔ ታኣም ዳካኒ ዳንዳዓኔ» ጌዔኔ።

37 ዬያሮ ዳውቴኮ ለጋሢ፡ ሁሻዬ ካታሞ ማዒ ዴንዴኔ፤ ሁሻዬ ሄሄላማና ዓቤሴሎሜ ዒኢካ ሙኩኔ።

ዳውቴና ዲባ ጎረቤት

1 ዲባና ዳውቴ ዲባ ቶኦካፓ ለካ ዳካ ዋታማና ዲባ ጌይንታ፡ ማፕቦሽቴኮ ዓይሌሰኬይ ዔርቲባኦንቴ ዒዛና ካኦሜኔ፤ ዒዚ ላምዖ ዪኤታ ሙሊሢ ላኦዳ፡ ፔቴ ዪኤታ ሶዬ ማልዚ ዋይኔ፤ ሙዋ ሚሢ ዓኦፕ ፔቴ ዪኤታ ቱኡሲና ዋይኔ ዑሺያ ፔቴ ሱርባ ማሢ ላምዖ ሃሪና ጫኦኒ ሙኪ ካኦሜኔ፤ 2 ካኦቴ፡ ዳውቴ ዲባ ኮይላ፡- «ሃይ ቢያ ዓይጎዳይ?» ጌይ ያኦጫኔ።

ዲባ ማሃዖ፡- «ካኦቴዮ! ሃር ታ ዔኪ ዬዔሢ ኔ ማኦር ዓሳ ቶጋንዳጉዲኬ፤ ላኦዳና ሙዋ ሚያ ዓኦፖና ኔኤና ዓኦዳ ዓሶም ጋላ ማዓንዳጉዲ፡ ሃሢ ዋይኖ ዑዛኦ ዓሲ ናንጉዋ ዳውሎይዳ ዓሳ ኔኤኮ ላቢንታዖ ዑሽካንዳጉዲኬ» ጌዔኔ።

3 ካኦቴ ዒዛ ኮይላ፡- «ኔ ጎዳ፡ ሳኦዖኦሌኮ ናኦዚ ናዖ ማዔሢ ማፕቦሽቴ ዓንካዳይ?» ጌይ ያኦጫኔ።

ዲባ ማሃዖ፡- «ዒሰራዔኤል ዓሳ ዒዛኮ ማዖ ሳኦዖኦሌኮ ካኦቴሞ ማሢ ዒዛም ዒንጋንዳሢ ጉሙርቃሢር ዒዚ ሃሢ ዬራሳላሚይዳ ዓኦኔ» ጌዔኔ።

4 ዲባም ካኦቴ ኬኤዛዖ፡- «ማፕቦሽቴኮ ዓኦ ባካ ቢያ ሃይካፓ ሴካ ኔኤርኬ» ጌዔኔ።

ዲባ ማሃዖ፡- «ካኦቴዮ! ታኦኒ ኔ ዓይሌኬ፤ ቢያ ዋዴ ኔና ዋዛሳ ባኦዚ ታ ማዳንዳኔ!» ጌዔኔ።

ዳውቴና ሺምዒ ጎረቤት

5 ካኦቴ ዳውቴ ባሁሪሜ ካታሞ ሄላዛ ሳኦዖኦሌ ዒጊኒ ማዔ፡ ጌራ ናኦዚ ሺምዒ ጎረብኬይ ዒዛ ባንሢ ዒዛ ጫሽኪ ጫሽኪ ሙኬኔ፤

6 ዳውቴ ዒማና ዒዛኮ ፖኦሊሶና ዒዛ ካፓ ዓሶናኮ ባኦካ ዓኦንቴ ሺምዒ ዳውቴና ዳውቴኮ ፖኦሊሶ ሱኡጎዋ ሹቻ ዲይሢ ዓርቄኔ።

7 ዳውቴ ዒ ጫሽኪ ጫሽኪ፡- «ዓሶ ዋዴሢ ሃይ! ፑርታ ማዴሢ ሃይ! ሃይካፓ ባይቄ! 8 ኔኤኒ ካኦቴሞ ዔኬ፡ ሳዖኦሌ ማኦር ዓሶ ሱጉዖ ናንጊና ናንጋ ጎዳ ማሢ ማሢኬ፤ ዒዚ ኔ ካኦቴሞ ዔኪ ኔ ናኦዚ ዓቤሴሎሜም ዒንጌኔ፤ ኔኤኒ ሱጉሢ ዓሲ ማዔሢር ሃይ ሜታ ኔና ሄሌኔ» ጌዔኔ።

9 ዲባና ያራያ ናኦዚ፡ ዓቢሻዬ ካኦቴ ኮይላ፡- «ካኦቴዮ! ሃይ ሃይቄ ካናሢ ካኦቴ ዋይቲ ጫሽካይ? ታ ዒዛኮ ዴንዲ ቶኦኮ ቲቆም!» ጌዔኔ።

10 ዓቢሻዬና ዒዛኮ ጌርሲ ዒዮዓቤናም ካኦቴ፡- «ዬያይዳ ዒንሢ ጌልዛ ባኦዚ ባኦሴ፤ ናንጊና ናንጋ ጎዳ ዒዛ ዓይሢም ታና ዒ

ጫሽካያ ማዕቲ «ዓይጋ ኔ ሃያይዳይ?» ጌይ ሃያ ዓሢ ለአጋንዳ ዓሲ ባኣሴ» ጌዔ። 11 ዩካፓ ዳውቲ ዓቢሻዬና ፖኦሊሶኮ ሱኩጎናም ቢያ፡- «ታ ናዓ ታና ዎዳኒ ኮዓያታንቲ ሃይ ቢኢኒያሜ ዓሲ ማዕሢ ማዳ ባኮ ዓይጋ ዒንሢ ዲቃቲ ሄርሻይ? ታና ዒ ጫሽካንዳጉዲ ናንገና ናንጋ ጎዳ ዒዛ ዓይሣኔ፤ ዬያሮ ሃሹዋቲ፡ ዒ ማሌ ባኮ ማማዳንጎ፤ 12 ጎፖንቲ ናንገና ናንጋ ጎዳ ታኣኮ ማቶ ዛገ ዒዚ ሃያ ታና ጫሽካ ጫኮ ዛሎ ዓንጆ ታኣም ዒንጋንዳያ ናንዳኔ» ጌዔ። 13 ያዲ ጌዔስካፓ ዳውቲና ዒዛኮ ፖኦሊሶና ዔያታ ዴንዳ ጎይፖ ዴንዴ፤ ሽምዒ ዒማና ዴኮ ጎኦባ ዔያቶኮ ኮይላ ኮይላ ዴንዲ ጫሽኪ ጫሽኪ ሹቲና ዴይ ዓጪያ ዔያቶ ባንሢ ዔኪ ላኣሌ። 14 ካኣቲኾ ታዒዛንታ ዎላ ዓኣዳ ዓሶንታ ዔያታ ሄላኒ ማሌ ቤዛ ሄላፖ ማርገና ዔያታ ላቤሢሮ ዒኢካ ሃውሹ።

ዓቤሴሎሜ ዬሩሳላሜይዳ ማዳ ባኮ

15 ዓቤሴሎሜንታ ዒዛና ዓኣ ዒሰራዔኤሌ ዓሳ ጉቤ ዬሩሳላሜ ጌሌ፤ ዒማና ዓኪፖፔሌያ ዔያቶና ዎላኬ፤ 16 ዒኢካ ዳውቲኮ ጉሙርቁንታያ ማዕ ላጋሢ፡ ሁሻዬ ዓቤሴሎሜና ካኣማዎ፡- «ካኣቲኾ፡ ማርገ ለዔ ካኣታዳ! ካኣቲኾ፡ ማርገ ለዔ ካኣታዳ!» ጌይ ዒላቲ።

17 ዓቤሴሎሜ ዒዛ ኮይላ፡- «ኔ ላጋሢ፡ ዳውቲም ኔ ጉሙርቁንታያ ማዕሢ ሃይማዳ? ዓይጋ ዒዛ ገንፖ ኔ ዴንዲባኣይ?» ጌዒ ፖኦጮ።

18 ሁሻዬ ማሃዎ፡- «ዎዲ ታ ዬያይዳንዳይ? ሃያ ዴሮንታ ዒሰራዔኤሌ ዴር ቢያሢንታ፡ ሃሢ ናንገና ናንጋ ጎዳኣ ኔና ዶኦሬ፤ ዬያሮ ኔኤና ዎላ ታ ናንጋንዳ፤ 19 ታ ጎዳሢ ናፖም ታ ማዳዎፖ ፖኣም ታ ማዳንዳይ? ኔ ዓዶም ታ ማዳሢጉዲ ሃሢ ኔኤማኣ ታ ማዳንዳይ» ጌዔ።

20 ዩካፓ ዓቤሴሎሜ ዓኪፖፔሌ ባንሢ ሺራ፡- «ኮ ሃሢ ሃይካ ዓኣ፤ ኮ ዓይጎ ዎዳንዳጉዲ ኦና ኔ ዘራይ?» ጌይ ፖኦጮ።

21 ዓኪፖፔሌ ማሃዎ፡- «ኔ ዓዴ ካኣቲሞ ማኣሮ ካፓንዳጉዲ ጌሢ፡ ዒዛኮ ገንፖኣ ማቸንሢና ዴንዲ ላሄ፤ ኔ ዬያይዳቲ ዒሰራዔኤሌ ዓሳ ቢያ ኔኤ ኔ ዓዶ ዳውሲሴሢ ዔራንዳ፤ ኔኤና ዎላ ዓኣ ዓሳኣ ጫርቃያ ማዓንዳ።» ጌዔ። 22 ዬያሮ ካኣቲሞ ማኣሮኮ 0-፩ ዓኣ ቤዛ ዓቤሴሎሜም ዔያታ ዓፒሎና ማኸንታ ማኣሮ ዶቂ ገኢገሺ፤ ዓሳ ቢያ ዒዛ ዛጋንቲ ዬያ ዓፒሎና ማኸንቲ ማኣሮይዳ ዓዶኮ ማቸንሢና ዒ ላሄ።

23 ዲማና ዓኪዎፔል ዘራ ዘራ ያኦሲ ቃኣላጉዲ ዋይዚ ዓኪንታንኬ፤ ቤርታ ዳውቴ፤ ሃሃ ጊንሃ ዓቤሴሎሜያ ዲዛኮ ዬያ ዘሮ ዓኪ ማዳኔ።

17

ሁሻዬ ዓቤሴሎሜ ዘሬ ዘሮ

1 ዬካፓ ሚርጌ ኔጉዋዎ ዓኪዎፔል ዓቤሴሎሜም፡- «ሃሮ ዲባኒ ታኣኒ ዳውቴ ዳውሲ ዓርቃኒ ታጳ ላምዎ ሺያ ዓሲ ደኦሮም፤ 2 ዲዚ ጋፒ ላቢ ዓኣንቴ ዲ ዔሩዋ ካራና ያልዚ ታ ዲ ዛይዳ ቡላንዳኔ፤ ዬያሮ ዲ ዲ ቃታንዳኔ፤ ዲ ዛና ዋላ ዓኣ ዓሳ ሃሺ ጳሽኩም ታ ዲ ዛ ዋዳንዳኔ፤ 3 ዳሮ ቢያ ታኣኒ ኔ ባንሢ ማሃንዳኔ፤ ኔኤኒ ኮዓ ፔቴ ዓሢ ዋዳንቴቴ ቢያሢ ኔ ባንሢ ማዒዎኮ ካራ ማዓንዳኔ፤ ዬካፓ ዳራ ቢያ ኮሺና ናንጋንዳኔ።» 4 ዬይ ዘራ ዓቤሴሎሜና ዲሰራዔኤል ሱኡጎ ቢያሢም ኮሺ ማሌኔ።

5 ዓቤሴሎሜ ጋዓንቴ፡- «ሃሃ ሂንዳ ዓርካ ዓሃሢ፤ ሁሻዬ ዓኤሎዋቴ፤ ዲ ጋዓ ባኮ ኑ ዋይዘም» ጌዔኔ። 6 ዓቤሴሎሜ ዲማና ሁሻዬ ዓኤሎንቴ ሙካዛ ዓኪዎፔል ዔያቶ ዘሬ ዘሮ ዲዛም ኬኤዛዎ፡- «ዓኪዎፔል ኑና ያዲ ጌይ ዘሬኔ፤ ዲ ጌዔ ጎይዎ ኑ ማዳንደም? ኑ ዋዳንዳቴያ ኔ ኑም ኬኤዛ ባኣዚ ዓኣ?» ጌዒ ያኦጩኔ።

7 ሁሻዬ ማሃዎ፡- «ዓኪዎፔል ዘሬ ዘራ ሃሢ ዲንሢም ኮይሳያቱዋሴ፤ 8 ኔ ዓዶ ዳውቴንታ ዲ ዛና ዋላ ዓኣ ዓሳንታ ያልዚና ዔርቴያ፤ ሃሃ ናይ ዔውቴ ዘቢጉዲ ዲጊቻያ ማዔሢ ኔ ዔራኔ፤ ጊንሃ ሃሃ ኔ ዓዴ ያልዚ ያላሢና ኬሰኬ ዓሲ ታሢሮ ዋንቶ ፔ ፖኦሊሶና ዋላ ዋርቃያቱዋሴ፤ 9 ሄኤዶ ሃሢ ዲ ዴኔ ዔቴ ባኣካይዳ ሃንጎ፤ ሜሌ ቤሰካ ዓኣሺንቴናንዳኔ፤ ዳውቴ ኔ ዓሶፓ ዋዳም ዋይዜ ዓሲ ቢያ ኔኤኮ ፖኦሊሳ ባሺንቴያ ማሂ ሃይሶ ኔጉዋዎ ኬኤዛንዳኔ፤ 10 ኔ ዓዴ ዔርቴ ያልዚ ዓሲ ማዔሢና ዲ ዛና ዋላ ዓኣ ዓሳኣ ያልዚ ያላ ደዲ ዓሲ ማዔሢ ዲሰራዔኤሌይዳ ናንጋ ዓሳ ቢያሢ ዔራሢሮ ኔኤኮ ዘቢጉዲ ጫርቃ ፖኦሊሳታዎ ጎጲ ዋኣንዳኔ፤ 11 ዬያሮ ሃሢ ታ ነና ዘራሢ፡- ዓጮ ጉቤይዳፓ ጌይዎ ዳኣኔፓ ዳንዲ ቤርሳቤ ሄላንዳኣና ዓኣ፤ ሚርጉማ ባዚ ዓቺ ማኣሻላጉዲ ማዔ ዲሰራዔኤሌ ዓሶ ቢያ ፔቴይዳ ቡኩሲ ኔኤኒ ኔኤሮ ዔያቶኮ ያሎ ሱኡጋሢ ማዒ ዔቢ ዴንዴ። 12 ዓይጎ ቤሰካኣ ዲ ዓኣሺንቶም ዳውቴ ኑ ኮዒ ዴንቃንዳኔ፤ ሻቺ ሳዎይዳ ዋርቃሢጉዲ ኑ ዲ ዛይዳ ዲኣናንዳኔ፤ ዲ ዛኣ ማዎም ዲ ዛ ጊንዎ ሃንታ ዓሶፓ ፔቴታዎ ዓታንዳ ዓሲ ባኣሴ። 13 ዙሎ ሹጮና ኬልቆና ካታማ ዲ ፑኒ ጌሌቴያ ኑ ዳራ ጉቤ ሱሲ ዔኪ ሙካዛ

ካታሚሎ ማዕ ካሮና ቱኪ ዓርቁ ጎቺ ዔኪ ኑ ደኦጫ ኬኤራንዳኔ፤ ጌማሮ ዑፃ ፔቴ ሹቺታፃ ዓታዓኬ» ጌዔኔ።

14 ዒማና ዓቤሴሎሜና ዒሰራዔኤል ዓሶ ቢያሢና፡- «ዓኪፆፔሌ ዘራፓ ሁሻዬ ዘራ ባሼኬ» ጌዔኔ፤ ዓቤሴሎሜይዳ ፑርታ ባኣዚ ሄላንዳጉዲ ናንገና ናንጋ ጎዳ ዓኪፆፔሌ ዘሮ ዔያታ ዔኩዋጉዲ ማሄኔ።

ዳውቴኮ ቶሊ ዴንዲፆ

15 ዬካፓ ሁሻዬንታ ዓኪፆፔሌንታ ዓቤሴሎሜና ዒሰራዔኤል ዓሶ ሱኡጎና ዘራ ዘሮ ሁሻዬ ቁኤሶንሢ፤ ሳዶቁና ዓቢያታሪናም ኬኤዘኔ፤ 16 ቃሲ ሃሃ ዒ፡- «ዓካሪ ሃኖ ዒባኒ ዓሲ ናንጉዋ ዳውሎይዳ ዓኣ ዎሮና ፒንቆ ካራ ዎርቁዋጉዲ ዑኩና ኪኢታ ዓሲ ዳኪ ዳውቴም ኬኤዙዋቴ! ዒዛንታ ዒዛ ዓሶንታ ዓዲንቲ ሃይቁዋጉዲ ሩኤሪ ዮርዳኖሴ ዎሮና ፒንቆንጎ!» ጌዔኔ።

17 ዒማና ዓቢያታሪ ናኣዚ ዮናታኣኔና ሳዶቁ ናኣዚ ዓሂማዓፄና ካታሞ ዔያታ ጌላኣና ዓሲ ዴንቃንዳኔ ጌይ ዒጊጨሁሢሮ ዬሩሳላሜኮ ኮይላ ዓኣ ዋኣፃ ዓልቃ ዔንሮጌሌይዳ ካፓኔ፤ ማዶ ማዶ ፔቴ ዉዲር ናይሰኩና ቢያ ዎዴ ዒኢካ ሙኪ ሙኪ ማዲንቲ ባኮ ዔያቶም ኬኤዛዛ ዔያታ ዴንዲ ካኣቲ ዳውቴም ኬኤዘኔ። 18 ጋዓንቲ ፔቴ ኬሊ ፔቴ ናይሰኩይ ዔያቶ ዴንቃፃ ዴንዲ ዓቤሴሎሜም ኬኤዘኔ፤ ዬያሮ ዔያታ ባሁሪሜ ካታሞይዳ ዓኣ ፔቴ ዓሲሰኬያ ማኣራ ፑናኒ ጳሽኪ ዴንዴኔ፤ ዓሢኮ ማኣሮ ካራ ዔቴ ቦኣኮናያ ዓኣንቲ ዔያታ ዒኢካ ጌሌኔ። 19 ዬያ ዓሢኮ ማቻ ዔቶ ካራ ዜዲ ዓጊ፡ ዓሲ ዓልቲ ዛጉዋጉዲ ጊዳ ሃኣኮ ሚጨኔ። 20 ዓቤሴሎሜኮ ዶንዛ ዬኖ ማኣሮ ሙኪ ሳኣሌሎ ኮይላ፡- «ዓሂማዓፄና ዮናታኣኔና ዎካዳይ?» ጌይ ዶኦጨኔ።

ዒዛ ማሃዮ፡- «ዔያታ ዎሮና ፒንቁ ዴንዴኔ» ጌዔኔ።

ዬንሢ ዓሶንሢ ኮዒ ዔያቶ ዴንቃኒ ዳንዳዒባኣሢሮ ዬሩሳላሜ ማዒ ዴንዴኔ። 21 ዔያታ ዴንዴሰካፓ ዓሂማዓፄና ዮናታኣኔና ዑኩና ዔታፓ ኬሰኪ ዴንዳፆ ማዲንቲ ባኮ ቢያ ካኣቲም ኬኤዘኔ፤ ዓኪፆፔሌ ዒዛም ማሌ ባኮ ኬኤዛዞ፡- «ዑካዲ ዎሮና ፒንቁ!» ጌዔኔ። 22 ዬያሮ ዳውቴና ዒዛ ዓሶና ዮርዳኖሴ ዎሮና ዴንዲ ሳዓ ካራንዳፆ ሄላንዳኣና ቢያሢ ፒንቁኔ።

23 ዓኪፆፔሌ ዘራ ዘሮ ዓሳ ዔኪባኣሢ ዔራፆ ሃሮ ፔኤኮ ኮኣሪ ዒ ናንጋ ካታሞ ማዒ ዴንዴኔ፤ ዬካፓ ቢያ ባኮ ሳኣራፆ ሱዲንቲ ሃይቁ ዔያቶ ማኣሮ ዓሶ ዴኡኮ ቤዛ ዴኡቴኔ።

24 ዒማና ዓቤሴሎሜና ዒሰራዔኤል ዓሶ ቢያሢና ዮርዳኖሴና ሙኪ ፒንቃዛ ዳውቴ ዴንዲ ማሂናይሜ ጌይንታ፡ ዳካ ካታሚሰኬና

ሄሌኔ፤ 25 ዓቤሴሎሜ ዒዮዓቤ ቤዛ ዓማሳ ጌይንታሰኬያ ፖኦሊሶኮ ሱኡጌ ማሂ ዶኦሪኔ፤ ዓማሳ ዒሰራዔኤሌ ዓሲ * ማዔያ ዩቴሪ ናይኬ፤ ዒንዳ ዒዛኮ ዓቢጋይሎ ጌይንታያ ናሃሼ ናይ ማዓዛ ዒዮዓቤኮ ዒንዶ ፃሩያኮ ጌርኬ። 26 ዩካፓ ዓቤሴሎሜና ዒዛኮ ፖኦሊሶና ጌሌዓዴ ዓጮይዳ ዲንኪ ደዔኔ።

27 ዳውቴ ማሂናይሜ ሄላዛ ዓሞኦኔ ዓጮይዳ ዓኣ ራኣባ ጌይንታ ካታማፓ ሙኩ፥ ናዖሴ ናኣዚ፥ ሸቢኔንታ ሎዴባሬ ካታማፓ ሙኩ፥ ዓሚዔኤሌኔ ናኣዚ ማኪሪኔንታ ጌሌዓዴ ዓጮይዳ ዓኣ ሮጊሊሜ ጌይንታ ካታማፓ ሙኩ፥ ባርዚላይኔንታ ዒዛና ካኣሜኔ። 28-29 ዔያታ ዒሚና ሸለዔንታ ዖቲንታ ሃሃ ዜዲያ ዔኪ ሙኩኔ፤ ዩያጉዲ ሃሃ ዳውቴንታ ዒዛኮ ዓሰንታ ሙዓንዳጉዲ፡- ዛርጌ፥ ዔልዓ፥ ዲኢሊ፥ ሚቾና ቲሻ፥ ዖሞዖላ፥ ሪንጋ፥ ዔኤሲ፥ ዲኦቂ ሙሸኮንታ ፒሌንታ ማራይያ ዔኪ ሙኩኔ፤ ዩያ ዔያታ ዔኪ ሙኩህ ዳውቴንታ ዒዛ ዓሰንታ ዓሲ ናንጉዋ ዳውሎይዳ ናይዲንቲ ሃሃ ዴኤቢንቲ ላቤያናንዳኔ ጌይኬ።

18

ዓቤሴሎሜ ዖሎና ባሺንቲ ሃይቄህ

1 ካኣቲ፥ ዳውቴ ዒዛ ዓሰ ፔቴይዳ ቡኩሳዖ ሺያ ሺያ ፓቂ ዩያቶኮ ሱኡጌ ዶኦሪ፥ ጊንሃ ሃሃ ፃኤታ ፃኤታ ማሂ ፓቂ ዩያ ፓቂንቲ ዓሰኮዋ ዖሎ ሱኡጌ ዶኦሪኔ፤ 2 ዒሚና ዒ ዔያቶ ሃይህ ፓቂ ዳኬኔ፤ ዩያቶ ፓቂንቲ ዓሰኮ ሱኡጌ ማዔ ዓሳ ዒዮዓቤንታ ዒዛኮ ጌርሲ ዓቢሻዩንታ ጋኣቴይዳ ሸይንቲህ፥ ዒታዩንታኬ፤ ካኣቲ ዔያቶ ዳካኣና ዓሰ ኮራ፡- «ታኣኒያ ዒንሂና ዋላ ዓኣዳንዳኔ» ጌዔኔ።

3 ዔያታ ጋዓንቲ፡- «ኔ ኦኡና ዋላ ዓኣዲፖ፤ ኦጊዳፓ ዛላ ጊንሂም ባሺንቲ ጳሽኬቴያ ዛሎ ኦኡኮ ዎደናቴያ ኦ ሞርኮም ዩይ ዔኤቢቲዋኣሴ፤ ኔኤኒ ኦኡኮ ታጳ ሺያ ዓሲፓ ባሺኬ፤ ዩያሮ ኔኤኒ ሃይካ ካታማ ዓቲፓፓ ኦም ኮይሳ ባኣዚ ዳኬቴ ቃራኬ» ጌዔኔ።

4 ካኣቲ ዔያቶም፡- «ዒንሂም ኮሺ ማዓ ባኣዚ ቢያታ ማዳንዳኔ» ጌዔኔ፤ ዩካፓ ካታሞ ጌሎ ዲሮ ካራ ዔቂ ሺያና ፃኤታና ማዒ ፓቂንቲ፥ ኬሰኪ ኬሰኪ ዴንዳ ፖኦሊሶ ዛጌኔ። 5 ዒሚና ዒዚ ዒዮዓቤንታ ዓቢሻዩንታ ዒታዩናም፡- «ታኣም ማሊፓፓ ዴጌህ፥ ዓቤሴሎሜ ዎዲፖቴ» ጌይ ዓይሄኔ፤ ዳውቴ ዩያ ጌዒ ፖኦሊሶ ሱኡጎ ዓይሄኣና ፖኦሊሳ ቢያ ዋይዜኔ።

* 17:25 17:25 ዒሰራዔኤሌ ዓሲ ጋዓዛ፡- ፔቴ ፔቴ ማፃአፖይዳ «ዒሰማዔኤሌ ዓሲ» ጋዓኔ፤ (1፻ኦሲ. ዓሃኬ 2:17)።

6 ደውቴኮ ፖኦሊሳ ካታሞ ዙላ ዓኣ ዓጮ ደንዲ ዒሰራዔኤሌ ዓሶ ዔፕሬኤሜይዳ ዓኣ ደኤሎ ካያ የሌኔ፤ 7 ዒማና ዒሰራዔኤሌ ዓሶ ደውቴ ዓሳ የሊ ባሼኔ፤ ዩኖ ኬሎ ዔያቶኮ ሃይቄ ዓሳ ላማታሚ ሺያ ዓሲታሢሮ ፑርታ ባሺንቲ ዔያታ ባሺንቲኔ፤ 8 የላ ካታሞ ዙላ ዓኣ ደማ ደማ ቤዘይዳ ደዲ ደዲ ዓኣዳሢሮ የሎና ዎዶና ዓሶፕ ደኤሎ ባኣካ ሃይቄ ዓሳ ባሼኬ።

9 ዒማ ኬሎ ዔርቲባኣንቲ ዓቤሴሎሜ ደውቴ ዓሶይዳፕ ዳካ ዓሰና ካኣሜኔ፤ ዒማና ዒዚ ባቁሎ ቶጊ ጳሽካሢሮ ባቁላ ፔቴ ዳኤፒ ሻኣቢ ደሜና ደንዳንቲ ሻኣቦ ካኣፕ ዒዛኮ ቶኦኮ* ዓርቁም ባቁሌላ ቶኮ ደማፕ ደንዳዛ ዒዚ ዠባራ ሱዲንቲ ዓቲኔ። 10 ደውቴ ፖኦሊሶፕ ፔቴይ ዩያ ዛፓየ ዒዮዓቤ ኮይላ ደንዲ፡- «ጎዳ! ዓቤሴሎሜ ሻኣቢዳ ሱዲንቲ ዓኣንቲ ታ ደንቁኔ!» ጌይ ኬኤዜኔ።

11 ዒዮዓቤ ዒማና፡- «ኔ ደንቁየ ዓይጋ ዎዶዎ ሃሼይ? ዎንዴ ኔ ዩያይዳቴ ታ ኔኤም ዪኤታና ታጳ ደንጎ ጊራኣሜ ማዓንዳ ሹቺ ቢራና ኬርና ኔ ፔቴና ቱካንዳ ዚናኣሬ ዒንጋንዳንቲኬ» ጌዔኔ።

12 ዓሢ ጋዓንቲ፡- «ታጳ ፔቴ ኪሎ ማዓንዳ ሹቺ ቢራ ኔ ዒንጌቲታየ ካኣቲናፖ ታ ኩቻታ ዎዶዓኬ፤ ካኣቲ ኔናንታ ዓቢሻዩንታ ዒታዩንታም ታኣም ማሊጋፕ ዳጌሢ ዓቤሴሎሜ ዎዶፖቴ» ጌይ ዓይሢሢ ኑ ቢያሢ ዎይዜኔ፤ 13 ታኣኒ ዒማና ዎንዴ ካኣቲ ዓይሢሢ ሃሺ ዓቤሴሎሜ ዎዶቴ ካኣቲ ቢያ ባኮ ዎይዛሢሮ ዩያኣ ዎይዙዎየ ዓታዓኬ፤ ኔኤኒያ ታና ዓውሳዓኬ» ጌዔኔ።

14 ዩያሮ ዒዮዓቤ፡- «ሃሢ ታ ኔኤና ዎላ ጌሰቲ ጉሪ ኔጋኒ ኮዑዎሴ» ጋዓየ፡ ሃይሃ ዎርሢሢ ዔኪ ዓቤሴሎሜ ሱዲንቲ ዓኣ ሻኣቦ ዒዚ ሃይቁዎንቲ ሄሌሰካፕ ዳዶይዳ ዶርቢ ዶርቢ ጫርጌኔ። 15 ዒማና ሃሢ ዒዮዓቤኮ የሎ ዓንጎ ኬዳ ታጳ ፖኦሊሴ ዓቤሴሎሜ ዓኣ ቤዛ ሙኪ ማንጊ ዔቃየ ጫርጊ ጫርጊ ዒዛ ዎዶኔ።

16 ዩካፕ ዓሳ የሎ ሃሻንዳጉዲ ዒዮዓቤ ዛዩ ዎርቃዛ፡ ፖኦሊሳ ዒሰራዔኤሌ ዓሶ ደውሲየ ሃሺ ማዔኔ፤ 17 ዒማና ዔያታ ዓቤሴሎሜኮ ሌዘ ዔኪ ደኤሎ ባኣኮይዳ ዳኤፒ ዔቴ ዓኣንቲ ዒኢካ ዓጊ፡ ሌዘ ዑፃ ፑኡፒ ፑኡፒ ሹቺ ኮሊ ባይዚ ሃሼኔ፤ ዩያሮ ዒሰራዔኤሌ ዓሳ ጳሽኪ ፔ ማኣሪ ማኣሪ ደንዳኔ።

18 ዓቤሴሎሜኮ ሱንፃ ዔኤሊንታንዳ ዓቲንቁ ናይ ባኣሢሮ ዒዚ ቤርታ ሺምፔና ዓኣዶ፡- «ካኣቲ ዶኦጮ» ጌይንታ ቤሰካ ዒዛ ጳቂሢያ ማዓንዳጉዲ ዔኤቢ ማዢ ዳኣቤኔ፤ ዩያኮ ሱንፃ ዒ ፔ ሱንፃ ጌሢሢሮ ሃኖ ሄላኒ «ዓቤሴሎሜ ዳኣቦ» ጌይንታኔ።

* 18:9 18:9 ቶኦኮ ጋዓዙ፡- ፔቴ ፔቴ ማፃኣፕ «ቶኦኮ ጋፕና» ጋዓኔ።

ደውቲ ዓቤሴሎሜኮ ሃይቦ ዋይዜህ

19 ዩካፓ ሳድቁ ናኣዚ፡ ዓሂማዓፄ ዒዮዓቤ ኮይሉ፡- «ናንገና ናንጋ ጎዳ ሞርኮይዳፓ ዒዛ ዓውሴያ ማዓሂ ከኤዛ ኮዠ ሃይሶ ዔኪ ካኣቲ ኮይላ ታ ጳሽኮም» ጌዔኔ።

20 ዒዮዓቤ ጋዓንቴ፡- «ዔይዔ፤ ሃኖ ኔኤኒ ዔኪ ዴንዳንዳ ኮሺ ሃይሴ ባኣሴ፤ ጎዶንቴ ማሌ ከለና ኔ ዩያይዳኒ ዳንዳዓኔ፤ ሃኖ ካኣቲ ናዓ ሃይቁሂረ ኔ ዩያይዳባኣቲ ቃራኬ» ጌዔኔ። 21 ዩካፓ ዒዮዓቤ ዒዛም ማዶ ማዶ ፔቲ ዒቶጲያ ዓሲሰኬያ ዔኤላዎ፡- «ኔ ዛጌ ባኮ ቢያ ዴንዲ ካኣቲም ከኤዜ» ጋዓዛ፡ ማዶ ማዶሂ ሂርኪ ጌይ ዘጊ ቦንቾ ዔኤሊሂ ዔኤላዎ ጳሽኪ ዴንዴኔ።

22 ዒማና ዓሂማዓፄ፡- «ዓይጎ ባኣዚ ማዠንጉቲቲያ ማታ ባኣሴ፤ ታኣኒ ዴንዲ ዩያ ሃይሶ ከኤዘም ጌዔቲራ» ጌኤኔ።

ዒዮዓቤ ጋዓንቴ፡- «ታ ናዓሂዮ፡ ዓይጎሮ ሃሂ ኔ ዩያይዳኒ ኮዓይ? ዩያ ኔ ማዶሂረ ኔኤም ዒንጎንዶ ባኣዚ ባኣዋይ» ጌዔኔ።

23 ዓሂማዓፄ ሃሂ ጊንህ፡- «ዓይጎ ባኣዚ ማዠንጉቲቲያ ማታ ባኣሴ፤ ታ ዓኣዳኒ ኮዓኔ» ጌዔኔ።

ዒዮዓቤ፡- «ሂዴቲ ዴንዴ» ጌዔኔ፤ ዩያሮ ዓሂማዓፄ ዮርዳኖሴ ዶኦጮ ጎይዖና ጳሽኪ ኔጉሞዎ ዒቶጲዮ ዓሂ ቢሬኔ።

24 ደውቲ ዒማና ካታሞኮ ጋራ ዓኣ ዲዖ ካሮና ዙላ ዓኣ ዲዖ ካሮናኮ ባኣካ ፔጋዳ ቤሰካ ዴዒ ዓኣንቴ፡ ካታሞ ካፓ ዓሂ ዲዖ ዑፃ ዓኣ ሴኤሎ ከሰኪ ዓኣሂሮ ፔቲ ዓሲ ፔኤሮ ጳሽኪ ሙካንጉቲ ዴንቃዎ፡ 25 ዔኤሊንጉ ዒ ዛጌ ባኮ ካኣቲም ከኤዜኔ፤ ዩያሮ ካኣቲ፡- «ዒ ፔኤሮ ሌሊ ሙካያታቲ ኮሺ ሃይሴ ዔኪ ሙካያ ናንዳኔ» ጌዔኔ፤ ዩይ ዓሂ ሙኬ ጎይህ ዑኬኔ። 26 ዩካፓ ዓሂ ሃሂ ጳሽኪ ሙካ ማሌ ዓሲ ዴንቃዎ ካታሞ ዲዖ ካሮ ካፓሂ ዔኤሊ፡- «ሃኣሶ ዛጌ! ማሌ ሃሂ ፔቲ ዓሲ ጳሽኪ ሙካኔ!» ጌዔኔ።

ካኣቲ ዒማና፡- «ዩይያ ኮሺ ሃይሴ ዔኪ ሙካያ ማዓኒ ዳንዳዓኔ» ጌዔኔ።

27 ካፓ ዓሂ ሃሂ፡- «ቤርታ ጳሽካ ዓሂ ዓዳ ሳድቁ ናኣዚ ዓሂማዓፄ ማላኔ» ጌዔኔ፤ ካኣቲ፡- «ዒዚ ኮሺ ዓሲኬ፤ ዩያሮ ዒ ኮሺ ሃይሴ ዔኪ ሙካንዳኔ» ጌዔኔ።

28 ዒማና ዓሂማዓፄ ዑኡዘ ዴጊዲ፡- «ኑ ባሽኔ!» ጌዔኔ፤ ሃሂ ካኣቲ ቤርቶይዳኣ ባሊቲና ሳዓ ላሂ ቦንቾ ዔኤሊሂ ዔኤላዎ፡- «ካኣቲዮ! ኔኤም ዋይዘ ዒፄ ዓሶ ያሊ ኔ ባሻንዳጉዲ ማኣዴ፡ ናንገና ናንጋ ጎዳ ማዓ ኔ ያኣዛሂ ጋላቲንቴያ ማዎም» ጌዔኔ።

29 ዓሂማዓፄ ኮይላ ካኣቲ፡- «ዴጌሂ፡ ዓቤሴሎሜ ዎዚ ዓኣይ?» ጌይ ያኦጨኔ።

ዒዚ ማሃዎ፡- «ጎዳሢዮ! ኔኤኮ ፖኦሊሶ ዓይሣ ዒዮባቤ ኔ ባንሢ ታና ደካኣና ዓሲ ዲርጋንቴ ታ ዳንቄኔ፤ ጋዓንቴ ዬይ ዓይነታቴያ ታ ዔሪባኣሴ» ጌዔኔ።

30 ዬካፓ ካኣቲ ዒዛ፡- «ሃሴኬያ ዓኣዲ ዔቄ» ጌዔኔ፤ ዒዚ ሴካ ዶጪ ዔቄኔ።

31 ሄሊሳዎ ማዶ ማዳ ዒቲዮጲዮ ዓሢ ሙኪ ካኣቲ ኮይላ፡- «ካኣቲዮ! ኮሺ ሃይሴ ታ ዔኪ ዬዔኔ፤ ኔኤም ዋይዞ ዒፃ ዓሶ ዖሊ ኔ ባሻንዳጉዲ ሃኖ ናንገና ናንጋ ጎዳ ኔና ማኣዴኔ!» ጌዔኔ። 32 ካኣቲ ዒዛ ኮይላ፡- «ዳጌሢ፥ ዓቤሴሎሜ ዎዚ ዓኣይ?» ጌይ ዖኦጩኔ።

ዬይ ማዶ ማዳሢ፡- «ጎዳሢዮ! ዒዛይዳ ማዳንቴ ባካ ኔ ሞርኮንታ ኔኤም ዋይዞ ዒፃ ዓሶ ሄሎንጎ!» ጌዔኔ።

33 ዬያሮ ካኣቲ ሚርጌና ዖዪ ካታሞ ኬልቁ ዲርቆና ዲያ ዑፃ ዓኣ ጋሮ ጌሊ ዖዳዖ ዬኤኬኔ፤ ዒማና ዒዚ፡- «ታ ናኣዚዮ! ታ ናኣዚዮ! ዓቤሴሎሜ! ዓቤሴሎሜ፥ ታ ናኣዚዮ! ታ ሃይቁዎይ! ታ ናኣዚዮ! ዓቤሴሎሜ፥ ታ ናኣዚዮ!» ጌይ ቃዪ ዬኤኬኔ።

19

ዒዮባቤ ዳውቴ ጎሬሢ

1 ካኣቲ፥ ዳውቴ ዒዛኮ ናኣዚ ዓቤሴሎሜ ሃይቁሢሮ ኮሺ ዖዪ ዬኤካሢ ዒዮባቤ ዋይዜኔ፤ 2 ናኣዚ ሃይቁሢሮ ካኣቲ ዖያሢ ፖኦሊሳ ዋይዛዎ ዖሎና ባሻሢሮ ዎዛዲያ ሃሺ ዖዪሢ ዓርቄኔ። 3 ዬያሮ ዔያታ ዖሎ ቤዛፓ ጊንሢም ጳሽኬ ፖኦሊሴጉዲ ዔኤቢ ጎዑዎዎ ካታሞ ሙኪ ጌሌኔ፤ 4 ካኣቲ ዒማና ዓኣፖ ካሮ ፔ ኩጮና ዓርቄ፡- «ታ ናኣዚዮ! ታ ናኣዚዮ፥ ዓቤሴሎሜ! ዓቤሴሎሜ፥ ታ ናኣዚዮ!» ጌይ ጌይ ቃዪ ዬኤኬኔ።

5 ዬያሮ ዒዮባቤ ካኣቲ ማኣሪ ዳንዳዎ፡- «ኔኤኮ ዓቲንቆ ናኣቶንታ ዉዲሮ ናኣቶንታ ሃሢ ኔኤኮ ላኣሎንታ ጊንፃኣ ማቸንሢንታ ዓውሴ ዓሶ ሃኖ ኔ ቦርሲሴኔ፤ 6 ኔኤኒ ኔና ናሽካዞንሢ ዒፃኔ፤ ኔና ዒፃ ዓሶ ጋዓንቴ ኔ ናሽካኔ፤ ኔኤኮ ፖኦሊሶ ሱኡጎና ፖኦሊሶናም ፔቴታዎ ኔ ማሉዎያ ማዔሢ ፔጋሲ ኔ ዳዌኔ፤ ዓቤሴሎሜ ሽምፔና ዓቲም ኦ ቢያሢ ባይቆያታቴ ሚርጌና ኔ ዎዛዳንዳያታሢ ታ ዔሬኔ፤ 7 ጋዓንቴ ሃሢ ዔቄጋፓ ኔኤኮ ፖኦሊሶ ዶዲሼ፤ ኔ ዬያይዲባኣቴ ዚሮ ጉቴ ዔያቶይዳፓ ፔቴ ዓሲታዎ ኔኤና ዎላ ማዒዲዎኣሢ ናንገና ናንጋ ጎዳ ሱንፃና ታ ኔኤም ጫኣቃኔ፤ ዬይ ኔኤኒ ናንጌ ዎዶይዳ ኔና ሃሌ ሜታፓ ቢያ ዑሢ ዓኣዳ ፑርታያ ማዓንዳኔ» ጌዔኔ። 8 ዬያሮ ካኣቲ ዳዔ ቤዛፓ ዔቄ ዓኣዲ ካታሞ ጌሎ ዲሮ ካራ ዳዔኔ፤ ዒማና ዒዛ ዓሳ ዒዚ ዒኢካ ዓኣሢ ዋይዛዎ ቢያሢ ዒዛ ኮይላ ቡኬኔ።

ደውቲ ዩሩሳሌም ማዒ ዴንዳኒ ዔቁህ

ዩያኮ ቤርታዒ ሲሰራዔኤሌ ዓሳ ጉቤ ፑሊንቲ ፔ ማኣሪ ማኣሪ ዴንዳኒ ዓኣኔ፤ 9 ዒማና ዒሰራዔኤሌ ዓጮ ቢያይዳ ዓኣ ዴራ ዋላ ዣሎ ዓርቄኔ፤ ዔያታ ዋሊ ኮይላ፡- «ካኣቲ፡ ደውቲ ኑ ሞርኮ ኩጫፓ ኑና ዓውሴኔ፤ ፒሊሰፄኤም ዓሶ ኩጫፓኣ ኑና ቶሊሴኔ፤ ሃህጊ ጋዓንቲ ዒ ዓቤሴሎምሮ ፑሊንቲ ዓጮ ሃሺ ዴንዳኔ። 10 ኑኡኮ ሱኡጌ ማዓንዳጉዲ ዓቤሴሎም ኑኡኒ ቲሽኪ ካኣታህኔ፤ ጋዓንቲ ዒዚ ያሎይዳ ሃይቄኔ፤ ዓካሪ ካኣቲ ደውቲ ማህ ዔኪ ሙካኒ ጋዓ ዓሲ ዋይቲ ባይቄይ?» ጋዓኔ።

11 ዒሰራዔኤሌ ዓሳ ዋላ ዩያ ጌዒ ጌሰታ ባኮ ካኣቲ፡ ደውቲ ዋይዜኔ፤ ዩያሮ ቄኤሶ ማዔዘንህ፡ ሳዶቄና ዓቢያታሬና ዳኪ ዪሁዲ ሱኡጉ፡- «ካኣቲ ማኣዲ ፔ ካኣቲሞ ማኣሪ ማህ ዔኪ ሙካኒ ዋይታዛ ዒንህጊ ጋፒንህጊ ዓሲ ማዔይ? 12 ዒንህጊ ታኣኮ ጌርሲንህጊ ማዔ ዒጊኖኬ፤ ሂዳዖ ታና ማህ ዔካኒ ቤርታሳ ዓሲ ማዒያ ሃሺ ዓይጋ ዒንህጊ ጋፒንህጊ ዓሲ ማዓይ?» ጌዒ ያኡጨሲሴኔ፤ 13 ዩያጉዲ ሃህጊ ዓማሳሞ ኬኤዘዮ፡- «ኔኤኒ ታኣኮ ጌርሲ ማዔ ዒጊናህኬ፤ ሃይማፓ ዓርቃዖ ዒዮዓቤ ቤዛ ታኣኮ ፖኦሊሶ ሱኡጌ ታ ኔና ማሃንዳኔ፤ ታ ዩያይዲ ባኣቲ ናንገና ናንጋ ጎዳ ታና ባይዘም!» ጋዓኔ ጋዓንዳጉዲ ዔያቶ ዓይህኔ። 14 ዩይ ደውቲ ጌሰቲ ጌኤዛ ዪሁዲ ዳሮ ቢያህኮ ዒና ዒዛ ባንህጊ ማህኔ፤ ዩያሮ ደውቲ ፔኤኮ ፖኦሊሶ ሱኡጉ ቢያህና ዋላ ማዒ ሙካንዳጉዲ ዒዛም ኪኢታ ዳኬኔ።

15 ደውቲ ማዒ ሙኪያይዳ ዓኣንቲ ዪሁዲ ዓሳ ዮርዳኖሴ ዋሮ ሄላንዳኣና ጎይህ ዴንዳኒ ሞኦኪ ዔኬኔ፤ ዒዛና ዋላ ዋሮ ዒዛ ዔኪ ፒንህሂ ማሊ ጌልጌላ ሄላንዳኣና ዓሳ ሙኬኔ፤ 16 ዒማና ባሁሪምይዳ ሸይንቲያ ቢኢኒያም ዓሲ ማዔያ፡ ጌራ ናኣዚ ሺምዒ ዪሁዲ ዓሶና ዋላ ካኣቲ ጎይህ ሞኦኪ ዔካኒ ዮርዳኖሴ ዋሮ ዑኬና ዴንዳኔ፤ 17 ዒዛና ዋላ ቢኢኒያም ያጸ። ማዔያ ፔቲ ሺያ ዓሲ ዓኣኔ፤ ሃህጊ ሳኣዖኦሌ ማኣራ ማዶ ማዶ ዓሶኮ ሱኡጋህ፤ ጂባ ታጸ ደንጎ ዓቲንቄ ናይና ላማታሚ ማዶ ማዶ ዓሲና ዔኪ ሙኬኔ፤ ዔያታ ዮርዳኖሴ ዋሮ ሩኡሪና ሙኪ ሄላዖ ካኣቲ ቤርቶ ሺኢኬኔ። 18 ዔያታ ካኣቲንታ ካኣቲና ዋላ ዓኣ ዓሶንታ ዋኣዖና ፒንቆ ጎንጎና ዔኪ ፒንህሂ ሃህጊ ካኣቲ ኮዓ ባኮዋ ቢያ ማዳኒ ዮርዳኖሴ ዋሮና ፒንቄኔ።

ደውቲ ሺምዒም ዓቶም ጌዔህ

ካኣቲ ዋሮና ፒንቃኒ ጊኢጊንታኣና ጌራ ናኣዚ፤ ሺምዒ ሙኪ ዒዛኮ ቤርታ ሎኦሚ ላሃዖ፡- 19 «ካኣቲዮ! ዩሩሳሌምፓ ኔ ኬሰኪ ዴንዳ ኬሎና ታኣኒ ማዶ ዳቢንቶ ታኣም ዓቶንጎ ጌዔ፤ ታና ኮሚፖ፤ ዩያ ዛሎ

19:16 19:16 2ሳሙ. 16:5-13::

ማይ ማሊፖ፤ 20 ታ ጎዳሢያ! ጎሜ ታ ማዳሢ ታኦኒ ዔራኔ፤ ጋዓንቴ ሃኖ ኬዶ ዛሎ ዒሰራዔኤሌ ፃጰፓ ቤርታሳያ ማዒ ኔና ጎይሣ ሞኦኪ ዔካኒ ታ ሙኮኔ» ጌዔኔ።

21 ጳሩያ ናኣዚ ዓቢሻዬ ዒማና፡- «ናንገና ናንጋ ጎዳ ዶኦሚ ካኣታሢ ካኣቲ ጫሽኬሢሮ ሸምዒ ዎዎዶንዶያ ኮይሳኔ» ጌዔኔ።

22 ደውቴ ጋዓንቴ ዓቢሻዬና ዒዛኮ ጌርሲ ዒዮዓቤና ኮይላ፡- «ዒንሢ ዬካ ዓይጌ ጌልዜይ? ዒንሢ ታኣም ሜቶ ማኸን ኮዓ? ሃሢ ዒሰራዔኤሌኮ ካኣታሢ ታናኬ፤ ሃሢ ገንሣ ሃናኣ ኬሎ ዓይጎ ዓሲያ ማዎም ዒሰራዔኤሌይዳፓ ዎዶንታዓኬ» ጌዔኔ። 23 ዒማና ካኣቲ ሸምዒም፡- «ኔና ታ ዎዶሽንዳዎሴ» ጌይ ጫኣቄኔ።

ደውቴ ማፒሶሼቴማኣ ዓቶም ጌዔሢ

24 ዬካፓ ሃሢ ሳኣዎኦሌኮ ናኣዚ ናዎ ማዔሢ፡ ማፒሶሼቴ ካኣቲ ጎይሢና ሞኦኪ ዔካኒ ሙኮኔ፤ ካኣቲ ዬሩሳላሜ ሃሺ ኬሰከማፓ ዓርቃዎ ዴንዲ ዒዚ ገንሣ ባሺሢና ማዔ ኬሎ ሄላንዳኣና ማፒሶሼቴ ፔኤኮ ቶኮ ማሰቲባኣሴ፤ ቡኤጮዎ ማኤዲባኣሴ፤ ማኣዓሢያ ማሰከባኣሴ። 25 ማፒሶሼቴ ዬሩሳላሜፓ ዔቂ ካኣቲ ሞኦኪ ዔካኒ ዒ ዓኣ ቤዘ ሙካዘ ካኣቲ ዒዛ ኮራ፡- «ማፒሶሼቴ፡ ዓይጋ ኔ ታኣና ዎላ ዴንዲዎ ዓቲይ?» ጌዒ ዎኦጮኔ።

26 ዒዚ ማሃዎ፡- «ካኣቲዮ! ኔ ታና ዔራሢጉዲ ታ ዎሶኬ፤ ኔኤና ዎላ ታ ዴንዲኒ ኮዓዎ ታኣኮ ዓይላሢ ታኣኒ ሃሮ ታኣም ኮኦሬ» ጌይ ዓይሣዛ፡ ዒዒ ታና ሃሺ ዓኣዴኔ፤ 27 ካኣቲዮ! ዬያ ሌሊቱዎንቴ ታ ዛሎ ኔኤም ሌኡቄ ኬኤዘና ባኣዚያ ዓኣኔ፤ ጋዓንቴ ኔኤኒ ዎኦሲ ኪኣታንቻጉዲ ማዔሢሮ ኔኤኒ ማዳኒ ኮዔ ባኣዚ ማማዴ። 28 ካኣቲዮ! ታ ዓዶ ማኣሮ ዓሶ ቢያ ዎዎዶንዶ ዓሲኬ፤ ካኣቲዮ! ኔኤኒ ጋዓንቴ ታኣኒ ኔ ማኣራ ኔኤና ዎላ ዴዒ ሙዓንዳጉዲ ማሄኔ፤ ዬካፓ ዑሣ ኮሺ ባኣዚ ታኣም ማዶንታንዳጉዲ ታ ዎኦጮንዳያ ኮይሱዎሴ» ጌዔኔ።

29 ካኣቲ ዒዛም፡- «ሚርጌ ባኣዚ ማይ ኔ ጌሰታንዳያ ኮይሱዎሴ፤ ኔናንታ ዒባንታ ሳኣዎኦሌኮ ዓኣ ባኮ ዎላ ገሸቲ ዒንሢ ዔካንዳጉዲ ታ ዓይሣኔ» ጌዔኔ።

30 ማፒሶሼቴ ዒማና፡- «ካኣቲዮ! ቢያ ቆሎ ዒባ ዔኮንጎ፤ ኔኤኒ ኮሸና ኔ ማኣሪ ማዔሢ ሌሊ ታኣም ገደንዳኔ» ጌዔኔ።

ደውቴ ባርዚላዬም ማዴ ኮዦ ማዴ

31 ጌሌዓዴ ዓሢ፣ ባርዚላዬ ካኣተና ዋላ ካኣተ ዔኪ ዋሮና ፒንሣኒ ሮጊሊሜፓ ሙኩኔ፤ 32 ባርዚላዬ ዒማና ሌዓ ዒዛኮ ሳሊታሚ ማዔያ ጋርቹ ዓሲኩ፤ ዒዚ ሚርጌና ፆርጎቹታሢር ካኣተ ደውቲ ማሂናይሚይዳ ዓኣ ዋዶና ሙፆንዶ ባኣዚ ካኣተም ዳካኔ፤ 33 ዬያሮ ካኣተ ባርዚላዬ ኮራ፡- «ታኣና ዋላ ዬሩሳላሜ ቢሬ፤ ታኣኒ ኔኤም ኮይሳ ባኣዚ ዒንጌም ኔኤኒ ዋዛዲ ኮሺ ናንጊ ናንጋንዳ» ጌዔኔ።

34 ባርዚላዬ ጋዓንቴ፡- «ካኣተዮ! ማይ ሃይፓ ሴካ ሚርጌ ሌዔ ታ ናንጋዓኩ፤ ዬያሮ ኔኤና ዋላ ዓይጋ ታ ዓኣዳንዳይ? 35 ታኣኮ ሃሢ ሌዓ ሳሊታሚኩ፤ ማይ ታኣኒ ዋዛሳ ባኣዚንታ ዋዛሱዋ ባኣዚንታ ዲማሲ ዔራንዳ? ሙፆ ባኮንታ ዑሽኮ ባኮንታኮ ዓኣሡዋ ዲማሲ ታ ዔራንዳ? ታኣኮ ዋያ ዓተንቆንታ ላኣሎንታ ኮርጋ ኮፆ ዋይዘንዳ? ካኣተዮ! ኔና፡ ታ ጎዳሢም ሚሌ ኬዲ ታ ማዓሢ ማይ ዓይጌንዴርዳይ? 36 ሃሢ ጊንሣ ካኣተ ታኣም ማዴ ባኮኮ ሃያጉዴ ዴኤፒ ባኣዚ ማዲ ማሃሢያ ዓይጌንዴርዳይ? ጋዓንቴ ሃሢ ታኣኒ ዮርዳኖሴ ዋሮና ፒንቁ ዳካ ኔኤና ዋላ ዴንዳንዳይ፤ 37 ዬካፓ ሃዳራ ታኣኒ፡ ኔኤኮ ዓይላሢ ታ ዓድንታ ታ ዒንድንታ ዲኤፖ ቤዛ ዲኤታኒ ማዒ ታ ማኣሪ ታ ዴንዶም፤ ሃኣዛጌ፡ ታ ናዓሢ ከምሃሜ ኔ ዓይሌ ማፆንጎ፤ ካኣተዮ! ዒዛ ዔኪ ዴንዲጋፓ ኔ ናሽኬ ባኣዚ ዒዛም ማዴ» ጌዔኔ።

38 ካኣተ ዒማና፡- «ዒዛ ታ ዔኪ ዓኣዳንዳይ፤ ዒዛም ታ ማዳንዳጉዲ ኔ ኮዓ ባኮ ቢያ ታ ማዳንዳይ፤ ኔኤማኣ ኔ ፆኦጫ ባኮ ቢያ ታ ኩንሣንዳይ» ጌዔኔ። 39 ዬካፓ ደውቲንታ ዒዛ ዓሶንታ ቢያሢ ዮርዳኖሴ ዋሮና ፒንቁኔ፤ ደውቲ ዒማና ባርዚላዬ ሄርቃፆ ዓንጃኔ፤ ባርዚላዬያ ፔ ማኣሪ ማዒ ዴንዴኔ።

ዪሁዳ ዴርና ዒሰራዔኤሌ ዴርና ደውቲ ዛሎ ማርሚሢ

40 ካኣተ፡ ደውቲ ዪሁዳ ዴር ቢያሢና ዒሰራዔኤሌ ዴርኮ ዛሎና ዋላ ዋሮና ፒንቁሰካፓ ጌልጌላ ባንሢ ዴንዴኔ፤ ከምሃሜያ ዒዛና ዋላ ፒንቁ ዴንዴኔ፤ 41 ዬካፓ ዒሰራዔኤሌ ዓሳ ቢያ ካኣተ ኮይላ ሙኩ፡- «ካኣተዮ! ኑ ጌርሰንሢ ማዔ፡ ዪሁዳ ዓሳ ኔና ዔኪ ፔኤም ማሃኒ፤ ዬያጉዲ ሃሢ ኔናንታ ኔ ማኣር ዓሶንታ ኔ ዓሶዋ ቢያ ዔኪ ዋላ ዮርዳኖሴ ፒንቁኒ ዔያቶ ኮይሳያ ማሂ ዓይጋ ማላይ?» ጌይ ፆኦጭኔ።

42 ዪሁዳ ዓሳ ዒሰራዔኤሌ ዓሶም፡- «ኑ ዬያ ማዴሢ ካኣተ ኑ ዒጊኒ ማዔሢር ሌሊኩ፤ ሂዳፆ ዬያ ዛሎ ዒንሢ ዓይጋ ዳጋዳይ? ኑ

19:31 19:31 2ሳሙ. 17:27-29።

ሙዔ ሙዖኮ ዒ ኑም ጨጌ ባአዚ ባአሴ፤ ሜሌ ዓይጎ ባአዚያ ዒ ኑም ዒንገባአሴ» ጌዔኔ።

43 ዒሰራዔኤሌ ዓሳ፡- «ዎዚ ዒ ዒንሢኮ ዒገኒ ማዔቴያ ዒንሢ ዒዛ ኮዓሰካፓ ባሼ ዒዛ ኑ ኮዓኔ፤ ካአቲ ካአታጅ ዴሮፓ ባሼሢ ኑ ፃጳኬ፤ ዒንሢ ኑና ቦሃሢ ዓይጎሮዳይ? ካአቲ ማሃ ዔኪ ሙኪዖኮ ቤርታዲ ዖኦጪዖ ዖኦጪዮሢ ኑናኪ!» ጌዔኔ።

ጋዓንቲ ዒሰራዔኤሌ ዓሰፓ ባሼ ዪሁዳ ዓሳ ዳውቲ ፔኤም ማሃኒ ዲዲ ማሮሜኔ።

20

ሼባዔ ማጅ ፑርታ ማጅ

1 ዬና ዎደና ሼባዔ ጌይንታያ ዒኔ ዔርቱዎ፡ ፑርታ ዓሰሰኬይ ጌልጌላይዳ ናንጋኔ፤ ዒዚ ሾይንቲሢ ቢኢኒያሜ ፃጳፓ ማዓዛ ቢኪሪ ጌይንታኔ፤ ዬይ ዓሢ ዛዬ ዎርቃዖ፡- «ዒሴዬ ናአዚ ዳውቲ ሃሹዎቲ! ኑዒዛ ዓሰ ማዒ ዴዓዓኪ! ዒሰራዔኤሌ ዓሰዮቲ ፔቲ ፔቲሢ ማአሪ ማአሪ ዴንዲዎቲ!» ጌይ ዒላቲኔ። 2 ዬያሮ ዒሰራዔኤሌ ዓሳ ዳውቲ ዒኢካ ሃሺ ሼባዔና ዓአጳኔ፤ ዪሁዳ ዴራ ጋዓንቲ ዮርዳኖሴፓ ዓርቃዖ ዴንዲ ዬሩሳላሜ ሄላንዳኣና ዒዛፓ ዲማዲ ባአሴ።

3 ዳውቲ ዬሩሳላሜይዳ ዓአ ዒዛኮ ካአቲዎ ማአሮ ሙካዖ ዒኢካ ዬያ ማአሮ ካፓንዳጉዲ ዒ ጌሢ፡ ታጳ ላአሎንሢ ዔኪ ፔቲ ማአሪዳ ጌሃዖ ካፓ ዓሰና ካፒሴኔ፤ ዔያቶም ኮይሳ ባአዚያ ቢያ ዒንጋንዳጉዲ ዓይሢኔ፤ ጋዓንቲ ዔያቶና ዒ ላሂባአሴ፤ ዬማፓ ዓርቃዖ ዴንዲ ሃይቃንዳያ ሄላንዳኣና ዓኒ ሃይቁ ዜኤሪንዳጉዲ ዒኢካ ጋሮይዳ ሌሊ ዴዒ ዔያታ ናንጌኔ።

4 ካአቲ ዒማና፡- «ዪሁዳ ዓሰ ቢያ ፔቲይዳ ዔኤሊ ቡኩሲፓፓ ሂንቶ ሃይካ ዔኪ ዬዔ» ጌዒ ዓማሳ ዓይሢኔ። 5 ዬካፓ ዒዚ ዔያቶ ዔኤላኒ ዳንዳዔኔ፤ ጋዓንቲ ካአቲ ጌዔ ኬሎና ማዒ ዒዚ ሙካኒ ዳንዳዒ ባአሴ። 6 ዬያሮ ካአቲ ዓቢሻዬም፡- «ሼባዔ ዓቤሎሎሜፓ ባሼ ሜቶ ኑጌዳ ዔኪ ዬዓንዳኔ፤ ሃሢ ታአኮ ፖኦሊሶ ዔኪፓፓ ገንዖ ዳውሲ ዴንዴ፤ ሃንጎ ዒ ዙሎ ዲርቆና ካታዎ ታአሲፓ ፔቲይዳ ጌሌቲ ቶላኒ ዳንዳዔኔ» ጋዓዛ፡ 7 ዒዮዓቤኮ ፖኦሊሳ፡ ኬሊታ ዓሳ፡ ፔሊታ ዓሰንታ ዖሎና ዔርቲ ሃንጎ ፖኦሊሳኣ ዓቢሻዬና ዎላ ቢኪሪ ናአዚ ሼባዔ ዳውሳኒ ዬሩሳላሜ ዴንዴኔ። 8 ዔያታ ጌባዖኦይዳ ዓአ ጴኤፖ ሹጫሢ ካሮ ሄላዖ ዓማሳና ካአሜኔ፤ ዒማና ዒዮዓቤ ጨንቾ ሳፓሮ ጎንጎና ደቁ ጎንጎናዎ ቃልሻ ቱኪ ዖልዚም ጌኢገንቲ ዓአኔ፤ ዒዚ

20:1 20:1 1ካአቶ. ማ 12:16፤ 2ዖኦሲ. ዓሃኬ 10:16። 20:3 20:3 2ሳሙ. 16:22።

በርቲሞ ሴካ ዴንዳንቴ ጨንቾ ዓፓራ ኪሪ ኬዴ፤ 9 ዩካፓ ዲዮባቤ ዓማሳ ኮይላ፡- «ታ ዲሻሦ! ኔ ዎዚ ዓኣይ?» ጋዓዖ ሄሂርቃያ ማሊ ሚዛቆ ኩጮና ቡኡጮ ዓርቄ፤ 10 ዲዮባቤ ባጎ ኩጮይዳ ጨንቾ ዓፓሮ ዓርቄሢ ዓማሳ ዴንቀባኣሢሮ ዔሩዋንቴ ጎጆይዳ ጨርገም ሩቅንታ ሳዓ ቶሪ ላሂ፤ ዓማሳ ቤዘማና ሃይቄሢሮ ዲዮባቤ ዲዛ ላሚ ጨርገባኣሴ፡፡

ዩካፓ ዲዮባቤና ጌርሲ ዓቢሻዬና ቢኪሪ ናኣዚ ሹባዔ ዳውሲዖ ዓርቄ፡፡ 11 ዲዮባቤ ፖኦሊሶይዳፓ ፔቴሰኬይ ዓማሳኮ ሌዘ ኮይላ ዔቄ፡- «ዲዮባቤና ዳውቴናሮ ማዔ ዓሳ ቢያ ዲዮባቤ ጊንዖ ዴንዳዎቴ!» ጌዔ፡፡ 12 ዲማና ዓማሳኮ ሌዘ ሰጉሢ ሌሊ ማዔ ጎይዖ ሳዛ ላሂ ዓኣይ፤ ዩይ ዓሢ ዲዮባቤኮ ፖኦሊሳ ጉቤ ዔቄ ዘጋሢሮ ሌዘ ጎቼ ዔኪ ጎሺ ጋርሲ ጌልዚ ዓፕላና ካንቄ ሃሹ፡፡ 13 ዓማሳኮ ሌዘ ጎይዖፓ ዩይ ዓሢ ሺኢሹሰካፓ ዓሳ ጉቤ ቢኪሪ ናኣዚ ሹባዔ ዳውሳኒ ዲዮባቤ ጊንዖ ዴንዳ፡፡

14 ሹባዔ ዲማና ዲሰራዔኤሌ ፃጰ ዓጮ ቢያኮ ጊዳና ቲቄ ዴንዲ ዓቤልቤትማዕካ ጌይንታ ካታሞ፡ ሃሢ ቢኪሪ ዓሶ ዓጮዎ ሄሌ፤ ዩያሮ ቢኪሪ ቶኦኪ ማዔ ዓሳ ቢያ ቡኪንቴ ሹባዔ ጊንዖ ካታሜሎ ጌሌ፤ 15 ዲዮባቤኮ ፖኦሊሳ ሹባዔ ዲኢካ ዓኣሢ ዋይዘዖ ዴንዲ ካታሜሎ ማንጌ፤ ዩካፓ ዙሎ ዘሎና ካታሞኮ ኬኤሎ ዲዖ ሄሊሲ ዓጪ ኩሊ፡ ዩይ ኬኤሎ ዲዖ ደዓንዳጉዲ ፃጰ ቦኣኪሢ ዓርቄ፡፡ 16 ዲማና ካታሞይዳ ናንጋ ፔቴ ጨንጫ ላኣሊሰከና ኬኤሎ ዲዖ ዑፃ ዔቃዖ ዑኡዘ ዳጊዲ፡- «ዋይዘዎቴ! ዋይዘዎቴ! ዲዮባቤ ሃይካ ሙካንዳጉዲ ኬኤዘዎቴ፤ ታ ዲዛና ዔኤቢ ጌሰታኒ ኮዓ፤» ጌዔ፡፡ 17 ዲዮባቤ ዲኢካ ሙካዛ ላኣሌላ፡- «ዲዮባቤ ጎዖሢ ኔናዳ?» ጌይ ዖኦጮ፡፡

ዲዚ ማሃዖ፡- «ሂዮ፡ ታናኬ» ጌዔ፡፡

ዲዛ፡- «ታ ጎዳሢዮ፡ ዋይዘ» ጌዔ፡፡

ዲዚያ፡- «ታ ዋይዘ፡ ኬኤዘ» ጌዔ፡፡

18 ዲዛ ኬኤዘዖ፡- «ሚና ሳኣቤኤሌ ካታሞ ዴንዲ ዲንሢ ዖኦጫ ባኮ ዲኢካፓ ዋይዘንዳ፤» ጌይንታሢሮ ዓሳ ዲማይዳ፡፡

19 ዲሰራዔኤሌይዳ ኮሺ፡ ሃሢ ጉሙርቅንታ ካታሜላ ሃናኬ፤ ኔኤኒ ሃሢ ሃኖ ዲሰራዔኤሌይዳ ዲንድ ማዔ ዓኣ ካታሜሎ ባይዘኒ ኮዓሢ ዓይጎሮዳይ? ናንጊና ናንጋ ጎዳሮ ማዔ ካታሞ ኔኤኒ ሻሂ ባይዘኒ ጋዓ?» ጌዔ፡፡

20 ዲዮባቤ ዲዘሞ፡- «ዲንሢኮ ካታሞ ታ ባይዘዓኬ፤ ፔቴታዖ ታ ሻሂ ደይሳዓኬ! 21 ኦ ማሊ ሙኬሢ ዩያይዳኒቴዋሴ፤ ጌሜራ ሚርጌ ዓኣ፡ ዔፕሬኤሜ ዓጮሎ ሾይንቴ ማዔ ቢኪሪ ናኣዚ ሹባዔ ካኣታሢ

ደውቴም ዋይዞ ዒፄኔ፤ ዬያ ዓሢ ሌሊ ኑም ዒንጉዋቴ፤ ካታሜሎ ኑ ሃሺ ዴንዳንዳኔ» ጌዔኔ።

ዒዛ ማሃዎ፡- «ዒዛኮ ቶኦኮ ተቂ ዔኪ ከኤሎ ዲያ ዑሣ ኔኤም ኑ ዓጋንዳኔ» ጌዔኔ። 22 ዬያ ዒዛ ማሌ ማሊያ ማዲ ኩንሣኒ ካታሞ ዴር ኮይላ ዴንዳኔ፤ ዔያታ ዒማና ቢኪሪ ናኣዚ፤ ሸባዔኮ ቶኦኮ ተቂ ዔኪ ከኤሎ ዲያ ዑሣና ዒዮዓቤም ዓጌኔ፤ ዬካፓ ዒዛኮ ፖኦሊሳ ካታሜሎ ሃሺ ዴንዳንዳጉዲ ዒዮዓቤ ዛዬ ዋርቁም ፖኦሊሳ ፔ ማኣሪ ማኣሪ ማዒ ዴንዳኔ፤ ዒዮዓቤያ ካኣቲ ኮይላ ዬሩሳላሜ ዴንዳኔ።

ደውቴኮ ደንዘ

23 ዒዮዓቤ ዒሰራዔኤሌ ፖኦሊሶኮ ሱኡጋሢ ማዓዛ፡ ዮዳሄ ናኣዚ ቤና ስሌታ ዓሶንታ ፔሊታ ዓሶንታኮ ሱኡጌከ፤ 24 ዓደኒራሜ ዔኤቢ ጩጉዋንቴ ጉሪ ማዳ ዓሶኮ ሱኡጌ ማዓዛ፡ ዓሢሉዴ ናኣዚ ዒዮሳፒፄ ማዲንቴ ባኮኮ ሃይሶ ፃኣፓያከ፤ 25 ሱሳ ጎሆሢ ካኣቱም ማኣርይዳ ዔኤቢ ፃኣፓያ ማዓዛ፡ ሳዶቁና ዓቢያታሪና ቁኤሶከ፤ 26 ዬያጉዲ ሃሣ ያዒሪ ካታማ ሸይንቴ፡ ዒራ ጎሶከይ ደውቴም ቁኤሴ ማዒ ማዳያከ።

21

ጌባዖኦኔ ዓሳ ኮሞ ማሃሢ

1 ደውቴ ካኣታዲ ዓኣንቴ ሃይሣ ሌዔ ጉቤ ዓጫ ሉማዳኔ፤ ዬያር ደውቴ ናንጊና ናንጋ ጎዳ ዖኦጫዛ፡ ናንጊና ናንጋ ጎዳ ማሃዎ፡- «ሳኣዖኦሊና ዒዛ ማኣር ዓሶና ጌባዖኦኔ ዓሳ ዋደሢር ሱጉሢ ዓሲ ማዒ ዓኣኔ» ጌዔኔ። 2 ዬና ጌባዖኦኔ ዓሳ ዒሰራዔኤሌ ዓሰቱዋሴ፤ ዒሰራዔኤሌ ዓሳ ዔያቶም፡- «ኑ ዒንሢ ዋዲንዲዋሴ» ጌይ ጫኣቁም ዓሞራ ዓሶፓ ፒኢጫዲ ዓቴ ዴሪከ፤ ሳኣዖኦሌ ዒሰራዔኤሌ ዓሶና ዪሁዳ ዓሶና ዒናፓ ናሽካያታሢር ዔያቶ ባይዘኒ ማሌንቴ ዓቲ ዓኣያከ። 3 ዬያር ደውቴ ዬያቶ፡ ጌባዖኦኔ ዓሶ ፔቴይዳ ዔኤሌ፡- «ናንጊና ናንጋ ጎዳ ዴርና ዒንሢ ጌኢጌም ናንጊና ናንጋ ጎዳ ዔያቶኮ ዳቢንቶ ዓቶም ጋዓንዳጉዲ ዒንሢዳ ማዲንቴ ጌና ማዶ ዛሎ ፔቴ ባኣዚ ታ ዒንሢም ማዲኒ ኮዓኔ፤ ታ ዋዎደንደይ?» ጌዔኔ። 4 ዔያታ ማሃዎ፡- «ሳኣዖኦሌና ዒዛኮ ማኣር ዓሶና ዋርቁ ማዎም ቢራ ጩጎናቴያ ኑኡኒ ጌኢጋኒ ዳንዳዑዋሴ፤ ሃሣ ኑኡኒ ዒሰራዔኤሌ ዓሶፓ ዓይጎ ዓሲያ ዋዲኒ ኮዑዋሴ» ጌዔኔ።

21:2 21:2 ዒያ. 9:3-15::

ደውቴ ዲማና፡- «ሂዳዎ ታ ዋዳንዳጉዲ ዲንሢ ኮዓይ?» ጌይ ዔያቶ ያክጩኑ።

5 ዔያታ ማሃዎ፡- «ሳኦኦሌ ኑና ጋፒሲ ባይዛኒ፣ ሃሣ ጊንሣ ኑ ባኣካፓ ዓይጎ ዓሲያ ዲሰራዔሌል ዓጮይዳ ዓንካኣ ሸምፔና ዓቲ ናንጋንዳጉዲ ኮዒባኣሴ፤ 6 ዬያሮ ሳኦኦሌ ዜርፃፓ ላንካይ ዓቲንቄ ዔኪ ኑም ዲንጌ፤ ኑኡኒ ዔያቶ ናንጊና ናንጋ ጎዳ ደኦሪ ካኣታሄ ካኣቲ፣ ሳኦኦሌ ካታም ጊቢዓይዳ ናንጊና ናንጋ ጎዳ ካኣሸኪንታ ቤዘ ኮይላ ሱፃንዳኔ» ጌዔኑ።

ካኣቲ፣ ደውቴ፡- «ታ ዔያቶ ዲንሢም ዲንጋንዳኔ» ጌዔኑ።

7 ጋዓንቴ ደውቴና ዮናታኣኔና ዋላ ናንጊና ናንጋ ጎዳ ማርካ ማሂ ጫኣቄ ጫኣቄሞሮ ሳኦኦሌኮ ናኣዚ ዮናታኣኔ ናይ ማዔሣ፤ ማፒቦሼቴ ዔያታ ዋዳንዳጉዲ ደውቴ ዔያቶም ዓኣሢ ዲንጊባኣሴ።

8 ያዲ ማዔቴያ ዓያ ናኣ፣ ሪፂፓ ሳኦኦሌም ሸዔ ላምዎ ዓቲንቄ ናይ ዓርሞኔና ማፒቦሼቴ ጌይንታሰኬንሢ ደውቴ ዔኬኔ፤ ሃሣ ሳኦኦሌ ናኣ ማራባ ጌይንታዛ ማሆላ ዓጪ ዓሲ ማዔሣ፤ ባርዚላዬ ናኣዚ፣ ዓድሪዔሌሌም ሸዔ ደንጎ ዓቲንቄ ናይሰኬንሢያ ዲዚ ዔኬኔ።

9 ደውቴ ዔያቶ ቢያ ጌባዖኦኔ ዓሰም ዔኪ ዓንጌም ጌባዖኦኔ ዓሳ ናንጊና ናንጋ ጎዳ ዳርና ካኣማ ቤዘ ኮይላ ዓኣ ዲኮይዳ ዔያቶ ሱፃኔ፤ ዔያታ ቢያሢ ዲኣካ ሃይቄኔ፤ ዔያታ ዋዳንቴሢ ሲሎ ዓጊና ጋፓንቴ ዔልላ ጮኦሪንቶ ዓርቃማናኬ።

10 ዬካፓ ሳኦኦሌኮ ጊንፃኣ ማቼላ፣ ዓያ ናኣ፣ ሪፅፓ ሌዛ ዓኣ ቤዘ ኮይላ ዴኤፒ ሹቺ ዓኣንቴ ዔያ ሹጮ ዑፃ ሲዬ ዓፒላ ሂኣሣዎ ዳማ ዳዔኔ፤ ዲዛ ዲማና ሃኣኮ ጮኦሮ ዋደፓ ዳንዲ ዲራ ዋርቃንዳ ዋደ ሂላንዳኣና ዲኣካ ዳዔኔ፤ ዲዛ ሮኦሮ ሮኦሮ ካፓ፤ ዲባሮ ዲባሮ ቦዎ ሙዑዋጉዲ ሌዘ ካፓኑ።

11 ሳኦኦሌኮ ጊንፃኣ ማቻ፣ ሪፅፓ ማዳ ባኮ ደውቴ ዋይዛዎ፡-

12 ያቤሸጌሌዓዴ ካታም ዳሮ ኮይላ ዳንዲ ሳኦኦሌና ናኣዚ ዮናታኣኔናኮ ማጌያ ዔኪ ሙኬኔ፤ ያቤሸጌሌዓዴ ዓሳ ዔያ ማጌያ ዳንቄሢ ፒሊሰፃኤማ ዓሳ ሳኦኦሌ ገልቦዓይዳ ዋዳ ኬሎና ሌዛ ሱፃንቴ፣ ቤትሻ ጌይንታ ዳራ ቡካ ጳኦካፓ ወኣቄኩ።

13 ደውቴ ሳኦኦሌና ዮናታኣኔናኮ ማጌያ ዔኬኔ፤ ሃሣ ሱፃንቴ ላንካዎ ዓሰንሢኮዎ ማጌያ ዔኪ ቡኩሴኔ፤ 14 ዬካፓ ሳኦኦሌና ዮናታኣኔናኮ ማጌያ ዓሳ ዔኪ ዳንዲ ቢኣኒያማይዳ ፃላዔ ጌይንታ ቤዘ ሳኦኦሌኮ ዓዶ፣ ቂሴ ዲኡፖ ካያ ካኣቲ ዓይሣም ዲኡኬኔ፤

21:7 21:7 1ሳሙ. 20:15-17፤ 2ሳሙ. 9:1-7። 21:8 21:8 1ሳሙ. 18:19።
21:12 21:12 1ሳሙ. 31:8-13።

ዬይ ቢያ ማዲንቴሰካፓ ዳራ ፔኤኮ ዓጮ ዛሎ ሺኢቁ ሺኢጲያ የኦሲ
ዋይዜኔ።

ፒሊሰጻኤሜኮ የሎና ዔርቴ ዓሶና ዒሰራዔኤሌ ዓሳ የልቴ የሎ
(19ኦሲ. ዓሃኬ 20:4-8)

15 ፒሊሰጻኤሜ ዓሶና ዒሰራዔኤሌ ዓሶና ሃሃ ዋሊ የሌኔ፤ ዬያር
ዳውቴና ዒዛ ዓሶና ዳንዲ ፒሊሰጻኤሜ ዓሶ የሌኔ፤ ፔቴ ኬሊ
ዳውቴ ዬያ የሎ የሊቤቃ ላቤኔ፤ 16 ዒማና ዳኤሠ-ማ ሃይሃና ዛላና
ኪሎ ማዓ ሞኦና ዓንጊና ዲዎና ዋርሢ ዓርቄያ ሃሃ ዓኪ ጨንቻ
ዓፓር ቴኦቴያ ዩሽቢቤናቤ ጌይንታ የልዚና ዔርቴ ዓሲሰኬይ ዳውቴ
ዋዲኒ ማሌኔ፤ 17 ጋዓንቴ ጻራያ ናኣዚ፡ ዓቢሻዬ ዳውቴ ማኣዲኒ ሙኪ
ዬያ የሎና ዔርቴ ዓሢ ዋዲኔ፤ ዬካፓ ዳውቴ ዒዛ ዓሶና ዋላ ለሚ ዬኖ
ዓሶ የላኒ ዴንዲዋጉዲ ዓሳ ዒዛ ጫኦቁሳዎ፡ «ዒሰራዔኤሌ ዓሶኮ
ያንፔ ማዔሢ፡ ኔኤኒ ሃይቃንዲሢር ላሚ የልዚዳ ኔ ኬሰካንዲያ
ኮይሱዋቤ» ጌዔኔ።

18 ዬካፓ ሃሃ ጎቤ ጌይንታ ቤሰካ ፒሊሰጻኤሜ ዓሶና ዋላ
የልዚ ማዢንቴኔ፤ ዒማና ሁሻዬይዳ ሾይንቴ፡ ሲቤካዬ ሳፒ ጌይንታ
የልዚና ዔርቴ ዓሲሰኬያ ራፓይሜ የጲታንቴ ዋዲኔ።

19 ጊንሃ ሃሃ ጎቤይዳ የልዚ ማዢንታዛ ቤኤቴሌሄሚይዳ
ሾይንቴ፡ ያዔሬዓርጊሜ ናኣዚ፡ ዔልሃናኔ ጋኣቴይዳ ሾይንቴያ ዋርዎኮ
ዘየ ዓንዲርሙማ ዶርዘኮ ዓንዳራሾ ሚዎጉዴያ ማዔ፡ ጎኦሊያዴ
ጌይንታ ፒሊሰጻኤሜ ዓሲ ዋዲኔ።

20 ዬካፓ ሃሃ ጋኣቴይዳ የልዚ ማዢንቴኔ፤ ዒኢካ የልዚ ናሽካያ፡
የልዚና ዔርቴ ፔቴ ዓሲሰኬይ ዓኣኔ፤ ዬያ ዓሢኮ ጉቤ ቶኮና
ኩጮናይዳ ላቆ ኬኤላና ዋላ ላሆ ላሆ ኬኤላ ዓኣያ ማዓዛ፡
ኬኤሎኮ ሚርጉማ ዋሊ ዑፃ ላማታሚ የይዶኬ፤ ዒዚ የዶሲ
ዓሲ፡ ሃሃ ራፓይሜ ጌይንታ ዜርዓፓ ሾይንቲኬ። 21 ዬይ ዓሢ
ዒሰራዔኤሌ ዓሶ የሎና ሚርጌ ሜታሴኔ፤ ያዲ ማዔቴያ ዳውቴኮ
ጌርሲ ሻማ ናኣዚ፡ ዮናታኣኔ ዒዛ ዋዲኔ።

22 ዬንሢ የይዶ የሎና ዔርቴ ጋኣቴ ዓሶንሢ ራፓይሜ ዜርሢ
ማዓዛ ዳውቴና ዳውቴ ዓሶና ዔያቶ ዋዲኔ።

22

ዳውቴ የሎና ባሻዎ ዓይናዳ ዓይኑዋ
(ዓይኑ. 18)

21:17 21:17 1ካኣቶ. ማ 11:36፤ ዓይኑ. 132:17።

1 ናንጊና ናንጋ ጎዳ ሳኦጎሌንታ ሃንጎ ዒዛኮ ሞርኮንታይዳፓ
ዓይሴሢረ ሂዚ ጌዒ ጾኦሲ ሰንቸሞ ዳውቴ ዓይናዴኔ፡-

2 «ናንጊና ናንጋ ጎዳ ታና ዓውሳ ላላሢ
ታኦኮ ዒ ደደ ሞርዲያሢኬ።።

3 ናንጊና ናንጋ ጎዳ ታና ዓውሳ ላላሢ ማዔሢረ
ዒዛና ሞላ ኮሺ ታ ናንጋኔ፤
ዒዚ ገቲማጉዲ ታጊዳ ሙካ ባኮ ቃዛኔ፤
ታና ማኦዳሢ፡ ዒዚ ኮሺ ታና ናንጊሳኔ፤
ዒዚ ታና ዓውሳያታሢረ
ሜቶይዳፓ ታና ካፓኔ፤ ዓውሳኔ።።

4 ጋላታ ኮይሳ ናንጊና ናንጋ ጎዳሢ ታ ሺኢቃኔ፤
ዒዚ ታ ሞርካፓ ታና ዳቂሻኔ።።»

5 «ሃይቢ ታኦኮ ካራ ባይዚ ታና ማንጌኔ፤
ባይሰንታ ዲጶ ሙኪ ታና ዔኤዴኔ፤

6 ጋፒንፃባኣ ዒጊቻ ዔቶኮ ሱዛ ታና ማሬኔ፤
ሃይቢ ፒራ ታኦሞ ፒሪንቴኔ።።

7 ሜታሢ ታና ሄሌ ሞዶና
ናንጊና ናንጋ ጎዳ ታኣኒ ሺኢቁሞ
ታና ዒ ማኦዳንዳጉዲ ታ ጾኦሲ ታኣኒ ጾኦጩሞ
ፔኤኮ ጌኤኮ ማኦራ ዓኦጾ ታ ዑኡዞ ሞይዜኔ፤
ታኣኒ ሺኢቁ ዒላታ ዒላቶሞ ዒ ሞይዜኔ።።»

8 «ጾኦሲ ዳጋዴሢረ
ሳዓ ዓጊጻኔ፡ ጎጋይቄኔ፤
ጫሪንጮ ማዢ ዔቂሶና ፃጰ ቤዞ ሃሺ ዓጊጻኔ።።

9 ዒዛኮ ሲኢዳፓ ዳጋ ጩቢ
ዒዛኮ ዳንጋፓ ሙዓ ታሚ ሎሰታ
ሃሃ ሚቻ ቄንሢያ ኬሰኬኔ።።

10 ዒዚ ጫሪንጮ ዳርዚ ሊካ ኬዴኔ፤
ዒዛኮ ቶኮ ዴማ ዲሞ ጌዔ ሻኦሬ ዓኣኔ፤

11 ከሩቤሌ ጌይንታ ባኮይዳ ዴዒ ዒ ባራኔኔ፤
ዒዚ ዢባሮ ባኣካ ጋኣሲ ዓኣያ ማዒ ጶዴኔ።።

12 ፔና ጉቤ ዒ ዲሚና ዓኣቼኔ፤
ዒርዚ ካርሢ፡ ዲሞ ጌዔ ሻኦሬ ዒዛ ኮይላ ቡኬኔ።።

13 ዒዛኮ ቤርታ ዓኣ ዜኤሊንጾፓ
ታሚ ዔኤቲ ኬሰኬኔ፤

- 14 ናንጊና ናንጋ ጎዳ ጫሪንጫፓ ጉጉንሣኔ፤
ጳጴፖ ጾካዛሢ ፔ ዑኡዞ ዋይዚሴኔ።
- 15 ፔኤኮ ሂኢዢና ዒ ዲኪ
ሃሃ ዜኤሊንጾ ፓልጾና ዳውሲ
ፔኤኮ ሞርኮ ዒ.ዚ ላኣሌኔ።
- 16 ናንጊና ናንጋ ጎዳሢዮ! ኔኤኮ ሞርኮ ኔ ጎሪ ዋዶና
ኔኤኮ ዳጎ ዑኡዞ ኔ ዋይዚሴ ዋዶና
ጳጴፖ ባዘኮ ጋፖ ሳዓ ጴዳኔ፤
ሳዓ ማዢንቴ ዓይጾ ካራ ፔጋዳኔ።»
- 17 «ናንጊና ናንጋ ጎዳ ሎፓ ኩጮ ዳኪ ታና ዓርቄኔ፤
ጳጴፖ ዔቶ ዋኣጾ ዳማፓ ጎቺ ታና ኬሴኔ።
- 18 ዑሃ ዓኣዳ ታኣሞ ዋልቃዳ ታኣኮ ሞርኮና
ታና ዒጾ ዓሶ ቢያሢፓ
ናንጊና ናንጋ ጎዳ ታና ዓውሴኔ።
- 19 ታኣሞ ካራ ባይቃዛ ሞርኬ ማዒ ዔያታ ዔቄንቴ
ናንጊና ናንጋ ጎዳ ታና ካፔኔ።
- 20 ናንጊና ናንጋ ጎዳ ታና ማኣዲ ፑርታፓ ኬሴኔ፤
ታ ናንጎና ዒ.ዚ ዋዛዳሢፓ
ፑርታፓ ታ ቶላጎዳ ዳልጊ ካራ ታኣሞ ዒ ጌሣኔ።»
- 21 «ታኣኒ ዒሎ ባኣዚ ማዳሢፓ
ናንጊና ናንጋ ጎዳ ዬያ ዛሎ ማሂ ታኣሞ ጨጋኔ፤
ታኣኮ ፒዙሞ ማዶ ጎይጾ
ኮሺ ባኣዚ ዒ ታኣሞ ማዳኔ።
- 22 ናንጊና ናንጋ ጎዳ ዓይሣ ጎይጾ ታ ሃንቴኔ፤
ታ ጾኣዛሢ ታና ዳማሳ ዳቢንቴ ታ ማዲባኣሴ።
- 23 ናንጊና ናንጋ ጎዳኮ ዋጎ ቢያ ማዲ ታ ኩንሣኔ፤
ዒ.ዚ ዓይሣ ዳሞቦዋ ታ ቦንቼኔ።
- 24 ታ ዒዛ ቤርታ ጌኤሺኬ፤
ጎሚያ ታ ማዲባኣሴ።
- 25 ታኣኒ ዒዛ ቤርታ ማዳ ባኮ
ኮዢ ማዶንታ ጉሙርቄንቴጾንታ
ናንጊና ናንጋ ጎዳ ዔራያታሢፓ
ዒ.ዚ ዬያ ዛሎ ማሂ ታኣሞ ጨጋኔ።»
- 26 «ናንጊና ናንጋ ጎዳሢዮ!
ኔኤሞ ጉሙርቄንታ ዓሶሞ ኔ ጉሙርቄንታያኬ፤
ፒዜ ዓሶማኣ ኔ ፒዜኬ፤
- 27 ጌኤዢ ዓሶሞ ኔ ጌኤሺኬ፤

- ዎቦ ዓሶም ኔ ዎቦኬ።
 28 ሹሌዔ ዓሶ ኔ ዓውሳኔ፤
 ዖቶርቃ ዓሶ ጋዓገቴ ኔ ቦርሲሳኔ።
- 29 ናንጊና ናንጋ ጎዳሢዮ! ኔ ታኣኮ ፖሳሢኬ፤
 ታጊዳ ዓኣ ዲሞ ኔ ፖሲሳኔ።
- 30 ታኣኒ ሞርኮ ባሻንዳ ዎልቄ ኔ ታኣም ዒንጋኔ፤
 ዔያታ ዋርዲ ዴዔ ቤዞ ኮኦሚ ታ ጌላንዳጉዲ
 ዎልቄ ታኣም ኔ ዒንጋኔ።»
- 31 «ዖኦሲ ማዳ ማድና ፓጫ ባኣዚ ባኣያኬ!
 ናንጊና ናንጋ ጎዳኮ ቃኣላኣ ፒዜኔ፤
 ዒዛና ካናዳ ዓሶም ቢያ ዒ ጊቲማኬ።
- 32 ናንጊና ናንጋ ጎዳፓ ዓታዛ ሜሌ ዖኦሲ ባኣሴ፤
 ዒዛይዳፓዓቴም ካናዳ ባኣዚያ ባኣሴ።
- 33 ታኣም ደዲሞ ዒንጋሢና
 ጎይዖ ታኣም ጊኢጊሻሢና ናንጊና ናንጋ ጎዳኬ።
- 34 ዒዚ ታኣኮ ቶኮ ጌንዖ ቶኪጉዲ ደዲሻኔ፤
 ጌሚሮ ጎኦቦይዳ ዓልቱዎዖ ታ ዔቃንዳጉዲ ማኣዳኔ።
- 35 ኩጮ ታኣኮ ዒ ዖልዚ ዔርዛኔ፤
 ደደ ቆኦዞ ታ ጎቻንዳጉዲ ኩጮዎ ዒዚ ደዲሻኔ።
- 36 ታ ዖኦዛሢዮ!
 ታና ዓውሳ ጊቲሞ ታኣም ኔ ዒንጋኔ፤
 ኔ ዎልቃ ታና ደዲሻኔ።
- 37 ታኣኮ ቤርታ ዓኣ ባኮ ዒ ሺኢሻኔ፤
 ዬያሮ ቶካ ታኣኮ ዲቂንቴዎሴ።»
- 38 «ታ ሞርኮ ዳውሲ ታ ዓርቃኔ፤
 ታ ዔያቶ ባይዙዎዖ ጊንሢም ማዑዎሴ።
- 39 ላሚ ዔቁዎ ጎይሢ ታ ዔያቶ ባይዛኔ፤
 ታኣኮ ዔያታ ቶኮ ዴማ ሎኦማኔ።
- 40 ዖሎ ታ ዖላንዳ ዎልቄ ታኣም ኔ ዒንጋኔ፤
 ዖሎና ታ ሞርኮ ኔ ታና ባሻሳኔ።
- 41 ታ ሞርካ ታ ቤርታፓ ጳሻካንዳጉዲ ኔ ማሃኔ፤
 ታና ዒፃ ዓሶ ቢያ ኔ ባይዛኔ።
- 42 ዔያቶ ማኣዳ ዓሲ ኮዒ ዔያታ ዒላታኔ፤
 ጋዓገቴ ዔያቶ ማኣዳ ዓሲ ፔቴታዖ ባኣሴ፤

- ናንገና ናንጋ ጎዳ ዔያታ ዔኤላኔ፤
 ጋዓንቱ ዒዚ ዔያቶም ዬሁዋሴ።
- 43 ሲላሊ ማዓንዳያ ሄላንዳኣና ታ ዔያቶ ገኢጫኔ፤
 ጎይሢዳ ዓኣ ቶርጳጉዲ ታ ዔያቶ ዳኣፃኔ።»
- 44 «ፑርቶ ዴርይዳፓ ኔ ታና ዓውሴኔ፤
 ዴር ቢያ ዋይህንዳጉዲ ኔ ታና ዶኦሬኔ፤
 ታ ዔፎቶ ዴሬ ታ ዴማ ዋርቃኔ።
- 45 ፃንጎ ማዔ ዴራ
 ታ ዛሎ ዋይዚ ታኣም ዓይሢንታኔ፤
 ታና ቦንቺ ዚገያ ዚጋኔ።
- 46 ጫርሹማ ዔያቶኮ ባይቄም ዒጊጪ ሜታዲ
 ጎጋይቄ ፔኤኮ ዋርዲዮይዳፓ ከሰኪ
 ታ ባንሢ ሙካኔ።»
- 47 «ናንገና ናንጋ ጎዳ ናንገና ናንጋያኔ፤
 ታኣኮ ካናዶ ጆኦዚ ጋላቲንቶም፤
 ታና ዳቀሻ ዳኤፖ ጆኦዚ ዴግ ዴጊ ጎም!
- 48 ዒ ታ ሞርኮ ኮሚ ኮም ማሃኔ፤
 ዴር ቢያሢ ታ ዴማ ማሃ ዒ ዋይሢሳኔ።
- 49 ታ ሞርካፓ ታና ዒ ዓውሳኔ፤
 ጆኦዚዮ!
 ታ ሞርኮ ኔ ታና ባሺሲሳኔ፤
 ጌኖ ማዶ ማዳ ዓሶፓ ኔ ታና ዓውሳኔ።
- 50 ዬያር ዴር ባኣካ ታ ኔና ጋላታኔ፤
 ኔ ሱንጆዋ ዓይኑሞና ታ ዴኤፒሳኔ።
- 51 ዒዚ ካኣታሢ ካኣቲም ባሺሢ ዒዚ ዒንጋኔ፤
 ዒዚ ተሸኪ ዶኦሬ ዳውቴና ዜርጆናም፤
 ናንገና ጋፑዋ ናሹሞ ፔኤሲ ዒ ፔጋሲ ዳዋኔ።»

23

ዳውቴ ጋፒንፃ ኬኤዜ ባኮ

- 1 ጆኦሲ ዴግ ዴጊዴሢ፡ ያይቆኦፊ ጆኦዚ ዶኦሬሢ፡
 ዒሰራዔኤሌይዳ ቃራ ዓይኑም ዓይናዳያ ማዔሢ፡ ዒሴዬ ናኣዚ፡
 ዳውቴ ጋፒንፃ ጌሰቱ ባካ ያዲኬ፡-
- 2 ናንገና ናንጋ ጎዳኮ ዓያና ታኣና ማዒ ኬኤዛኔ፤
 ዒዛኮ ቃኣላ ታ ዳንጋኬ።
- 3 ዒሰራዔኤሌ ጆኦዚ ዬያ ኬኤዜኔ፤

22:50 22:50 ሮሜ 15:3።

ዒሰራዔኤሌ ካፓሢ ሂዚ ታኣሞ ጌዔኔ፤
«ጾኦሲ ዒጊጪ
ፒዜ ወይሥሢ ወይሣ ካኣቲ፤

4 ዒዚ ሻኦሬ ባኣያ ሳዓ ካራዛ ፖዓ ፖዒጉዲኬ፤
ሳዖይዳ ማኣቶ ባቃልሳ
ጉቴና ዖርቃ ዓቢጉዲኬ። »

5 ቢያ ባኣዚና ጊኢኔያ ሃሣ ጉሙርሳያ ዒ ማዔሢሮ
ናንጊና ናንጋ ጫኣቁሞ ዒ ታኣና ዎላ ጫኣቁሢሮ
ጎኔና ታኣኮ ማኣራ ጾኦሲም ጉሙርቁንታያቱዋዓዳ?
ታና ዒ ማኣዲ ሃሣ ታ ኮዓ ባኮዋ ቢያ ዒ ኩንሣያቱዋዓዳ?

6 ፑርቶ ዓሳ ጋዓንቴ ኬኤሪንቴ ዓንጊሢጉዲኬ፤
ዓይጎ ዓሲያ ኩቻ ዔያቶ ካኣማኒ ዳንዳዑዋያኬ።

7 ዬያቶ ቡኡራኒ ኬላኬቺ ኮይሳያኬ፤
ያዲ ማዔቴ ዔያታ ጋፒ ሚቺንታንዳኔ።

ዳውቴኮ ዖሎና ዔርቴ ፖኦሊሶ
(1ጾኦሲ. ዓሃኬ 11:10-41)

8 ዳውቴኮ ዖሎና ዔርቴ ፖኦሊሶ ሱንፃ ሃካፓ ሊካ ፓይዲንታ
ዓሶኬ፤ ቤርታሳሢ፡- ታህኪሞኔይዳ ሾይንቴ፡ ዮሹብባሼቤቴ
ጌይንታሰኬያ ማዓዛ ዒዚ ዖሎና ዔርቴ ሃይሣ ፖኦሊሶኮ ሱኡጌኬ፤
ዬይ ዓሢ ፔቴ ዖልዚና ፔኤኮ ዎርዖ ዔኪ ዳንዲ ዔርቴ፡ ሳሊ ጃኤታ
ዓሲ ዎዴ።

9 ላምዓሳሢ፡- ዓሆሄ ቶኦኪ ማዔያ፡ ዖሎና ዔርቴያ፡ ዶዶ
ናኣዚ፡ ዓላዜሬኬ፤ ፔቴ ኬሊ ዒዛና ዳውቴና ዖሎ ዖላኒ ኬሰኬ
ፒሊሰጃኤሜ ዓሶ ቃዚ ሜታሴ፤ ዒሰራዔኤሌ ዓሳ ዒማና ጊንሣም
ዶጩኔ፤ 10 ዬይ ዓሢ ጋዓንቴ ዓኣ ቤዛ ዶዲ ዔቁ ኩጫ ዒዛኮ ዶጪ
ጩንቸ ዓፓሮ ዓርቂ ዘቲዮ ጋዓንዳያ ሄላንዳኣና ፒሊሰጃኤሜ ዓሶ
ዖሌኔ፤ ዬኖ ኬሎ ናንጊና ናንጋ ጎዳ ዴኤፒ ባሺሢ ዔያቶም ዒንጌኔ፤
ዖላ ጋፔሰካፓ ዒሰራዔኤሌ ዓሳ ዓላዜሬ ዓኣ ቤዛ ሙኪ ሃይቁ፡
ፒሊሰጃኤሜ ዓሶፓ ሚርጌ ዖልዚ ዓንጋሞንታ ማኣጾንታ ዔኬኔ።

11 ሃይሣሳሢ ሃሣ፡- ሃራሬይዳ ሾይንቴያ፡ ዖልዚና ዔርቴያ፡ ዓጌ
ናኣዚ፡ ሻማኬ፤ ፔቴ ኬሊ ፒሊሰጃኤሜ ዓሳ ሪንጎ ጎሺ ዓኣ፡ ሌሃ
ጌይንታ ቤዛ ዖሎሮ ሙኪ ዓኣንቴ ዒሰራዔኤሌ ዓሳ ፒሊሰጃኤሜ
ዓሶ ቤርታፓ ጳሽኪ ፑኔኔ፤ 12 ሻማ ጋዓንቴ ዬኖ ጎዡ ጋራ ጫርቂ
ዔቁኔ፤ ዒዚ ዒማና ፒሊሰጃኤሜ ዓሶ ዖሊ ዎዴ፤ ዬኖ ኬሎዋናንጊና
ናንጋ ጎዳ ዴኤፒ ባሺሢ ሻሼኔ።

13 ሃኣኮ ጮኦር ዎዶና ፒሊሰጃኤሜኮ ዖሎ ዓሳ ራፓይሜይዳ
ዱንኪ ዴዒ ዓኣንቴ ሃይሢታሞ ዖሎና ዔርቴ ዓሶፓ ዬንሢ ሃይሣንሢ

ዳውቴ ኮራ ዓዲላሜ ሙከኔ። 14 ዳውቴ ዒማና ዋርዲ ገእጊሾና ጎኑቢዳ ዓኣኔ፤ ፒሊሰጻኤሜ ዓሶ ፖኦሊሶፓ ፔቴይዳ ፓቆና ፖኦሊሴ ሙከሲ ቤኤቴሌሄሜ ዓርቄኔ፤ 15 ዳውቴ ዒማና ዓጮ ጳቂሣዮ፡- «ከልቂ ዲርቆና ቤኤቴሌሄሜ ካታሞ ጌሎ ካር ኮይላ ዓኣ ዔቶ ዋኣፃፓ ታ ዑሽካንዳ ዋኣሢ ዓይጌ ታኣም ዔኪ ሙካንዳይ!» ጌዔኔ። 16 ዩያር ዩንሢ ያሎና ዔርቴ ሃይሣ ፖኦሊሶንሢ ፒሊሰጻኤሜ ዓሳ ዲንኪ ዴዔ ቤዘ ጊዴና ጫርቂ ዴንዲ ዋኣፃ ዔቴሎፓ ዲይ ዳውቴም ዔኪ ሙከኔ፤ ዳውቴ ጋዓንቴ ዑሽካኒ ኮይባኣሴ፤ ዩያይደንደሢ ሃሺ ናንጊና ናንጋ ጎዳም ዒንጎ ባኣዚ ማሂ ሳዓ ላኣሌሰካፓ። 17 «ናንጊና ናንጋ ጎዳሢዮ! ሃያ ዋኣፃ ታ ፔቴታፆ ዑሽካዓከ! ታኣኒ ዑሽከቴ ሃይቢር ዒጊጩዋዮ ዴንዴ ዩንሢ ዓሶንሢከ ሱጉፆ ታ ዑሽካያ ማዓኔ!» ጋዓፆ፡ ዋኣፃ ዑዠ ዒጻኔ።

ያሎና ዔርቴያ ማዔ ሃይሣ ጫርዠ ፖኦሊሶንሢ ማዴ ሄርሺሳ ማዳ ዩያከ።

18 ጂሩያ ናኣዚ፡ ዒዮዓቤኮ ጌርሲ ዓቢሻዬ ያሎና ዔርቴ ሃይሣ ፖኦሊሶንሢከ ሱኡጌከ፤ ዒዚ ፔኤኮ ዋርፆ ዔኪ ሃይሣ ጻኤታ ዓሲና ያልቴ ዩያቶ ቢያ ዋዴ፤ ዩያር ዒዚያ ሃይሣንሢጉዲ ያልዚና ዔርቴ ዓሲ ማዔኔ። 19 ዒዚ ዩያቶ ሃይሣሢፓ ዑሣ ዓኣዴ ያሎና ዔርቴ ዓሲ ማዔሢር ዔያቶኮ ሱኡጌ ማዔኔ፤ ጋዓንቴ ዒዚ ያሎና ዔርቴ ሃይሣ ዓሶንሢጉዲ ማዓያቴዋሴ።

20 ሜሌ ሃሣ ያሎና ዔርቴ ፖኦሊሴ፡- ቃብጻዔሌይዳ ሾይንቴያ፡ ዮዳሄ ናኣዚ፡ ቤናያከ፤ ዒዚ ላምፆ ዔርቴ ሞዓኣቤ ዓሲ ፖኦሊሴ ዋዴ። ጊንሣ ሃሣ ሚርጌ ሄርሺሳ ማዳ ማዴያከ፤ ፔቴ ከሌ ሻቲ ዋርቄ ከሊሰከኖ ፔቴ ዴኔ ባኣካ ጌሌ ዘቢ ዋዴ፤ 21 ዩያጉዲ ሃሣ ዒዚ ዋርሢ ዔኪ ዓኣ፡ ፔቴ ያልዚና ዔርቴ ጊብጻ ዓሲሰከያ ዋዴ፤ ዒዚ ዒማና ኮኦሎፓዓቴም ከጫ ሜሌ ዓንጋሞ ባኣንቴ ጊብጻ ዓጮ ዓሢ ባንሢ ሙከሲ ዋርፆ ከጫፓ ሳሪ ዔኪ ዩያና ጫርጊ ዋዴ።

22 ያሎና ዔርቴ ሃይሣ ዓሶንሢጉዲ ማዔሢ፡ ቤናያ ማዴ ሄርሺሳ ማዳ ያኣዴከ። 23 ዒዚ ሃይሢታሞ ዓሶ ባኣካ ኮሺ ዔርቴያ ማዔቴያ ያሎና ዔርቴያ ማዔፆና ሃይሣ ዓሶ ሄሎዋሴ፤ ዳውቴ ፔና ካፓ ዓሶኮ ዒዛ ሱኡጌ ማሂ ደኦሬ።

24-39 ሃይሢታሞ ዓሶ ባኣካፓ ዛሎ ዓሶኮ ሱንፃ ሃካፓ ለካ ፓይዲንታኔ፡-

- ዒዮዓቤኮ ጌርሲ ዓሳሄሌ፤
- ቤኤቴሌሄሜይዳ ሾይንቴ፡ ደዶ ናኣዚ ዓልሃና፤
- ሃርዴይዳ ሾይንቴ፡ ሻማንታ ዔልቃንታ፤
- ፔሌጻይዳ ሾይንቴ፡ ሄሌጻ፤
- ቴቆዓይዳ ሾይንቴ፡ ዒቁሽ ናኣዚ ዒራ፤

ዓናቶቴይዳ ሾይንቴ፥ ዓቢዔዜሬ፤
 ሁሻዬይዳ ሾይንቴ፥ ሜቡናዬ፤
 ዓሆሌይዳ ሾይንቴ፥ ፃልሞኔ፤
 ኔፆፓይዳ ሾይንቴ፥ ማሂራዬ፤
 ሃሣ ኔፆፓይዳ ሾይንቴ፥ ባዔ ናኣዚ ሄሌቤ፤
 ቢኢኒያሜ ዓጮ ጋራ ዓኣ ጊቢዓይዳ ሾይንቴ፥ ሪባዬ ናኣዚ፥ ዒታዬ፤
 ፒርዓቶኔይዳ ሾይንቴ፥ ቤናያ፤
 ጋዓሼ ዶኦጮ ኮይላ ሾይንቴ፥ ሂዳዬ፤
 ዓርባዓይዳ ሾይንቴ፥ ዓቢዓልቦኔ፤
 ባርሁሜይዳ ሾይንቴ፥ ዓዝማዌቴ፤
 ሻዓልቦኔይዳ ሾይንቴ፥ ዔልያሂባ፤
 ያሽኔ ናኣታ፤
 ዮናቴኔ፤
 ሃራሬይዳ ሾይንቴ፥ ሻማ፤
 ጊንሣ ሃሣ ሃራሬይዳ ሾይንቴ፥ ሻራሬ ናኣዚ፥ ዓሂዓሚ፤
 ማዕካይዳ ሾይንቴ፥ ዓሃሴባዬ ናኣዚ፥ ዔሊፔሌ፤
 ጊሎይዳ ሾይንቴ፥ ዓኪፆፔሌ ናኣዚ፥ ዓልዓሜ፤
 ቁርሜሎሴይዳ ሾይንቴ፥ ሄፅር፤
 ዓሬቤይዳ ሾይንቴ፥ ፓዓራዬ፤
 ፆባ ናኣዚ ናኣታኣኔኮ ናኣዚ፥ ዪግዓሌ፤
 ጋኣዳይዳ ሾይንቴ፥ ባኒ፤
 ዓሞኦይዳ ሾይንቴ፥ ፃለቁ፤
 ዒዮዓቤኮ ፆሎ ዓንጋሞ ኬዳ፥ ቤዔርቴይዳ ሾይንቴ፥ ናሀራዬ፤
 ያቲሬይዳ ሾይንቴ፥ ዒራንታ ጋሬቤንታ፤
 ሂታ ዓሂ ፆሪዮንታኬ።
 ዳውቴኮ ፆሎና ዔርቴ ፖሊሶኮ ሚርጉማ ዋሊ ዑፃ ሃይሂታሚ
 ለንካይኬ።

24

ዳውቴ ዴር ፓይዳሂ
 (1ፆኦሲ. ዓሃኬ 21:1-27)

1 ናንጊና ናንጋ ጎዳ ሃሣ ላሚ ዒስራዔኤል ዓሰይዳ ዳጋዴሂር
 ዳውቴ ዔያቶይዳ ሜቶ ዔኪ ዩዓንዳጉዲ ዒ ማሄኔ፤ ናንጊና ናንጋ
 ጎዳ ዳውቴ፡- «ዴንዲ ዒስራዔኤል ዓሰና ዪሁዳ ዓሰና ፓይዳ!»
 ፔዔኔ፤ 2 ዩያር ዳውቴ ዒዛኮ ፖኦሊሶ ዓይሣ፥ ዒዮዓቤ፡- «ኔ
 ዴማ ፖኦሊሶ ዓይሣያ ማዔ ዓሰ ዔኪ ዴንዲ ዓጮኮ ካራፓ

ዴንዲ ጋፖ ሄላንዳኣና ጌይፃ ዳኣኔፓ ዴንዲ ቤርሳቤ ሄላንዳኣና ዓኣ
ዒሰራዔኤሌ ፃጶ ዳሮ ቢያ ፓይዳ፤ ታኣኒ ዋኣዳ ዓሲ ዓኣኔያ ዔራኒ
ኮዓኔ» ጌይ ዓይሄኔ።

3 ዒዮዓቤ ጋዓንቴ፡- «ካኣተዮ! ናንጊና ናንጋ ጎዳ ማዔ ኔ ፆኦዛህ
ዒሰራዔኤሌ ዳሮ ሃህ ዓኣ ዓሰፓ ፀሓይ ጸንጮ ማሂ ኔኤም
ሚርጊሾንጎ፤ ያኣዳ ዒ ማሄም ኔ ዛጋንዳጉዲ ሌዖ ኔኤኮ ዒዚ
ዖደሶንጎ፤ ጋዓንቴ ካኣተዮ! ዬያይዳኒ ኔ ዓይጋ ኮዔይ?» ጌዔኔ።
4 ካኣተ ጋዓንቴ ዒዮዓቤንታ ፖኦሊሶ ዓይህ ዓሰንታ ዒ ዓይህ ባኮ
ማዳንዳጉዲ ዋልቃዳህሮ ዒዛ ኮራፓ ዒሰራዔኤሌ ዳሮ ፓይዳኒ
ዔያታ ዴንዳኔ።

5 ዔያታ ዒማና ዮርዳኖሴ ዋሮና ፒንቁ ጋኣዴይዳ ዓኣ ዶኦጫ፥
ዓሮዔኤሬ ካታሞኮ ደኦሎ ዛላ ዱንኪ ዴዒኔ፤ ዬካፓ ሌካ ኬሰካዖ
ያዕዜሬ ሄሌኔ፤ 6 ዬይና ጌዒ ጌሌዓዴና ሂኢታ ዓሶ ዓጮ ጋራ ዓኣ
ቃዴሴ ሄሌኔ፤ ዬካፓ ዳኣኔ ዴንዳኔ፤ ዳኣኔፓ ጊንህ ዓባ ጌላ ባንዖ
ዛሎና ጌይ ሲዶና ዴንዳኔ፤ 7 ጊንህ ሃህ ዓጮሎኮ ደኦሎ ዛላ
ዙላ ኬኤሎ ዲዖና ዲርቁንቴ፥ ዪኢሮሴ ካታሞ ዴንዲ ዒኢና ጋዓዖ
ሂኢታ ዓሰንታ ካኣና ናሰንታ ካታሞ ቢያ ዴንዳኔ፤ ጋፒንዖይዳ
ዪሁዳይዳ ዓኣ፥ ቤርሳቤ ዔያታ ሄሌኔ፤ 8 ዬያይዲ ዓጮሎ ጉቤ ሺሪ
ታዘጳ ዓጊና ላማታሚ ኬሊና ማዔሰካፓ ዬሩሳላሚ ማዒ ሙኬኔ።
9 ዒዮዓቤ ዒማና ዒሰራዔኤሌይዳ ሳሊ ዪኤታ ሺያ፥ ዪሁዳይዳ
ዶንጎ ዪኤታ ሺያ ዖልዚ ዖላኒ ዳንዳዓ ዓሲ ዓኣሂ ዔሪ ካኣተም
ኬኤዜኔ።

10 ጋዓንቴ ዳውቴ ዳሮ ፓይዳሰካፓ ዒኔ ዒዛኮ ዴጶም ዒዛ
ማሊሺ ባሺህሮ፡- «ታኣኒ ሃያ ማዲዖና ዴኤፒ ዳቢንቴ ዳቤኔ፤
ዔኤያቶ ማዳ ታ ማዳህሮ ሃዳራ ታኣም ዓቶንጎ ጌዔ!» ጌይ ናንጊና
ናንጋ ጎዳ ሺኢቁኔ።

11-12 ዳውቴም ዖኦሲ ማሊዖ ኬኤዛ ጋኣዴ ኮራ ናንጊና ናንጋ
ጎዳ፡- «ዳውቴ ኮይላ ዴንዲፓፓ «ኔኤኒ ሃይህ ባኣዚፓ ዶኦራንዳጉዲ
ታ ኮዓኔ፤ ታኣኒያ ኔኤኒ ዶኦራማጉዴያ ማዳንዳኔ» ጌዒ ኬኤዜ»
ጌዔኔ። ዚሮ ጉቴሎ ዳውቴ ጊንዓሰካፓ ጳጮኣና፥ 13 ጋኣዴ ዒዛ
ኮይላ ሙኪ ናንጊና ናንጋ ጎዳ ዒዛም ጌዔ ባኮ ኬኤዜኔ፤ ዒ
ኬኤዛዮ፡- «ኔ ዓጮይዳ ሃይህ ሌዔ ለማ፥ ሃይህ ዓጊኒ ኔ ሞርካ
ኔና ዳውሲ ሃንታያ፤ ሃህ ሃይህ ኬሊ ዳማ ዳማ ሃርጌ ኔ ዓጮ
ኬዳያፓ ዋማ ኔ ዶኦራይ? ሂንዳ ኮሺ ማሊፓፓ ናንጊና ናንጋ ጎዳም
ታ ኬኤዛንዳጉዲ ማሂ ታኣም ኔ ኬኤዜ» ጌዒ ዖኦጮኔ።

14 ዳውቴ ማሃዮ፡- «ታ ዋኖ ዶኦራንዳቴያ ታኣም ዔርቶ ዒዪኔ!
ጋዓንቴ ዓሲ ኩቺ ጋርሲ ጌላኒ ታ ኮፀዋሴ፤ ናንጊና ናንጋ ጎዳ

ሚጨነታናታሠር ዒ ታአም ኮይሳ ሜቶ ዒንጎንጎ!» ጌዔኔ።¹⁵ ዬያር ናንጊና ናንጋ ጎዳ ዬኖ ኬሎ ጉታፓ ዓርቃዎ ዒዚ ጌዔ ኬሎ ሄላንዳኣና ዒሰራዔኤሌ ዓሶ 0-9 ዲማ ዲማ ዎዳ ደርዎ ኬይሴኔ፤ ዒማና ዓጩሎኮ ካራፓ ዴንዲ ጋፖ ሄላንዳኣና ጌይፃ ዳኣኔፓ ዴንዲ ቤርሳቤ ሄላንዳኣና ላንካይታሚ ሺያ ዓሲ ሃይቁ ጋፔኔ።¹⁶ ናንጊና ናንጋ ጎዳኮ ኪኢታንቻሠሂ ዬሩሳላሜ ባይዛኒ ጊኢጊ ዓኣንቴ ናንጊና ናንጋ ጎዳ ዴር 0-9 ዔኪ ሙካኒ ማሌ ሜቶ ሃሺ ዬያ ዴር ዎዳ፣ ኪኢታንቻሠሂ ኮራ፡- «ጊዳንዳኔ! ሃሼ!» ጌዔኔ፤ ዒማና ኪኢታንቻሠሂ ዒያቡሳ ዓሲ ማዔ፣ ዎርና ጎዎሰኬያኮ ሃኣኮ ሺርኮ ቆይዳይዳ ዔቁ ዓኣኔ።

¹⁷ ዳውቴያ ዴር ዎዳ፣ ኪኢታንቻሠሂ ዴንቃዎ፡- «ዳቢንቶ ማዳ ማዳሠታናኬ፤ ታታኣር ፑርቶ ባኮ ማዳኔ፤ ዓካሪ ሃይ ዔቦ ዔሩዋ ዴራ ዓይጎ ዎዴይ? ሃይ ዎዳሠሂ ዔያቶ ሄላሰካፓ ታኣና ታ ማኣር ዓሶናም ማዎንጎ» ጌይ ናንጊና ናንጋ ጎዳ ዎኣጩኔ።

ዳውቴ ዎኣሲም ዒንጎ ባኮ ዒንጎ ቤዞ ኮሼሠሂ

¹⁸ ዒዞ ኬሎና ዎኣሲ ማሊያ ኬኤዛ፣ ጋኣዴ ዳውቴ ኮራ ዴንዳዎ፡- «ዎርናኮ ሃኣኮ ሺርኮ ቆይዳ ዴንዲጋፓ ናንጊና ናንጋ ጎዳም ዒንጎ ባኮ ዒንጎ ቤዞ ኮሼ!» ጌዔኔ፤¹⁹ ዳውቴያ ናንጊና ናንጋ ጎዳ ጌዔ ጎይፃ ዓይሠንቲ ጋኣዴ ጌዔ ጎይፃ ማዳኔ፤²⁰ ዎርና ዒማና ሊካ ዘጋፃ ካኣቲ፣ ዳውቴንታ ዒዛኮ ደንዞ ማዔ ቢታንታ ዓኣ ዓሳ ዒዛ ባንሠሂ ሙካንቴ ዴንቁኔ፤ ዒዚ ዳውቴ ቤርታ ሳዓ ላሂ ቦንቾ ዔኤሊሠሂ ዔኤላዎ፡-²¹ «ካኣቲዮ! ሃይካ ኔ ኮሺ ዓኣዎ ሙኪያ?» ጌይ ዎኣጩኔ።

ዳውቴ ማሃዎ፡- «ናንጊና ናንጋ ጎዳ ዲማ ዲማ ዎዳ ደርዓሠሂ ታ ዓጩፓ ዔቁሳንዳጉዲ ኔኤኮ ሃኣኮ ሺርኮ ቆይዳ ሻንቃኒና ዒኣካ ናንጊና ናንጋ ጎዳም ዒንጎ ባኮ ዒንጎ ቤሲ ኮሻኒ ታ ሙኬኔ» ጌዔኔ።

²² ዎርና ዒማና፡- «ካኣቲዮ! ቆይዳ ዔኪ ኔ ናሽኬሠሂጉዲ ዎኣሲም ዒንጎ ባኮ ዒንጌ፤ ዒንጎ ባኮ ዒንጎ ቤዞይዳ ሚቺ ዒንጎ ዒንጊሠሂም ማዓንዳ ጌማይ ሃይሾ ዓኣኔ፤ ሚቾንደ ሃንዲሎኮ ጌማቶ ሚኢሾንታ ሃኣኮ ሺርኮ ባኮንታ ቢያ ዓኣኔ» ጌዔኔ።²³ ዎርና ዬያ ቢያ ካኣቲም ዒንጋዎ፡- «ናንጊና ናንጋ ጎዳ ማዔ ኔ ዎኣዛሠሂ ኔኣኒ ዒንጋ ባኮ ዔኮንጎ» ጌዔኔ።

²⁴ ካኣቲ፣ ዳውቴ ጋዓንቴ፡- «ያዲ ማዎፓ፤ ታ ኔኤም ጨጋንዳያ ኮይሳኔ፤ ታ ዔኤቢ ጨጊ ዔኪባኣ ባኣዚ ናንጊና ናንጋ ጎዳ ማዔ ታ ዎኣዛሠሂም ዒንጎ ባኣዚ ማሂ ታ ሺኣሻንዳያ ኮይሱዋሴ» ጌዔኔ፤ ዬካፓ ዳውቴ ዬኖ ቆይዳሎንታ ጌማቶንታ ደንጊታሚ ሹቺ ቢራና ሻንቁኔ፤²⁵ ዒዚ ዒማና ናንጊና ናንጋ ጎዳም ዒንጎ ባኮ ዒንጎ

በሲ ኮሺ ሚቺ ዒንጎ ባኮንታ ፔቱሞና ዒንጎ ባኮ ናንጊና ናንጋ
ጎዳሞ ሸኢሸኔ፤ ናንጊና ናንጋ ጎዳኣ ዳውቴኮ ሸኢጲፆ ዋይዜኔ፤
ዒሰራዔኤሌይዳ ኬዳ ዳማ ዳማ ዋዳ ደርዒሢ ዩካፓ ዔቄኔ።

ጌሌዥ ማግኔግ
The Holy Bible in the Maale language of Ethiopia,
using Ethiopic script

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌሌዥ ማግኔግ

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-13

PDF generated using Haiola and XeLaTeX on 21 Feb 2024 from source files dated 14 Apr 2023

bbcfb90a-3ae3-5452-983d-6c4c02375929